

袁小脩詩集

貴州省圖書館

第

號



第一輯  
第四十一種

珂雪齋集  
詩集

1914  
1,41,1

明·袁中道著

據原刊本排印  
貝葉山房張氏藏版



珂雪齋集選總目

詩

卷之一

一五四首

卷之二

一八七首

卷之三

一五八首

卷之四

一六九首

卷之五

珂雪齋詩集總目

一〇九首

卷之六

二〇四首

卷之七

二〇七首

珂雪齋詩集總目



# 珂雪齋集選序

予詩文若干卷。外集若干卷。刻於新安。後官太學博士。擢之而北。及改南儀曹。遂留京師。已付友人汪惟修。南歸舟中。不意行至河西務。偶有火變。板遂燬。又一年。惟修與友人到余所。選詩若干卷。且成問序於予。余曰。詩莫感於唐。顧唐之所以稱感者。正以異調同工。而究竟不害其爲可傳耳。杜工部之沉着。李青蓮之俊快。兩者其勢若相反。而其實各從所入。以極其才。至於今光燄不磨。夫豈惟諸君子以正聲鳴。卽任華盧仝李賀孟郊輩。皆相與角奇闕巧。崢嶸一代。當時之詞人。亦未嘗以其偏枯而詆之。而廢之。此唐之所以感也。大都天地間之景物。與人心中之情態。千變而未始有極。脩詞者堂堂正正。奇奇怪怪。如蒐璧採寶者。然以共扶造化未開之倪。以共鳴一代風雅之感。不亦可乎。夫卮言俚語。言口而出。滔滔莽莽。無復檢括。是固無足道。若夫摭故詘新。喜同惡異。拘執格套。逼塞靈源。此其病。與個背規矩者正等。予詩不敢望諸作者。而要之。據其意所欲言。譬之園者。香色皆絕。固爲奇觀。卽有色而香減。有香而色減。皆宇宙之精華所寄。原不同於蔓草散木。或亦無害其爲可傳者。予姑聽其流布焉。而拜爲之序。

天啓三年重九日鳧隱袁中道撰

河野齊集選序

# 自序

(舊序附錄於此)

袁子曰。大經尙矣。文法秦漢。古詩法漢魏。近體法盛唐。此詞家三尺也。予敬佩焉。而終不學之。非不學也。不能學也。古人之意至而法卽至焉。吾先有成法據於胸中。勢必不能進達吾意。達吾意而或不能盡合於古之法。合者留。不合者去。則吾之意其可達於言者有幾。而吾之言其可傳於世者又有幾。故吾以爲斷言不能學也。姑抒吾意所欲言而已矣。抒吾意所欲言卽未敢盡遠於法。第欲以意役法。不以法役意。故合於古者存。不合於古法者亦存。總之意中勃鬱。不可復茹。其勢不得不吐。姑倒囷出之。以自快。爾不暇擇焉耳。豈誠謂我用我法。而可目無古人爲也。夫古之人豈易言哉。昔宋子京自謂五十後。奉詔修唐書。細觀古人文字。迴看五十年前所作。幾媿汗欲死。予自十七八歲卽知修詞。幾三十年矣。每取舊作視之。四五行後。若荆棘。列楮墨間。實之惟恐不速。益覺古人千不可及。萬不可及。其媿汗欲死。又不啻子京已也。然吾所以不及古人者有故。少志進取。專攻帖括。中年尙遭擯斥。竭一生精力。以營箋疏。避聲迎笑。至於夢腸嘔血。四十以後。始得卑卑一第。博古修詞。偷晷爲之本。不才習。何由工巧。浮涉淺嘗。安能入微。此其不及古人者一也。古人詩文。皆本之六經。以

邈其源。參之子史百家。以衍其處。視月。此其不知古人者一也。古人研京十年。練都一紀。盡絕外緣。爲深湛之思。今者雖有制作。率爾成章。如兔起鶻落。決河放溜。發揮有餘。淘鍊無功。此其不及古人者三也。古人屢用餞送之文。實情實境。不尚浮夸。作者不以爲嫌。受者不以爲過。近時獻諛進熟。不啻口出。少不稱揚。便同譏刺。自惟骨體孱弱。未能免俗。雖孳性靈。間雜酬應。此其不如古人者四也。少忝聞道。有志出世。至於操觚。輒懷利刀切泥之嘆。嘗欲息機。輟穎。遁跡煙雲。故未仕前。大半居山。所作多傷爾寄興。模寫山容水態之語。而高文大冊。寂然無有。此其不如古人者五也。夫豈惟古人。卽本朝諸君子。各有所長。成一家言。敢自謂超乘而上之邪。每思此道。亦自無涯。甫涉其幾。而頭顱已不待矣。棄之頻歲。移徙中間。散佚已多。所存什五。荒野固陋。常欲付之祖龍一炬。而名根未忘。不忍棄擲。謬謂千古詞人之於詞。亦猶慈父之於子也。子息託體於形氣。文章亦受孕於靈腑。才不才各言其子。則工不工亦各言其詞。慈父不以子之不肖才也而棄之。詞人以又豈以辭之不肖工也而廢之哉。夫父或溺愛。而以不才爲才。或苛責。而以才爲不才。文章之道。己憎人愛。己愛人憎。箕畢殊好。未能自定。故駭而梓之。亦不敢有去取也。嗟乎。吾向者無一事非任也。吾今者無一事非讓也。以出世言。已將超悟讓之人。退而修香光之業矣。以用世言。以將經濟讓之人。退而讓

隱之間矣。至於立言一事。向者雖不能窮其變化。而未常無此志也。今且以經國垂世讓之人。不惟不強合古之法。而亦不肯奢用己之意矣。然則此之梓也。豈欲流通。妄冀有述。聊以結向者修詞之局。以存過雁之一唳。而使後來不復措意。此道已爾盡釋。夫不能負不必負之擔。而嬉焉爲盛世百不思百不能之愚人。以終其天年。吾從此間矣。吾計定矣。吾願畢矣。萬曆戊午五月午日堯隱居士袁中道書於新安郡校之臥雪齋中。

自

序

四



珂雪齋詩集 卷之一

公安處隱袁中道著  
社友一愚鄒得魯校

詩

入城道中

山北山南自隱藏。閑心又逐馬蹄忙。綠禾畦裏流聲細。青草湖邊雨氣香。柳市特來尋萬子。柴車到處指何郎。春深剩有繁華地。處處東風發練棠。

武昌坐李龍潭邸中贈答

比來三食武昌魚。今日重留靜者居。我有弟兄皆慕道。君多任俠獨憐予。尊前鸚鵡人如在。樓上元龍傲不除。芳草封天波似雪。捲簾對雨讀新書。

送同舟歸州人

漢陽江頭水正白。青翰舟裏送歸客。好雨打帆漢川涯。北風吹草潛江陌。黑牛渡口生紅

日裏江兩岸火雲出。夜眠灘上愁蚊蚋。早起舟中長梳櫛。三湖漾漾見澄波。月明漁浦唱湖歌。  
綠樹蒼蒼山隱見。細看却是江陵縣。青林數點水中洲。轉入花源曲曲流。暑中最宜河朔飲。與  
君一上仲宣樓。

沙頭曲

十里梨花雪。人家逐水移。黃牛書到早。朱雀信來遲。夜月聞金縷。春風拂竹枝。女兒重意  
氣。何用錢刀爲。

其二

上我鬱金堂。薰籠爇好香。數錢憐姪女。擲果愛僊郎。西浦千層雪。長干一地霜。桃花人不  
見。桃浪渺茫茫。

其三

朝對平沙雪。暮看遠浦霞。鹿頭懸几席。帆角打琵琶。笑語雜橋燕。風濤灑砌花。同鄉如借  
問。但道不歸家。

其四

春色在斜陽。凭欄闌晚粧。縈沙江霧重。掃岸水風涼。見舫知來客。聞音辨遠鄉。不通三摺

語難採九衢香。(長安語有三衢語)

### 朝耕

荷鋤出茅屋。月色白如素。過林滴雨聲。一天好霧露。東方猶未光。燦燦動霞路。不覺叱牛聲。驚起雙白鷺。

### 其二

半夜來原田。月落天將曉。溪流涓涓鳴。今年雨水好。前種已生苗。萬事毋如早。解軛喚大兒。牽牛食露草。

### 秋日校射

淺草雪沙洲。蕭蕭萬里秋。弮弓白玉靶。寶馬赤茸鞦。天迥披雲淨。江澄抱月流。如猿空有臂。何日取封侯。

### 西郊別業

枕江一片地。卽此足幽栖。楓攢智者社。柳覆孟公堤。山好登臺見。林深去路迷。宦婚如可謝。端坐老城西。

### 其二

城西聊卜築。幽意絕羈塵。寺近僧同飯。村荒虎傍人。浣花輕雨淨。點水幻霞新。不遠前溪路。扁舟學釣綸。

其三

疎柳剩煙霧。高松帶薜蘿。白沙晉代寺。青草漢朝河。雲影圓菰米。風香冷敗荷。蒼山前日是。衰髮後來多。

醉臥野舍朝歸

林外馬蹄疾。林邊鳥語閒。晨風霜裏樹。初日霧中山。了自無愁况。猶然有醉顏。爛紅楓似錦。踏葉扣柴關。

寄彭長卿蜀人家荆而寓鄂

故人一別隔瀟湘。楚水連天路渺茫。寄語長卿休墮淚。荊州原不是家鄉。

別洪生

洪生鬢髮旬且七。柱還千里如咫尺。幾回言歸却不歸。今朝愁死回鄉邑。瀟湘之水何浩浩。春潮夜雨潯陽道。人生奔波幾時休。送君江上令人老。

龔散木舅謝諸生歸隱贈

黃鸝唱罷慘無歡。萬事勞人轉覺難。君自愛看高士傳。予今欲溺腐儒冠。朝耕西嶺雲千畝。夜釣南湖月一灘。身似閒鷗心似水。纔離火宅便輕安。

有感

予意非爲俠。胸中不可平。且須憑獨往。那復問橫行。愁來無後日。淚盡是前程。不堪到歲暮。寒鳥叫江城。

其二

分財多自與。叔也知其貧。志遠輕微事。疑來泣古人。潯陽愁李白。易水哭蘇秦。塵土餘生在。摧殘任苦辛。

其三

詹尹今何在。聊與計行藏。幸不填溝壑。予將遠道亡。孤鴻遠積雪。隕籀帶嚴霜。但有傭春地。那愁道里長。

春遊曲

總以堂堂去。何容緩緩歸。隔溪鶯對語。掠水燕雙飛。野草香沾屐。修篁翠濕衣。山花一樹好。遊女採來稀。

其二

春在畫橋頭。殷紅照碧流。幾迴看去馬。一笑蕩輕舟。夜月梨花夢。春風燕子愁。願爲原上草。歲歲藉芳游。

其三

粧爲阿誰新。新來却避人。笑寧藏便面。約已印輕塵。打鳥穿山曲。尋花傍水津。緋桃飛已盡。今日又重春。

其四

指點層臺事。前人佐酒觴。塵塵無故蹟。歲歲有新粧。綺閣多凡鳥。荒榛出異香。羅敷他自好。不肯嫁君王。

花樓曲

春歸春不歸。春事幾年稀。杜曲梨花謝。雕梁燕子飛。歌愁生畫扇。舞淚染羅衣。數里青門路。人傳錦繡圍。

其二

避客似迷藏。將無是故鄉。龍鬚存舊席。雀尾罷新香。有誓不傳曲。無心更理粧。白頭房老



在灑淚憶君王。

其二

且莫弄琵琶。王孫在北家。秦宮催侍酒。小玉倦傳茶。好謝尊前客。忙移砌上花。買愁不買笑。含淚上香車。

其四

破瓜年幾許。苦欲作羅敷。碧玉何須玉。綠珠不用珠。虛堂塵寶瑟。空帳冷流蘇。明日蕭郎問。兒今已嫁夫。

哭田生

人生不四十。何以歸山麓。生平性溫良。親朋盡一哭。酒杯猶未拭。殘花尙綴木。前書一行字。明明在園竹。山城少韻人。扃戶遂成俗。夜半來扣門。應惟君也獨。從此絕招呼。終日坐兀兀。

其二

昔日與子友。終日共徘徊。今日子爲鬼。半夜怖其來。我豈怖子哉。幽明會難諧。去年在京師。有物撲入懷。以爪塞子鼻。大噓不得開。魍魎攝人魂。子言我心猜。果也青楓根。寂寂殊可哀。

泊繡林

我從湖海賦東征。四月春潮總不平。萬里臨流方浩蕩。雙峯如綉自逢迎。濤來欲裂千年石。山斷發連數尺城。安得輕風生五兩。君山一點漸分明。

繡林阻風遠望

雨中新柳淨江頭。燕子穿花立釣舟。東去湖湘多大澤。春來天地少安流。南平驛路何時盡。北港風烟澗自愁。石壁沉沉收落日。一痕漁火動沙洲。

過洞庭君山

點水一花開。枯清絕點埃。秦皇巡海去。漢武射蛟來。(見水經注)萬頃無消雪。千年不住雷。金堂迷處所。凡骨豈僊才。

泛洞庭

風日今朝麗。依巖一汎流。奇雲生別浦。芳草媚中洲。日月飄零恨。乾坤簸蕩愁。翻思源發處。清淺只勝舟。

夜泊

前途白霧障。游子暮何之。寒士招風雨。勞人諳險夷。吹水沾衣桁。飛沙入酒卮。但留皮骨在。速路豈嫌遲。

阻風登晴川閣予雨度遊此皆以不第歸

苦向白頭浪裏行。青山也識舊書生。相逢誰勝黃江夏。不死差強福正平。天外雲山金口驛。雨中楊柳武昌城。漢濱父老今安在。只合依他隱姓名。

別李龍潭

湖上暫徘徊。明從此地回。今年君不死。十月我還來。娛老書成盡。絕交徑有苔。忘機君已久。鷗鳥莫相猜。

別山風雨得丘長孺書

重食武昌魚。還從漢口居。千峯江上雨。一綆故人書。困極舌空在。柔來指不如。何當同子逝。髡髮事空虛。

其二

近書看不得。讀罷淚雙流。細雨連天暗。西風動地愁。失時離骨肉。多難仗朋儔。五岳行如決。臺生願共遊。

秋夜寄中郎

明月何光潔。蟬嬾挂在戶。百感入帷牀。一夢生毛羽。青山幾萬重。冷冷到石浦。依依中郎

門冉冉分賓主。相見嘻以笑。相論歌且舞。真情出肺肝。高議窮今古。言多不能記。分別尙縷縷。萬事多反覆。三言成市虎。愁極能殺人。爾胡守此土。茫茫八荒間。可以爲戶宇。未亂復哽咽。岐路悵難吐。魂淚公安城。人淚武昌潯。

過孔子問津渡

日初出。山初入。山煙迎旭帶微紅。溪柳含露試新綠。斷橋縱橫山之下。一泓清流細細瀉。古碑依稀雜苔蘚。大書當年問津者。泉水將淚過此津。暗想天涯失意人。西風年年吹路草。鐵馬石驂亦應老。前山黃霧愁殺人。回頭却問山東道。

麻城道中

天雨乍霽雲乍拆。馬首諸山齊獻碧。崢嶸突兀何處峯。淡冶鮮妍可憐色。長途遙遙無止息。北風夜起轉愁疾。馬鈴當當送殘日。烏鴉千點占墳側。我有新愁寫不得。

其二

山骨鱗鱗忽起脊。中間尺餘馬蹄跡。只道山石碎馬蹄。誰知馬蹄能穿石。莫言此石太辛苦。南山石闕北邙土。石深一寸土無數。馬上兒郎方笑語。

長孺齋中有述

丘生爲家何落魄。丘生爲詩好氣骨。建安以上今再見。開元而下不曾讀。五七言律多精巧。絕句長歌古來少。幽燕將帥氣沉雄。深山松柏韻蒼老。高齋日上花拂地。隱几焚香逐字句。磊塊頗露烈士腸。步驟真得古人氣。我于此道久用力。妙處只合唐人迹。不能超乘復漢魏。此技安敢與君敵。看君詩。爲君留。酒行數過寂無聲。牙板忽動發清謳。龍香之撥鳳尾槽。玉串珠走幽泉流。笑謂三郎且飲酒。寂寞身後吾何有。一腔熱血一寸心。雪花寶刀夜夜吼。徒步風塵無用身。羊溲雞鬪馬能走。明日城南大會獵。不識三郎肯從否。

### 重九同丘長孺過李卓吾精舍

每逢佳節思鄉國。今日登臨興惘然。浪蹟乾坤餘鬢髮。西風日夜換山川。三時作客花前淚。萬事灰心醉裏禪。獨喜窮交多意氣。天涯兄弟倍相憐。

### 過沙河作石子歌

河水清。照見石。照見石子如珠玉。晶晶瑩瑩好顏色。水淺淺兮石片片。水底依稀照人面。切莫照人頭上白。世上知心難再得。

### 飲長孺齋中分得無字

明月挂林隅。芳筵酒夜呼。佳詩唐世有。新語晉朝無。世外依禪伯。人中溷酒徒。那能文字

飲明燭待當罇。

得中郎書

業已爲游子。何須問始終。家人已死看。父母未生同。帶雪寒山潔。懸雷夏瀑雄。阮宣遺願在。巢許揖高風。

武昌逢潘景升

散朗如髯幾。愁顏見頓舒。片言成白社。五字宛黃初。楚館閒聽肉。秋江日饌魚。天星樓上好。讀盡古今書。(曲中有天星樓)

感事示人

譚鋒纔起便銷魂。和雨和愁到耳根。青眼變時休道故。黃金散盡少知恩。生來不信多交態。久後方驚類市門。子抱新愁予舊恨。一同流淚對芳尊。

黃鶴樓

水經注謂戴顒遊此。蓋誤以京口之黃鶴爲此也。故末句及之。

積雪滿天地。凭欄竟日留。青山文命廟。芳草正平洲。漢淨穿巖出。江雄撼郭流。蟻蜂南北市。鳧鴈往來舟。黃鶴名相似。丹徒跡可求。如何注水牒。訛作戴公遊。



# 送王生歸荊州

嗟呼王生。與子同來不同歸。漢水湯湯日夜悲。飲子酒。攬子衣。江上浩歌淚歎歎。子好酒色不顧家。一縣盡笑其所爲。丈夫從之妻兒疑。子弟從之父兄咎。我于子行爲中表。念子飄零知者少。就髻雄譚頗不凡。使酒罵坐亦自好。季子方貧少黃金。練裙空有故人心。留得一片交情在。交到白頭應不改。去年我有不平事。儒生相看盡相棄。髻向酒間出大言。言雖轟疎好意氣。我聞此言雙淚下。顛狂合受衆人罵。不信慷慨悲歌人。乃在椎埋屠狗者。坐是相愛不能忘。時時結伴酒人場。如花少女紛相戲。日日花前共買醉。叱撥鳴鞭白日原。巨羅傳呼芳草地。子于衆中多酒失。我常憐之爲護恤。明知亦是尋常人。止因一語成相識。今年我向荊州市。市上春花照春水。攜子三月苦留連。只在荊州花市眠。男兒生不成名胡不樂。絕似冠蓋遊宛洛。誰言花市無酒錢。日暮還典金跳脫。章華臺畔草生煙。枇杷門外花飛幕。白晝橫行誰敢問。鄱陽暴虐酒中作。千秋亭下惱癡人。侍側之豪心胆落。不歸偕至鄂州城。窮愁病苦一時生。往返西陵三四月。命薄處處少人悅。我今遂學黃鶴飛。秋云暮矣憺忘歸。更欲攜子千里遊。無錢難以苦相留。武昌十月初一日。送子江頭翻掩泣。荆山荆水望無極。秋原秋日少顏色。嗟呼王生送子歸。餼有食。寒有衣。閒但覓酒伴。莫畏衆人譏。衆人譏子無他醜。不過爲百畝之田不能守。我

亦爲子熟思之。萬事變遷理亦有。君不見。金谷園。定昆池。當時豪華無與比。今日紅塵空爾爲。金錢如山不食亡。令人却笑黃頭郎。萬事悠悠同逝水。漢寢唐基亦如此。創家老翁爲子孫。布衣脫粟憔悴死。人生百年如過客。彈指已見頭早白。但得常常剩酒錢。身世何用苦悽迫。吾家中郎頗好事。杯酒不飲喜人醉。西歸子有酒主人。東行我向何處置。

贈人

白浪白于馬。輕舟過漢濱。花香薰几案。山果中冠巾。忍受王孫飯。聊爲易水貧。君看羊叔子。不是昧心人。

李坪遇郝生

似隨南適鴈。哀唳到瀟湘。坐我舟中榻。拭君衣上霜。詩思渾李洞。禪語效支郎。且拂尊前淚。西陵是故鄉。

過赤壁

浩浩長江接遠空。帆飛猶自飽東風。吳山魏水原堪恨。况是今朝煙雨中。

其二

半生寥落暗悲傷。百病相侵守一牀。事業于今那敢問。只祈年壽勝周郎。

泊黃州

落盡郊花青女怒。雲脚粘江迷往路。何人共對雪堂尊。無處更覓柯丘樹。栖霞樓畔北風惡。濤聲和雨中宵作。客子聞之已不眠。病夫僵臥何曾着。斷鴈一聲霜共墮。此時愁人披衣坐。泛泛一葦有何歡。五兩呻吟相唱和。自古江山似女兒。才人傅粉與書眉。安黃貼翠須好手。瘦瘠也作妖韶姬。頑石枯葦復何相。止有煙江無疊嶂。當時但誦和仲文。只疑此地如天上。

潯陽琵琶亭賦

寒江欲雪先無色。起視廬阜如聚墨。九疊樓前九點山。令人可望不可卽。白馬素車慘不張。麻姑書信斷潯陽。飄飄一葦復何適。踟躕且向江頭立。江頭忽見破亭子。西風淅淅愁崩圮。古瓦鱗次亂水衣。白日狐兔同棲止。石碑剝落衰草地。遺蹟不知何年記。題名半已蝕塵埃。依稀認得琵琶字。鐵撥鷗絃隨淚瀉。三載飄零老司馬。豈云昵昵兒女懷。多才固是多情者。龍尾道中行路難。虎溪橋上看巘岈。一片雄心銷不盡。流泉聲裏坐燒丹。冶情苦向覺前送。陳根忽遇春風動。笑去顰來總是真。疆作男兒亦何用。傳說龍門有故墳。遊人澆酒氣成雲。物換星移風雅盡。亭上何人更酌君。江上風生撼古樹。日暮客子自來去。潯陽渡口那得留。乃是愁人今古斷魂處。不獨司馬泣江水。當年李白亦如此。古往今來如轉轂。豪士遞來此地哭。我亦飄零

困遠遊。忍貧忍病到江州。江州無主走碌碌。囊無一錢餘病骨。伶仃楚痛寫不得。獨向廬山看山碧。不及蝦蟆陵下女。江頭猶有新相識。

江行同丘長孺并示無念

天涯兄弟共行舟。病子呻吟日未休。我自多虞甘薄命。如何酷令兩人愁。

其一

一身痛苦不堪愁。孱僕哀呼夜未休。爾我相關如手足。五更聽雨淚雙流。

其二

病骨初甦暖氣微。薄衾如紙曉霜肥。朦朦旭日人猶臥。夢裏驚傳黃石磯。

李陽看月有所思

李陽月。漸漸明。明月依依送我行。昨日冷冷東流雪。今夜却向李陽白。李陽驛邊蘆荻洲。估客凄其坐船頭。吳歌子夜伴月明。誰人不動故園情。故園畫閣月明裏。瑣窗前面清如水。檢罷刀尺拜團欒。深深拜月祝平安。那識長干月不同。是處多霜還多風。豈惟病苦無消息。九月寒衣不寄得。四顧李陽白一片。江樹茫茫江煙斷。軋鴉猶有上去船。嘹唳忽見南來鴈。憶昔看月何翩翩。結伴三河俠少年。吳歌楚舞酣中夜。不到烏啼不肯眠。今日淒涼餘短髮。響來俠氣

幾曾發。李陽江上月一輪。獨向舟中照病骨。病骨如柴不可支。今宵對月漫成悲。早知看花身  
成病。踏月何用訪雪兒。

曉行

蕭蕭帶霜征。煙開岸漸明。病人親曉日。客子愛多晴。遠樹橫江過。亂帆貼水行。下灘風漸  
好。轉盼失山城。

江行

夢絲夢不斷。欹枕看晴川。霧露帆檣濕。雲霞草木鮮。水生漁子笑。風到榜人僊。楊柳誰家  
舍。依山種稻田。

江上示長孺

萬里滄江一葉舟。歷盡楚尾與吳頭。八分山下八分院。九疊峯前九疊樓。水上煙櫂鏡裏  
眉。因餐秀色愛舟遲。青山乍喜逢尤物。男子猶欣遇大兒。大兒生計何其拙。苦吟只對寒江雪。  
愛作煙雲顧虎頭。山經水牒搜遺缺。世事悠悠無假真。爲語丘遲休苦辛。君看古來布衣士。生  
前得名有幾人。往往衣食無所託。饑寒輻輳終其身。羅友陶潛豈不奇。嚮日倚門作乞兒。數百  
年間骨已朽。新詩始落詞人口。身後虛名有何益。不如生前一盃酒。文章得失出寸心。天下後

世幾知音。獨餘匠心得意處。自歌自舞淚沾襟。丘郎于今極貧賤。縱有新詩人不見。詩成只合付名山。百年應得布人間。

遊牛首山

石欄竹藥劇崢嶸。樓閣巖泉不記名。西竺幾年人共至。南唐今日樹長生。天邊落照千重暈。霧裏長江一線明。徒倚罡風渾不住。枯松老柏滿山聲。

同丘長孺登雨花臺

登高臺。大荒顧。天邊江白如橫素。金陵城內萬人家。金陵城外好松樹。江上氣連山上雲。城中煙接城外霧。分明望見南門道。高箱寶馬塵浩浩。一代復一代。城郭人民改。三吳風流已不存。六朝花草今何在。星移物換空惆悵。彈指已成百年上。瓦官寺裏支道林。石頭城上王丞相。丞相亡。支公死。江左風情東逝水。華屋山丘幾千年。有無踪蹟暮生煙。煙草連縣又一時。雨花臺上漫成悲。君看二百年來事。也自今古堪垂淚。鳳闕龍陵遙相對。霓旌樹旆紛紛隊。金粟幾年見龍媒。橋山何處尋劍佩。石門鬱鬱刻佳城。可是前朝威里墳。金脫玉壺都向夜。銅麟石馬獨饒雲。富貴豪華皆黃土。坐使荒臺閱今古。臺北笙歌臺南哭。人生哀樂如轉轂。縱使千年能幾何。虛名虛利空奔波。不登雨花臺。不知行樂好。生不行樂求富貴。試看雨花臺上冬來草。



歌止此莫太哀。荒城日落風吹灰。與君急尋桃葉渡。今夜好傾三百杯。

拙藁呈馮開之并系以詩

鈴索聲聞學士廬。有人彈鋏不爲魚。實言門下新知我。願出山中舊著書。海內久推臯甫。謫近臣誰薦馬相如。斯文佳惡休辭訂。早晚知君髮已疎。

攜酒登清涼臺

醉死便埋我。江山足萬年。飛雲環衆嶺。如月亘長川。大冶歸西日。繁鱗入夜天。金陵千億戶。俯看一區煙。

贈別謝五

旅食金陵歲已殘。水枯桃葉驗天寒。同爲浪子予尤遠。都是窮途爾更難。世路錢刀欺短。酒人日月付長干。如何相識輕相別。不共橫塘泛木蘭。

呂城

落葉滿天地。居然歲暮心。小河舟聚集。曉雨市昏沉。抖擻勞文字。盤旋付枕衾。不晴亦不雪。何苦只陰陰。

登虎丘戲爲歌行變體示長孺

登山門忽見一方積雪封三尺。乃是生公說法之古石。古石如雪又如素。中間突出無枝樹。兩山巖開名劍泉。深碧應有蛟龍眠。風之來兮何浩浩。登山望見吳門道。吳門女兒字莫愁。牽予同醉樓上雨。勸我酒爲我歌。歌曰。年命兮不再走。犬長洲兮安在。宛其死矣復誰知。白虎來踞安用之。歌既終日西傾。姑蘇城西暮霞生。照見千林與萬林。爛爛皆如火樹明。我醉臨風一長嘯。吳水吳山發大叫。誰是夫差臺。爲我澆一杯。人生歡樂能幾年。麋鹿來遊亦偶然。白頭老翁弄濤如弄雪。誰識江山近來不屬越。萬事悠悠如陳土。空令閑人笑今古。但使一見西施好顏色。破國亡家亦消得。酒泛瀾兮沾衣。我今醉矣憺忘歸。歲既晏兮孰華。予登山臨水令人悲。亂曰。雀癡必魴何爲。彼領下者逝而逝而。

由吳入越舟中無營偶思吳中名人信筆爲頌爲泰伯季札伍員要離梁鴻

古公貪天下。泰伯乃出奔。寂寞文身地。隱逸自生存。今古惟勢利。安知父子恩。聖賢已如此。流俗何足論。

其二

吾愛吳季子。丰骨何僂僂。南面稱王位。視之獨夷然。拂衣大笑去。歸耕原上田。桂以香自

焚膏以明自煎。富貴豈不樂。針氈安可眠。太上固有經。後身而身先。無以身爲者。其身乃能全。衆人先其身。尊貴娛歲年。風起塵忽飛。殺身不可延。棲枝餘茂樹。滿腹剩長川。一丘足自適。餘皆可棄捐。安與危相伏。利與害相連。寄言董燎子。性命那得堅。

其二

伍員出昭關。吹簫向吳地。隱忍圖報讎。頗有丈夫氣。知子莫若父。太傅亦何智。剛毅而忍。詢斷盡終身事。

其四

閻閻得吳國。乃爲王子災。要離慷慨士。不惜身命摧。知己固不易。妻子良可哀。一家親骨肉。眼見化成灰。白日照吳原。陰風自東來。提劍出門去。去去莫徘徊。馮不顧身世。豈復問泉臺。男兒一片心。舉世盡疑猜。倘有知心人。性命如塵埃。我有一口劍。鞘之不曾開。芙蓉好花鐔。年年任沉埋。孰是相知者。寇讎安在哉。以此區區身。捨之爲君裁。

其五

志士求知心。栖栖到白首。福如梁伯鸞。今古爲稀有。可憐舉案人。卽是金石友。同心而同居。高賢兩相守。富貴等鴻毛。功名不挂口。漂泊隨遠遊。全生甘卑詬。人生得此婦。終不厭奇醜。

湖上

委練重橋接。煙雲畫不成。交光惟剌影。互答有泉聲。木落驚峯瘦。花稀愛水清。山川與黛粉。尤物總關情。

其二

寒鏡誰拋得。相攜共泛槎。水中涎燕尾。簾裏織桃花。鴈齒危梁次。裙腰大道斜。蘇公堤更好。古澹勝繁華。

其三

曲曲皆含雪。峯峯盡吐蓮。龍蛇同寶地。纓足共珠泉。女隊皆疑俠。游裝也效禪。湖心梵唄響。知是放生船。

其四

雙峯餘落照。游侶織如梭。人去存香草。舟來換綺波。馴魚常遶楫。熟鳥不歸柯。每遇歌聲動。頻頻喚奈何。

紀夢

前途黯黯不知何處。黑水洋洋無筏可去。上不見天下不見地。猛犬狺狺當道迎吠。四望

無人復尋故路。依依故鄉。黑黑松樹。登堂不聞聲。入帷不見人。草茂茂兮滿庭。風蕭蕭兮四生。有耶無耶心驚。入不親兮出不明。再再兮迷其處所。魂之歸兮汗如雨。

其二

歲云暮矣。我心憂苦。長年作客。田園荒蕪。百口伊何。不飽饑粥。顛頤滿室。生死莫卜。日月何逾。悲哉淹留。愁來不絕。如絲之抽。歸不可得。病不可瘳。拔劍砍柱。泣泗橫流。

病中

何意春初病。糾纏直到今。痛來霜割骨。鬱極火焚心。攬鏡龍鍾貌。支牀劍戟林。終宵眠不得。人亦厭呻吟。

其二

白日忽西駛。凍雲自北來。江湖合雨雪。海氣瘴樓臺。半載窮天盡。孤帆逐臘回。如何行路苦。豎子更相猜。

其三

追思太不平。辛苦令魂驚。一鬼飄吳越。千山任死生。天涯兒女淚。歲暮父兄情。殘臘耽耽盡。尙留鐵甕城。

深公病大作予亦病夜述示長孺

塔下曉霜侵。窗前鈎月沉。一燈橫直榻。雙臥短長吟。可憐歲已暮。不意病逾深。西去波如雪。南留米似金。

其二

朔風滿天地。與君何所之。健來猶忍耐。老去費支持。夜鼠時窺燭。霜鳥忽亂枝。呻吟寐不得。恨殺漏聲遲。

其三

一居連病榻。只是鬪悲呼。父母正遙遠。如來定有無。黑風吹水立。白浪撼山孤。妬殺秦淮渡。桃根正倚爐。

潯陽阻風

日晚雲加黑。爐寒火不紅。天時客子異。村樹故園同。買酒錢都盡。加衣篋又空。昏昏尋枕簟。人在亂愁中。

景升弧辰日。因攜張瑤光。劉水碧同方。子公郊遊時。微雨憩洪

山寺

斷峯開水面。密樹隱山門。春至風猶勁。朝來雨易昏。文章壽者相。名姓世中尊。况復生如夢。乘時問酒樽。

### 鄂中丘長孺宴客有述

今日天大雨。取醉莫踟躕。飛蓋集衆賓。投車恣奇娛。來者無新故。但坐不相呼。盈盈三五少。的的散芙蕖。目成動嬌靨。顏色一何愉。仰視櫺巾髻。俯看亂衣襦。引滿遞代酬。蟬聯次第徂。杯中無遺瀝。几上少停壺。九光散白火。微喧動坐隅。雨聲若飛濤。歡笑與之俱。悄然若啣枚。側耳聽吳歎。豪哉佳公子。歌喉似飛珠。上場演新曲。國工良不如。形容本妙麗。白面微髭鬚。盤龍金僕姑。進退好規模。四坐俱擊節。諸妓暗嗟吁。縱樂放情意。取適焉知餘。時光難再得。惜費亦何愚。千秋萬歲後。青苔潤頭顱。

### 咄咄

咄咄那堪道。年年白首新。土埋陳寶劍。鳥啄病麒麟。荒日將歸夜。西風未死身。無憂漸達者。欲哭近痴人。

### 下第詠懷

人生能幾何。愁思鬱肺肝。行年二十五。慘無一日歡。生長愛豪華。長劍與危冠。寶馬黃金

勒賓從佩珊瑚時。今竟寂寞。小弟空無官。竄伏蓬蒿內。妻子嘲饑寒。

其二

宿昔愛慷慨。惻然憐窮友。常云我富貴。子不憂百口。所以衆友朋。青雲常矯首。一旦蹶霜蹄。如失左右手。相視皆下淚。予可免愁否。

曉

曉光開野浦。暝日上寒衾。振蓬霜札札。入樹雨淋淋。乍轉陽和氣。微甦慘淡心。遙看松橘里。酷似故山林。

仙桃鎮

奈何愁脈脈。重以雨沉沉。屢來熱地里。不厭笑天心。宿霧魚鹽市。寒霜橘柞林。幸餘脾尙健。對雨酒頻斟。

風雨舟中示李謫星崔晦之時方下第

風雨苦淹留。靜言泣泗流。早知窮欲死。恨不曲如鉤。紅葉遮鄉路。白蘋逗遠舟。噫嚕沙上鷹。得意永無憂。

其二



雲黑暮飛征。霜天慘不明。功名三見逐。事業百無成。永夜彷徨坐。前村慟哭聲。塵沙多苦趣。第是一書生。

其二

詹尹何須問。吾生定陸沉。友朋依傍意。兄弟愛憐心。老矣雲霄事。哀哉鸞鳳音。長宵寐不得。絡緯伴孤吟。

習池

繫馬綠楊枝。倚欄看碧池。水流鳴玉雪。魚戲蕩鬚眉。蘇嶺青當戶。襄江白到籬。山川叢聚處。極與隱人宜。

途逢八舅口占

浩浩煙沙中。馬首忽相遇。如何白面郎。憔悴倏非故。假若不聞聲。泛泛等行路。去矣勿重陳。風塵易老人。

昆陽

猶是南荆部。經旬未出疆。古祠銅馬帝。疎樹伏龍崗。沙起蒸成霧。蓬飛飽帶霜。倒戈奔象兕。大戰憶昆陽。

南陽道中

十里一踟躕。五里一徘徊。嚴霜沾我衣。北風入我懷。昔時宛洛地。冠帶安在哉。側身一望千里見黃埃。

其二

青女忽相薄。嚴霜代白露。淒風自北來。吹沙作煙霧。嗟哉遊蕩兒。四時長道路。徒令鄧仲華。嗔嗔笑遲暮。

黃河聞鴈

北風冷冷吹幽谷。白雪如山寒相逐。衝煙帶月路萬千。影落黃河第幾曲。勸君莫復往南國。網羅耽耽在爾側。北地雖寒暫栖遲。坐待陽和三月時。

其二

遠辭故國向他鄉。迢迢結伴到瀟湘。微雲淡月天將曙。嘹唳嚶嚶自成行。行中俱是好兄弟。時來各自異遭際。亦有致身足稻粱。赤沙青草閒遊戲。亦有飄零病苦身。西風忽墮驚弦淚。傷心且莫問前程。結伴投林又一城。廣武山頭雲浩浩。黃河漸窄不聞聲。

夜入燕境

馬上三千里。今朝是北燕。一星初導月。萬柳盡傳煙。玉律吹灰地。金臺索駿年。如何蘇季子。易水泣流澗。

喜傳仲執王幼度至有述

隻身遊長安。寥落稀朋輩。市無擊筑人。屠狗何足愛。天風知我心。吹子至燕塞。好尋桃李蹊。次第訴磊塊。

其一

少小志功名。及時以爲寶。十年不得志。慟哭長安道。子如上春花。我若含霜草。同調不同命。鬱鬱傷懷抱。所恃金石心。盟之以終老。

其二

南山有鳳凰。愛與鸚鵡聚。誰使北山鳥。而來強攀附。嗟予駕下姿。無以追高步。鄂渚有良盟。寘我鴈行數。兄事田先生。弟畜灌仲孺。誼重而恩深。私心良獨懼。悠悠世上人。輕薄等飛絮。貧賤誓笠馬。情同金石固。一旦遠致身。掉臂不相顧。古道今人難。感此淚如雨。茲舉諒不然。勉旃共歲暮。

今夕行贈別繡林張斗槎

今夕是何夕。痛飲桃李蹊。旁若無人者。樂極忽成悲。樂莫樂相知。悲莫悲相離。相見即相離。何似不相知。長安行路難。予亦思苦住。爲貪易州酒。留連不能去。不惜君遂別。惜君歸太遲。迢遞三千里。政是歲暮時。歲暮無不可。青女疇能那。帶雪過梁苑。踏冰渡黃河。明發初獻歲。歸家應上春。繫馬臺邊草。青青迎遠人。明年二三月。予往南求友。君思遊秣陵。可得相逢否。若論客遊道。還是南中好。山水旣清奇。居諸亦易了。作客不厭南。作官不厭北。北方雖苦寒。官高冷亦熱。

長歌送中郎之吳門兼呈江長洲

車匝匝。劍離離。門前馬向南嘶。知將別。慘且悲。昔來雨雪飛。今去柳依依。同來半載不同去。孤踪流落將安之。念我飄零不遇時。出門人人笑狂癡。所以寂寞快心意。因君知我勝自知。可憐同氣復同聲。不似人間俗弟兄。歡笑惟恐不須臾。何況遙遙千里程。春明門外往來道。風起沙飛煙浩浩。金觸玉筋不能御。紅亭碧草苦相惱。閭關御苑囓黃鸝。二月風光倍慘悽。北望雲山含雪色。南去車馬踐花泥。日暖遊絲縈薄霧。露冕時挂廣陵樹。行踪一任東風吹。吹到亭亭車蓋處。遊山船上散花光。艷陽三月到金閭。我昔維舟吳門市。河上嚴霜割清水。肘柳叢生泣病人。楓橋零落悲遊子。虎丘席上賓從盛。予也何人問名姓。當筵忽發令君書。一時坐客皆

欽敬徐家園子赴佳集。笙歌簫管娛華日。盛筵每向石竇開。晝舫忽從竹裏出。半天風雨響瀑布。曲水流觴酣日暮。迅湍跳珠濕荷衣。度曲飛杯紛無數。奇譚密語同臭味。臨歧握手何意氣。雲開星散那可云。寥落雙魚不復寄。君今行行入吳門。人外交契樂難言。郢中白雪何常和。江左清譚今復存。

悶坐

沉沉雞犬喧。冉冉日就暮。據梧未頃刻。百愁倏來聚。不獨起悲哀。時復懷恐懼。人生一時間。忽如草頭露。何故不由新。何新不成故。悲哉好景光。寂寞無佳趣。

其二

依依春明柳。團團如翠蓋。陽春日以化。我愁方未艾。燕中多紅塵。颺起市茫昧。但恐煙沙氣。結轡爲身害。何不發飄風。吹我入吳會。

雲中梅中丞招飲城南精舍醉後登臺有述兼呈羅天池唐仲文

笙簫隱隱下禪堂。五月登高一望鄉。流落喜依嚴節使。逢迎重見蔡中郎。牛羊日暮千家戌。禾黍風薰百戰場。極目平原思校獵。時清何處射天狼。

遊陽和坡

豈是桃源地。灣環仄徑通。泉飛終古雪。樹讓一山風。杏子當筵綠。花枝照水紅。到頭絕去路。四壁倚天中。

登嶽（今祀恆山在真定）

石脂天外削芙蓉。北極居然第一峯。作鎮永留秦朔塞。逃名不受漢登封。前山絮絮雲辭壁。衆壑陰陰雨洗松。呼吸止應通帝座。好投竹杖化飛龍。

其二

縹緲玄宮獨據尊。碧峯如袖正迎門。振衣臺上新陽色。飛石巖邊過雨痕。北去千山侵大漠。平開一壑貯中原。故園修竹何方是。今夜瀟湘入夢魂。

李大將軍宴上聽胡樂有述

長空月色澣冰花。碧眼胡兒吹胡笳。嚶嚶喁喁如嘆息。一時坐客皆流涕。忽出破陣樂一聲。慘如鬼哭陰風生。此樂尋常不敢作。作時戰馬俱哀鳴。胡姬窈窕百餘人。辮髮垂肩若魚鱗。窄袖長衣穩稱身。當筵微笑口含琴。綽約連蜷動嬌音。問關宛轉若私語。忽如流鶯囀春林。繁稚年少好顏色。低頭含情窺坐客。胡女歌。胡婦舞。起看明月侵街午。雙拍應節繞堦行。一拍一

跳最有情。可憐乍陰復乍陽。猛然交頸。鸞鴛離合。遠遞太無那。雙雙藉草盤連臥。舞罷角聲何淒楚。百餘壯士鳴大鼓。鳴大鼓。發清吹。將軍起送金屈卮。明月沉沉忽已落。今夜方知塞上樂。

### 別岳州羅生

愁看碧草映紅亭。馬首青山幾萬層。好似胡天南去鴈。傳君一字到巴陵。

燕中早發黃太史。慎軒陶太史石簣祖于城外席上賦作

北闕上書事已非。秋風匹馬又東歸。春明門外千條柳。幾見官人送布衣。

衛河別宋公時其子有溺水之變

垂楊覆長堤。蟬聲啼不止。可惜掌中珠。一旦赴流水。

### 其二

鴻鴈苦戀羣。送我三千里。我不殺卿兒。卿兒由我死。

### 其三

衛水日夜流。骨肉知何處。草裏一髮掛。灑淚向西去。

嘉祥懷龔惟學母舅

我昔寓京華。狎狂瀾酒徒。世人不我知。惟君獨憐予。陽春二三月。飛絮遍九衢。騎馬穿花市。啣杯過酒罇。浪謔略卑尊。賈財通有無。骨肉固已定。感恩各有殊。夙昔負俊才。論文掃野狐。公安一片地。從此闕荒蕪。後進知風雅。始讀秦漢書。餘波潤親串。雀起耀鄉閭。獨君命偃蹇。儒冠悶頭顱。一掬南歸淚。三千北上途。窮年相奔逐。有如轉轆轤。賦性偏慈仁。慷慨快分疏。一受友朋託。周匝類身圖。偶然意投合。指困仍寄帑。魯肅給公瑾。樓緩泣呂嫗。所以千金家。近來漸空虛。仁者必有後。此言良不渝。如何年半百。青廂望轉孤。耳鳴行陰隲。薄命遭苦荼。未免有情種。能不爲嗟吁。淪落就微官。銅章縮一區。豈有窮猿意。聊以了爲儒。六月風捲沙。揚塵變髭鬚。我出居庸關。君駕燕趙車。匆忙一分手。淚落似連珠。我反過淮泗。君尙淹楚吳。青雀赴順流。何乃太徐徐。此邦民淳朴。事簡足自娛。吏術通仙道。官衙似隱居。勾漏鍊丹砂。葉令飛神鳧。印牀落棗實。廨舍長春蔬。排衙捎雲眼。脫冠坐日晡。整琴授桃葉。寫字付官奴。是處產麒麟。嘉祥名非誣。新有田種玉。佇看鳳將雛。予欲俟高駕。歸心日夜徂。大火旣西流。秋風透征裾。霜團日以密。楓葉日以疎。明月照流水。波文皓漣如。客子隻身遊。前路多憂虞。安得一會面。少使愁腸舒。

月夜黃河

中天一月射黃河。水有清光月有波。歸鳥依枝情漫切。枯魚失水淚偏多。無錢莫問彭城



酒有恨休聽碧玉歌。獨倚牙檣細惆悵。藕花香盡奈秋何。

清河

楓林蕭瑟帶寒煙。入夜鳴榔倍慘然。人逐鴈行投暗浦。舟隨竹箭下青天。飄零綺帳顏如月。羞澀金罇酒似泉。南北東西辛苦盡。不知猶有阿誰憐。

內寄

散如花四飛。疾如水東注。花落有定時。水流無住處。君家婦難爲。難爲復難訴。一旦出門去。去去如脫兔。饑寒與存亡。棄擲不復顧。如彼敝芒鞋。着破棄道路。零落被人譏。勉強支門戶。家無健男兒。百事費置厝。五月王使歸。開緘見尺素。賀君得佳偶。慰勸圖好住。京師盛繁華。遊戲窮日暮。丈夫行胸臆。那復問醜陋。否泰惟君身。何敢恣嫉妬。但恐終不歸。年華從此誤。九月露爲霜。思君冀良晤。古人亦有故。故者毋失故。念妾薄賤姿。無能移高步。兒女漸成人。終日相思慕。

答

蕭蕭秋風暮。凜凜蟋蟀吟。志士無歡顏。行人多苦心。結髮爲夫妻。相愛兩相知。年少逐功名。別子向天涯。悲哉我命薄。迢遰無達時。譬彼秋來草。零落少光輝。含淚出門去。逶迤到京畿。

北走雲中塞。南浮過泗沂。貧窮只一身。千里竟相識。沾頭逢水厄。清淵遭盜賊。忽如鳥傷弓。臨河空悽惻。所喜性命堅。漂零走吳國。新人小冢女。苦欲攀貴德。只喜修容儀。不解將相息。白玉刻橄欖。持贈不堪食。百爾費經營。那能不相憶。因我衣裳穿。憶卿十指尖。因我無中衣。憶卿機上絲。因我瘦入骨。憶卿刀頭肉。留滯非我意。我意願早歸。早晚北風發。輕舟疾于飛。遲則臘月初。定不到明春。但爲備美酒。歸來娛佳賓。

短歌

松樹參天枝特出。老去松毛不遮禿。鶴鶴朝來時一至。踏枝不穩搖雙翅。隨風榆筴響鈴鏗。偶遇楊花一路行。墻下且去看鬪蟻。世間萬事只如此。

看黃道元詩冊有寄

滿把是珠璣。如何不救饑。昔年聞姓字。今日望容輝。遠客能無淚。諸侯孰可依。齋頭玳瑁塵。閒着待君揮。

詠懷

大堤有垂楊。鬱鬱垂新綠。北風一以至。蒼然換故木。四時遞推遷。時光亦何速。人生貴適意。胡乃自局促。歡娛極歡娛。聲色窮情欲。寂寞奇寂寞。被髮入空谷。胡爲逐紅塵。泛泛復碌碌。

其二

隴山有佳木。採之以爲船。隆隆若浮屋。軒窗開兩偏。粉壁團扇潔。繡柱水龍蟠。中設柴木几。書史列其間。茶鑪與酒臼。一一皆精妍。歌童四五人。鼓吹一部全。囊中何所有。絲串十萬錢。已饒清美酒。更辦四時鮮。攜我同心友。發自沙市邊。遇山躡芳屐。逢花開綺筵。廣陵玩瓊華。中冷吸清泉。洞庭七十二。處處盡追攀。興盡方移去。否則復留連。無日不歡宴。如此卒餘年。

其三

遊行山澤間。隱隱見奇光。覘之無所有。一翁踞石梁。炯炯雙眸碧。搖搖兩耳長。見我嫣然笑。贈我一玉卮。啓之得異書。乃是素女方。此方多奇異。返老能強陽。

其四

鬱鬱城南田。榮榮起枯槁。秋死春復中。人命不如草。草死有生時。人死無還期。寂寞歸長夜。魂魄將安之。獨有無生術。可以慰此悲。

其五

大運無終盡。細柳不常灼。金樽盛美酒。鬱鬱胡不樂。以手摸頭顱。隆隆一具骨。暫時屬我身。誰知非我物。轉盼忽如電。微軀戢一木。烏鴉鳴其上。青蛙叫其足。白蟻如白粲。行行相蝕駭。

其六

世道交相喪。忠義遞代出。纍纍矜名子。禍來空嘆息。事機多倚伏。藏身亦何拙。人皆種香蘭。我獨種荆棘。香蘭有人鋤。荆棘老道側。

其七

幻妄呈諸友。沉淪無究期。天人豈不樂。花冠有萎時。理事互圓融。取舍息奔馳。眇然吾喪我。忽若夢所爲。

同顧司馬冲菴虎丘看月兼懷梅開府克生

生公之石一掌平。白淨忽如一方雲。明月出林影墮地。冰上交加苻藻文。四角隱隱歌聲起。清和圓美氣氤氳。蟬聯珠綴無斷時。但恨雙耳難遍聞。紅去紅來渾不住。此地從來無日暮。七尺甃甃揀地鋪。鋪向笙歌鼎沸處。主人有酒百餘瓶。興來飛杯不知數。高人一見眼自明。不在區區新與故。紅林漸疎聲漸靜。燦燦天中分月路。大言小言及諧言。沛若黃河水東注。拔劍翻酒酒汚身。咄哉誰是英雄人。上馬橫槊下馬詩。曹家父子我所欽。只今海內真名士。爾與麻城梅客生。梅也權奇渾不測。司馬膽氣號絕倫。詞賦文章雅亦敵。滾滾千言好筆力。爾曹天下有事時。囊底餘智能了得。梅今尙作韜上鷹。却放司馬入山林。水田瀟灑掛軍持。青山處處訪

名僧泛舟來採太湖色。又向虎丘看明月。虎丘明月天下奇。况是同心好相知。酒寒再熱爲君醉。今夜剛纔半夜時。

### 爛柯山石梁

白馬渡平川。青鞋踏暝煙。霧中認寶塔。葉裏見金田。遮樾松團密。檀欒竹韻傳。心空惟此地。石破是何年。浮屠隆隆起。飛梁冉冉懸。入林凝片月。隔嶺取微天。雲起連環合。風生箭括穿。過山鳥不礙。入鏡樹尤妍。谷解學人語。碑堪供客眠。遙望荷斧者。或恐是神仙。

### 小桃源別蔣蘭居銓部還閩

織草羊腸路。牽衣向此間。許君休哭世。謝傅且還山。脫網遊魚樂。開樊去鳥閒。武夷九曲水。處處好追攀。

### 其二

嘿嘿乾坤意。勞勞可自由。奈何真是寶。不繫以爲舟。雪黑千層雪。灘青百丈流。高堂有慈母。不敢苦淹留。

### 齊雲山

予家大江側。常往江上遊。江中有文石。磊磊忽成洲。形質甚玲瓏。文理甚奇麗。置之水盂

中居然成玩器。身如指頂大。尙足稱奇異。况此萬仞山。峯峯巧相媚。粧施雲霞重。組練波文細。初入桃花源。桃溪水深碧。展誥如撲幘。疑有真人蹟。石破爲天門。炯如一輪月。老樹十餘尋。枝幹藏霜雪。倚巖作石廊。朱欄何縱橫。清泉自天來。撒珠色晶晶。玉屏儼列屏。鐘鼓自天成。絢爛香鑪峯。不傍衆峯生。仰看晴雪巖。石梁皎且瑩。紫雲忽垂天。霞彩燦人睛。不雨漫峯飛。點滴自成聲。三姑誰家女。寶髻何累累。五老皆拱立。一老忽欲語。列嶂難殫述。一一皆妍妙。如馬忽如龍。光潤復奇峭。我來遊齊雲。愛玩不能舍。睹此佳麗迹。却憶相似者。大小不同形。要之等妖冶。細評震旦山。此山實清麗。謝家好女郎。王家佳子弟。濯濯見風韻。有態復有色。米顛若見之。但恨懷袖窄。

舟發吳門夜坐對新月

茂苑千家密。橫塘樹影齊。長橋羣犬吠。深夜小兒啼。颺浪風初定。奔樓月向低。明河迷上下。斜舫易東西。夢草來吳會。滋蘭復楚畦。兩年渾不住。三匝又移棲。

謝生耳伯有虎丘之約

鬱鬱春江柳。青青上客衣。停舟聊一醉。與子敝分飛。騷雅原無命。東南孰可依。虎丘今日飲。望遠當身歸。

寒山寺老僧取祝王諸公眞蹟佐酒有述

一杯了一卷。展玩到宵分。字好挑燈看。名從墮地聞。虎賁懷舊貌。斂脚見奇紋。身自非蕭翼。蘭亭忍賺君。

偶于丹陽逢江進之中郎進之尋古寺治酒相邀并有村童佐

酒席上作

野鳥覆軍持。人來僧未知。夢魂不到處。風雨乍收時。禪榻閑官帽。村歌鬧酒卮。休辭今夕醉。展臂又分離。

江午

讀書忽已倦。冥坐虛無裏。風起舟壓濤。瀆瀆來入耳。一夢入深松。櫓聲復驚起。瞥見兩岸山。淡冶真可喜。楊柳發嫩綠。雨後益娟美。攜有虎丘茶。并饒惠山水。聞香不見色。齒牙風翮翹。此江獲此樂。止有玄眞子。

其一

山色本宜遠。坐來玩山色。水聲却宜近。兩耳聲瑟瑟。淒兒照人面。吳箋瑩于雪。官奴解乞書。遠山能磨墨。何必入法工。一往亦奇絕。興盡拋紙筆。隨意呼太白。風日轉清麗。山色更和悅。

塊然忽已醉。甘臥向枕席。

過蘄州哭王伊輔秀才

精悍猶堪掬。誰謂泉下人。美鬚同謝客。大鼻類陳遵。曾不得二十。無由贖百身。錦心與鐵腕。腸斷已成塵。

其二

祝我何嗟及。斯人不永年。墳深新碧綠。書淺舊丹鉛。遊女悲遺鈿。市兒罵負錢。家亡遊蕩子。父母可能憐。

其三

生有青雲志。何來竟不伸。公車亡主父。易水哭蘇秦。濁浪城邊噴。黃花陌上新。素車與白馬。踟躕大江濱。

其四

筆下渾無敵。癡來也有情。楊雲腸出地。阮籍哭傷生。雨氣寒朝舫。風來響夕城。天亡陸公子。不待著書成。

珂雪齋集卷之一終



珂雪齋詩集 卷之二

詩

小竹林贈別傅叔睿

鹿床深處且從容。吾子風流不易逢。張緒通身如嫩柳。謝郎五字似芙蓉。月來池上花光淨。雨過園林竹露濃。若使前生非大士。如何一見問空宗。

初逢中郎眞州

三十不如意。升沉自此分。窮途誰似我。貧策是依君。桐乳鳴枯葉。鴻聲泣夜雲。休詢別後事。辛苦不堪聞。

其二

龍子拋殘豆。鷓鴣厭故枝。有官君尙棄。失路我何悲。月下詩千首。花前酒一卮。飄零終不恨。同氣足相知。

讀子瞻集書呈中郎

登朝便與禍相粘。塵世功名到底甜。直到海南天盡處。桄榔樹下憶陶潛。

遊棲霞同中郎及景升長孺中夫

寶地層層勝。遊人個個閑。金杯穿曲水。檀板響空山。松老添霜甲。石癯綴錦斑。朝躋與暮宿。彈指也開顏。

述別爲吾友丘長孺

哀哀一孤鴻。飛急向東逝。傷哉金石交。三載乃相遇。相遇能幾何。一見不復覩。子尚滯西陵。我遂往鑾江。鑾江不忍別。復有攝山行。攝山不忍別。逐子至冶城。冶城不忍別。十日淹江頭。飲子清冷酒。臥子木蘭舟。酸心一夜風。舉目三千路。別矣可奈何。含淚入城去。

幻影閣爲崔才人賦

亭亭一株樹。幹老葉何媚。數風條來搖。好鳥時一至。君家高閣排雲路。如何閣上種松樹。細看似是名人筆。蒼老逾勁好骨力。近代恐無此好手。逼而視之尋款識。乃是君家一方壁。瑩淨光滑作雪色。上有樹影紛若織。以暗取之乃可得。嗚呼天地大矣誰能測。

懷潘景升

十里江頭罷遊冶。裹足長吟曙窗下。終日望君君不來。一夜江風捲白馬。黃鶴磯頭寡鶴

淚。新鶯閣畔新鶯醉。未必重爲燕子樓。莫是錢刀巧相避。紅絲赤仄吐青雲。黯淡指下龍蛇字。  
安得仙人子母丹。賚君結客與遊戲。黑雲匝地江水濁。相別依稀又晦朔。分明望見走長干。天  
風吹毳挂巾角。

贈別梅子馬督木北上

名士安卑官。居然有狂意。入甲豈非龍。何必垂天翅。祝融不受職。朝廷多災異。我上球時  
策。官不錄一字。書生徒苦心。報國恨無地。今爾督木來。勾當公家事。奔走莫云勞。小大皆朝吏。  
十月菜黃灣。相牽同一醉。官散束縛輕。何妨入酒肆。一傾三百杯。陶然臥鱸次。萬里從茲行。天  
風捲雪至。

戲贈善印章程生從軍

程生入門微啓齒。洞石金刀響袖裏。往往開石如開泥。有時飲酒如飲水。修幹大耳面如  
盤。初逢不信是寒士。飛雪入眼風剝皮。謾謾忙忙走城市。方子貧困已依人。生來却有依方子。  
自言少年頗豪邁。氣力一身五石大。三尺寶刀一丈矛。走馬彎弓事事會。眼見東南苦爭戰。身  
抱毒策無人薦。屠龍之技不忍埋。北去從軍趨海甸。一自倭奴肆無狀。玩弄中朝股掌上。何人  
解恥越甲鳴。君思萬里親乘障。從來布衣有奇才。不必區區將與相。近讀塘報我漸張。斬首百

級賊膽喪。天子親頒內府金。二十餘萬給邊將。賞罰得宜士赳赳。坐見海上平。小醜男兒何處覓。封侯乘時急取關白首。

再別袁中夫

長日耽歡賞。分離忽在今。冷風吹日淡。苦霧瘴山深。乾笑悽于哭。牽衣口共瘖。蕭蕭同病意。河上有哀音。

別蘊璞往通州訪司馬顧公

竿木從茲去。迢迢雲水深。曉霜滑石路。積雪隱珠林。八法驚神手。五言見苦心。海門雖寂寞。是處有知音。

哀殤詩

絲髮猶纏篋。金錢宛繫衣。命隨渠略盡。魂逐葬華飛。瑟瑟風如剪。沉沉日不輝。縣西一尺土。零落竟誰依。(渠略即朝生也)

其二

終朝懷抱物。失去也堪哀。書臂珠三字。繫裙玦一枚。乳唇何日動。星眼幾時開。想得投胎日。原爲索淚來。

寄梅開府衡湘兼呈宏甫先生

中丞膽略世無二。單騎曾監西寧事。劍戟林中吐笑言。賊虜雙膝自到地。身是天朝鎮鎗臣。不重太守重書生。中郎倒屣迎王粲。北海忘年拜禰衡。烽絕塵銷胡漢歡。五月榴花照馬鞍。是日幕府宴上客。邊廷父老路傍看。玉河娟娟數行柳。怪蟒纏衣親送酒。兜甲鱗鱗耀日光。偏裨材官繞前後。公子席前禮法卑。侯生座上形容醜。錦袍紅氍大樹下。珠弓羽箭獵平野。半天雪影墜雙鴻。一簇紅雲走萬馬。醉後一揖城南曲。我向長安載碧玉。渭水一泓沸於湯。黃河千里飛如瀑。青衫典盡赤仄差。十月邗溝一痛哭。館娃宮前草樹青。燕子磯頭暮雨生。江潮送我至滄浦。水冷沙寒聞雁聲。盤渦吼怒江門水。却向三徑拾梧子。明月如珠不肯收。重乘一舸向揚州。秋風冷冷颯衰鬢。鳳凰失羽麒麟病。手中白酒失朝昏。杖底青山無遠近。窮來最感故人恩。夢中時發邊城信。北望代雲忽如蓋。青牛聞已出關外。自古英雄急相知。投老爲君走邊塞。杜陵狂夫老更狂。推餘嚴武能相愛。中郎匹馬走京國。我欲偕行過塞北。三遊西湖不及春。却坐湖上候花色。收淚遠寄雲中書。白雪欲來天乍黑。

廣陵道中晚行

間一熟林色。猶然識井煙。犬聲喧暗樹。雁陣落荒田。撥火譚生事。投瓊得酒錢。夜深開客

語起視月澄川。

閑遊同中郎時在廣陵渡口

藥雨淋淋暗送秋。雁行飄泊又邗溝。一雙皂帽穿花市。無數黃柑耀酒樓。落日雲霞江左樹。晚風簫鼓北來舟。朱簾處處藏鶯燕。未審何人是莫愁。

黃鶯部新攜廣陵姬北上

東方千騎有輝光。六轉踟躕淮海陽。身逐彩雲秦玉女。手持赤管漢仙郎。飛花遠曠三珠樹。螺墨初陳九子祥。畫鷁雙雙從此去。黃河渭水也生香。

江長洲見訪寶林寺有述

諸侯孰可依。明公雅相敬。辛苦走吳門。青女實爲政。肅肅霜風寒。冷冷冰力勁。策杖息珠楸。六鑿暫清淨。藤陰雪尙疑。果落鳥乍競。之子枉高駕。溫玉森相映。屈指相逢期。歲月已五更。我猶楚諸生。君猶長洲令。電光日月華。蟬翼文章命。鬱鬱復何爲。惟酒可怡性。

王百穀招飲卽席贈

俗裏爲僧舍。城心作隱居。樹晴多戲鳥。冰泮有遊魚。安石情常在。何公肉漸除。自知非賦客。不敢問藏書。

寶林寺歲暮二首

同雲冉冉歲將徂。寒影蕭條落五湖。白髮老親傷蕩子。紅顏少女怨狂夫。衝風入室燈時滅。啼鳥還巢客倍孤。椒酒幸盤誰與辦。霜蔬聊且付僧廚。

其二

烏藤寂寞寄祇林。歲月催人客恨深。再別不收雙淚盡。三旬初到二毛侵。凍雲猶自含殘雪。微日那能破積陰。住世參禪無一了。夜來愁聽海潮音。

其三

姑蘇舊是少年場。此地僧貧寺久荒。野鳥乍來翻定水。蒼苔直欲上禪床。且將白骨消塵習。未有黃金飾鬧裝。兩雨風風催歲暮。愁來獨自伴支郎。

別慧卿

終日怕言別。牽衣忽此時。紅顏傷患難。清淚盡分離。玉釧沾名酒。羅巾覓贈詩。鳳凰橋上柳。欲折不成枝。

送中郎入都中

十年不得意。常覺天地窄。往往困極時。依君卽奇策。行爲修八行。居爲治一石。錢刀稍有

餘。任意取無惜。一草一露滋。萬物無終厄。令我若無君。誰與收魂魄。本擬逐君行。雅語消辰夕。楊子百尺波。飄飄寄一宅。南倭方有警。緩急要籌畫。買姬復買居。且作廣陵客。長安塵汚人。吾已寥疇昔。微雨洗垂楊。青青漸廣陌。黃河沸如湯。渭水一片白。萬里從茲分。含淚看挂席。

豔歌

七香車甫臨。九子蒲新織。秋波有時注。羅帷忽自匿。侵鬢眉常鬢。破粉淚初拭。貧家無粧束。天然少雕飾。三十復何求。攜去北山北。鸞臺可扶杖。遠山可磨墨。不能效胡叟。焉敢望章陟。若比陶徵士。好酒微兼色。細觀閒情賦。此趣亦應識。織手捧鑿落。終身窮亦得。

送汪生攜家謁寶應之元君廟

河橋垂嫩柳。微雨浣仙舸。夕食清精飯。朝繙赤甲經。篆煙香暗水。錦纜出花汀。霓曲何當譜。侍兒仔細聽。

侯師之席上同謝在杭諸公分韻得草字分體得七言古

兩日不踏三徑草。苦愛君家流水好。不知何以饒酒錢。買酒烹葵共傾倒。客子顛狂不類賓。主人調笑渾忘老。席前雙屐走康侯。衆裏一呼驚彥道。相期醉舞與狂吟。肯負暈檀并齒皓。銀甲聲殘仍促歌。金羊銷盡還嫌蚤。置驛投車亦有人。所欽未必在文藻。百罰深杯我不辭。此



翁坦率好懷抱。棟花風盡豔事稀。多恐春光不易保。君不見真州城北桃千樹。前日紅酣今漸少。如何不飲愁天曉。

春日同侯師之詹淑正遊天寧寺便飲師之水閣卽席賦

珠林閒共往。草閣笑相迎。江北無雙士。春來第一晴。飛花粘石榻。舞蝶憩楸枰。日暮不歸去。貪聽流水聲。

贈詹淑正

霜毛蟬結照綸巾。楚楚行遊江水濱。書法半傳諸弟子。老來常哭舊恩人。衆中郢曲聲誰和。酒後虞初話有神。堤柳似眉潮似雪。與君爛醉廣陵春。

侯師之邀飲玉蘭樹下醉往城西看桃

豈宜不醉見春殘。况有名園可共歡。忽見雪花如掌大。似催卮酒向唇乾。衝霄只覺雲頭黑。照夜還同月色寒。此地濯魂仍不住。桃花如錦又同看。

張子邀酒江上草堂

青山如黛水痕明。芳草油油帶笑迎。微雨數番清廣陌。桃花一夜爛春城。香蔬綠甲河豚麵。蚤韭銀絲蛤蜊羹。日暮移尊沙上坐。醉看江左放新晴。(綱讀利)

再過師之水閣

閒來日日共盤桓。草閣留賓未整冠。流水也應熟面貌。清談不用費杯盤。檻花堤柳催春事。微雨輕風作夜寒。嘆我飄零君又老。相逢莫惜酒卮乾。

寒食郊遊

白楊風起四郊寒。青草黃沙蓋綺紈。似此有人呼不應。奈何得酒勸難乾。數騎寶馬嘶香霧。一簇紅衫下遠巒。古柏亭亭堪避雨。莫因潑火斷餘歡。

謝在杭司理以改郡寓真州予訪之旅齋有贈

從來妬女器紅粧。且束賢冠寄遠鄉。少食東方愁粟米。無家蘇子息桄榔。齋領甲石屯雲霧。壁上殘碑見漢唐。却笑當年蕭少府。盡除花草種衰楊。

戲贈詹生入道

朝花晞露燭殘膏。頭上濃霜染二毛。何胤暮年擬斷肉。沈郎老去識分桃。書來蠶尾多禪偈。銘却魚腸作戒刀。時起蒲團滅往事。掀髯猶帶舊塵豪。

雨坐天寧寺時將同卓吾子遊秣陵以雨不果

照泥星出濕頻頻。早夏蕭條似早春。牛首燕磯將戒路。雨師風伯漫清塵。石欄澆澆流花

淚。槐。森。森。護。鳥。身。窗。下。一。篇。閑。自。讀。喜。君。年。老。有。精。神。

### 永興寺看竹

芳園十畝傍山池。翠竹千竿護短籬。莫以青鞋踏嫩笋。且將白袷掛低枝。雲稍曳玉風來處。節粉生香籜破時。不見此君今已久。山僧休訝出林遲。

### 棲霞

遙望山容翠可親。閑雲應得似閒身。溪聲鳥語如迎客。竹影松陰乍冷人。雀尾旋薰衣上汗。乳泉新洗胃中塵。科頭散髮從疎放。此地由來無主賓。

### 同袁中夫蒼麓無學遊中峰澗道上

伊蒲飯罷好登臨。竹氣花煙晝也陰。松子墮來風謾謾。鶉鳩啼處雨淋淋。遙看怪石心先往。久坐長橋話漸深。莫倚身輕先度嶺。沿途細細有泉音。

### 棲霞別袁中夫

嘉穀苗寒原。飛霜折其穎。志士不遇時。遭茲世路梗。羊腸在戶庭。久矣心忘郢。流落萬山中。日暮伴修嶺。我來如兄弟。我去惟形影。憂若能傷人。吾子年不永。

### 其二

夕來丈室眠。朝逐伊蒲食。宛似苦行僧。戒忍絕聲色。吾欲勸子藏。高才可華國。吾欲勸子出。命途多阨塞。吾不能策吾。奇謀安可得。

其二

窈窕巖壑奇。沉鬱雲林盛。大火欲流金。山中獨清淨。山上松有濤。山下泉有韻。澄波朱魚遊。綠樹黃鸝映。梵音可當歌。佛語以調性。展轉爲子謀。此地且遊泳。

同臧願渚謝在杭秦京避暑天寧寺樹下

除却閑行百事慵。小童日抱一枰從。乍看密樹疑深嶂。偶度危橋得好峯。池水紋生涼瑟瑟。火雲樹起幻重重。經聲響處尋開士。曲徑無人竹影濃。

其一

槐陰竹影亂禪床。彈指颼風滿院涼。亂石生雲迷海岸。疾雷驅雨過江鄉。奇峯忽散天如拭。晚日重來樹有光。乘興共移池上酌。藕花泣露散幽香。

同謝在杭李季宣避暑何氏水亭分韻得何字三字

青槐覆素波。蟬聲不厭多。石肌寒小簟。水氣淨新荷。且向溪邊醉。同聽樹下歌。脫風來細細。鈎影漾微娥。

其二

散髮芳池上。薰風至自南。幾人知縱飲。何樂勝清譚。蓮色紅侵閣。槐陰綠滿潭。月來涼更好。深夜任沈酣。

偶過侯師之園中逢唐君平

緩步代乘軒。迷花坐小園。雲生千嶂墨。風到萬人喧。客久多新識。交深許放言。竹中纔欲醉。月已照衡門。

贈別詹淑正之晉陵赴吳采于之約

我向真州作酒客。日與詹生傾一石。有時大叫復狂吟。醉中往往說夙昔。當時長安好意氣。袁絲爲兄灌夫弟。飛蓋乍隨墨士場。鳴鞭又指金吾第。天堦明月淨如拭。一人豪歌千人嘿。飛龍麋馬借來騎。五陵年少看顏色。大篆小篆信手塗。一磔一波好筆力。白璧黃金取次來。緩急猶能捐赤文。塵飛颺起龍風流。狺狺狂犬令人愁。四明狂客還故丘。身亦拂衣出帝州。楚水吳山作浪遊。芙蓉爲帶女蘿裙。贏得身閒似野雲。金管旣邀新賦客。玉魚重送故將軍。肝膽空自向人盡。眼前寂寞平原君。花溪鹿床傍江村。寒潮日夜打柴門。市人不重宜官祔。衫上月餘無酒痕。一字尋丈千字亦。維揚賈子見不懌。婚嫁旣逼少烏羊。舉頭問我我無策。晉陵吳郎吳

季札舊日與君稱莫逆。好客滿堂獨憐君。排山轉海應無惜。有髯如戟聲如鐘。看來未必常困阨。江水茫茫雲頭黑。我欲挽留留不得。見君故人早言旋。馬首遙遙予將北。

夜泊

千里愁空闊。一尊破寂寥。山城同小嶼。秋水在層霄。未雨雲先濕。微風樹也搖。流波照醉影。雙頰湧紅潮。

失婢

驚波千里路。渺渺一行舟。無處尋如願。何人伴莫愁。琵琶絃任斷。鸚鵡語頻求。未受泥中怒。胡爲不我留。(如願即婢)

泊清河懷真州諸丈

碧天無際夜沉沉。三戶寒煙水沒林。纖月有情窺獨影。流波如語伴孤吟。淮南木落人皆散。河上風高秋漸深。欲識相思腸斷處。蘆花洲渚靜閒砧。

清河道中有懷

驚如孤雁淚如波。記得飄零減翠娥。古戍仍懸新皓月。秋風還咽舊黃河。幾幾夜火關刀尺。寂寞香閨罷綺羅。不是頓忘前日約。年來生計太蹉跎。

夜泊

揀沙寒雁弄微喧。蘆葦疎燈辨遠村。河水秋生千渚沒。天風暮起萬帆奔。旋敲石火燃香篆。更買湖菱佐酒樽。獨倚牙檣閑眺望。流波蕩月漸黃昏。

中秋舟中看月

微雨先除道。脚雲漸擁輪。居然同白晝。只是較清新。流水光堪掬。垂楊淨可人。留連不忍別。長夜與相親。

其二

匝地都無翳。停空轉覺明。波寒魚乍躍。樹白鳥時驚。北酒猶能苦。漁歌也自清。久看成慘切。原野盡秋聲。

十六日看月

尙未經城市。先窺客子船。露零知魄冷。雲去愛光鮮。密樹深深黑。流波燦燦燃。中秋雖過了。今夜月纔圓。

彭城

明月照彭城。秋風號大澤。清淚灑黃河。淒淒念往昔。三年如一夢。依然嗟流落。今年算明

年無算不成錯。何以展迴腸。金罇無停酌。

其二

澄空接素波。晴雲亦何綺。浦口樹沉沉。明月從中起。靜夜爇金爐。餘香散流水。

徐州夜泊有懷

難忘飄泊向天涯。清露盈盈滴露華。故國有樓同燕子。野源無地問桃花。微雲點綴迎初月。秋水晶瑩染暮霞。獨立汀洲無一語。只將如意畫寒沙。

臨清逢程生持家書至

一騎沙中至。聞聲是故人。面顏衝赤日。衣袂染黃塵。百苦驚魂路。三秋病肺身。莫辭今夜醉。鞍馬也勞神。

靜海縣道中傷宋二郎是二郎溺處

荒岸鳴蘆葉。敗垣叢老樹。北風吹野原。蕭蕭如歲暮。渭水依然流。垂楊已非故。人生孰無死。子死無墳墓。感此百年哀。傷哉一時誤。不忍見迴波。徘徊向岐路。

其二

寒生古木凋。日暮陰飈發。海水白茫茫。何處收汝骨。遊魂復何歸。隨波常出沒。秋深哭冷



風夜永弔寒月。無方得汝活。淚下流汨汨。

### 重九醉作

泛泛聞波濤。蕭蕭颺原藪。海門屯朔風。渭水無停柳。久酣忘曆日。訊人是重九。傳觴懷兄弟。戲馬思朋友。九後佳節稀。那能不醉酒。何必盛盤殮。蟹匡在吾手。何用繞梁歌。宮商信吾口。陶然成一醉。甘臥直至酉。不知日已沉。醒問天明否。

### 別方子

長安日暮北風起。寒氣中人身似水。北里吹笙西第鍾。總之不到書生耳。莫學師宜寫大字。無人將錢還酒肆。莫將華裾蔽朱門。骨體由來少圓媚。愁貧愁病銷光景。搔首問天天不省。破寺月冷不成眠。獨向寒塔踏瘦影。何止長安行路難。窮來都是摩天嶺。我有良謀欲送君。伐去顛毛學戒忍。

### 同中郎登尊經閣

雀巢樓閣戶長封。簷外霜鱗幾樹松。三市吹沙成霧瘴。九朝積草似山峯。粉粘楮墨留魚蹟。塵揜樽壘見兔踪。不是廣文官獨冷。負暄未許話從容。

### 早起

架上亂抽詩。梳頭不厭遲。訛書如掃葉。酒夢似葶絲。拾火添香篆。分醪潤墨池。長安名利客。鐘動已奔馳。

卽事

只將文字送餘生。興到狂歌繞案行。舊集檢來猶意恨。遠函發去也身轉。孤燈焰冷花難結。破灶煙銷鳥亂鳴。生計總非名與利。若爲沈落鳳凰城。

中郎生日同大兄

閉門掃客塵。曉窗布初旭。置酒向華堂。千杯猶未足。肩隨三兄弟。少年同誦讀。無夜不聯牀。寒雨滴疎竹。十年隱顯分。風塵各自逐。萬里看愁雲。千金重遠牘。每當良燕時。飲酒如食蓼。飄風吹入燕。一堂聚骨肉。并飛不羨鴿。同餐豈厭肴。自解吳門銅。辛苦狗微祿。妻子嘲饑寒。不飽侏儒粟。同時通藉者。大半策高足。階級不知融。拙迂難解俗。宦途寧有涯。世眼真碌碌。不見下筆時。新詩如濺玉。盡掃野狐涎。不作前人僕。精光萬丈長。雄文從此復。學道罷馳求。終作人天目。治世與出世。修慧亦修福。所得夫如何。行藏那用卜。

美人臨鏡

鳳背輕羅裹。陳來試曉粧。笑顰私愛惜。肥瘦暗平章。髮豈因膏滑。眉寧待畫長。有時呼小

玉皓齒耀清光。

其二

產葉依稀印。香繩取次鬆。睡眸猶少力。酒暈不銷濃。髻就山爭出。眉成月又重。若非形與影。未必肯相容。

其三

端詳不厭頻。一見一回新。命薄還愁我。魂銷豈待人。對壘窺後影。遠立視通身。忽向臺邊看。泫然念太真。(太真爲溫嬌)

其四

白是儂偏好。非關爾有情。半毫皆檢點。一笑也逢迎。和粉時沾淚。移釵乍作聲。粧臺曦影過。第二月還生。

除日

漸近和風漸遠霜。客心久矣盼春陽。盤花簇栢千門麗。躍馬飛車九市忙。麻米僅同開士供。糖簪全減侍兒裝。縱然燕地多憔悴。魂夢無心入故鄉。

除夕

旋烹蔬甲佐辛卮。休問當筵肉與絲。石火許時成老大。鸞刀不啓學慈悲。聊舒一笑寬羈僕。獨對孤燈念小兒。午夜尊前重展卷。試看今歲幾多詩。

當衣戲作

十年事交遊。相知滿郡邑。獨有當衣人。可以救緩急。扣門彼卽應。抱質我無澀。兒女豔歲時。取來片時鬻。歲去貧復來。還入他家笈。似我遊蕩兒。暫歸行復出。豈不畏子錢。聊救眼前疾。從來着未暖。應是無熾虱。

燈市口占

下馬卽摩肩。空行兩三步。有如天將雨。羣蟻團道路。歡呼落旱雷。簾箔騰花霧。靚粧走幻霞。鳴騶過朝露。問關諸友朋。今日皆相遇。皇皇各有求。我心乃無注。偶逢未見書。停行聊一顧。同黃昭素昭質及兩兄夜飲願升伯齋

九市有煙蘿。同參日漸多。高文真二陸。名理詎三何。紙室屯濃甲。霜塔疊拘柯。狂奴存放態。對酒卽高歌。

其二

豈是頻頻聚。清流念景光。只憐天有月。不怕夜飛霜。一笑冠纓絕。新譚舌本香。檢心無箇

事翻爲酒瓊忙

其三

且聽酒罇鳴。騰騰非俗聲。喜譚能早至。懣飲獨遲行。燭暖花尤艷。人高僕也清。酣來如夢裏。踏月少分明。

愁

自買愁人做。其如始願何。傭奴貧轉悍。字妾病偏多。二月花猶死。三春風欠和。東隣方送葬。徹夜挽郎歌。

其二

不敢望繁華。單祈足米麻。忙來欣有病。貧極羨無家。封戶三旬雪。埋書一寸沙。回思故國裏。綠草綉江涯。

養雞

京師有故人。饋我家雞一。利距復高冠。文錦好顏色。拍翅常高鳴。飛牆及入室。墮羽上書牀。爪痕印寶瑟。侍兒云殺之。殺之供晚食。俄聞礪刀聲。泫然三嘆息。滋味我可賒。性命他實急。拋書走中廚。止之煩呵叱。餘怖猶未已。側身躲昏黑。啾啾籠中鳥。欲飛有羽翼。涎涎繒中魚。逢

水即藏入我欲聽其去。鸞刀逃不得。不如且置之。長作塹上物。莫云人口多。一盂減幾粒。

作字

濃寒不釋冰。春來硯猶醉。今日天晴明。墨和可作字。我字不入法。聊恣一時戲。心閒手動時。間亦多逾媚。作詩惟佇興。作字亦任意。未常強心爲。雖拙大有致。

春日坐伯修齋中聽室內禪誦精勤感賦

家緣逼窄道緣微。經卷香舖事永違。望遠也應同止觀。懷人或恐像皈依。可憐和淚看花發。只自停針妬燕飛。春後夢多常見汝。葛衫蠶似水田衣。

元屑

何處嘈嘈動管絃。清輝入戶淨堪憐。不辭踏月隨兒女。只覺慵歡像老年。十里靚粧光照地。一城燈火氣薰天。繁華近日無心戀。歸去挑燈夜坐禪。

春日

道書除却眼難開。早歲強陽取次灰。入閣漸遭家犬吠。出門大喜醉人推。遠山凹處猶藏雪。春夢歸時始見梅。近日頗精人間世。全生大抵要無才。

西直門外野飲

白日無光天欲泣。北風吹水水皆立。直捲塵沙入雲霄。下界茫茫失都邑。樓外高岡漸漸平。道是元時上都之古城。阿閣重樓虛想像。荒墳如粟森相望。日暮大道少行人。馬嚼青草臥原上。

中郎廣陵姬。卒于都。至雙寺禮懺時。顧湛菴李湘洲二太史俱

在

香銷粉破恨層層。合有金釵篋有箱。昨日檢來無用處。都將施與念經僧。

其二

濃雲香霧繞蓮臺。朱炬煌煌鏡裏開。金鐸乍搖梵唄沸。檀湯親與灌如來。

其三

伊蒲飯罷數聲鐘。積雪輝輝白照松。今日虛勞學士至。無人解點密雲龍。

太學偶作

日射柏林如膏沐。拜罷欲出不得出。長髯堂吏喝班散。黑頭蛆子靴聲戰。出門擲去老頭巾。獨着短衣城外行。奪得健兒弓在手。一箭正中雙飛禽。

諸陵月下示潘尙寶

野客無名隸奉常。未簾皂帽踏清光。石橋印月深深雪。松蓋搖風暗暗香。官道馬嘶燈火密。長陵鐘動履聲忙。祠臣誰帶煙霞氣。白髮鬢髯尙豸郎。

其一

泉聲碎碎鳥關關。並馬林中也自閑。一縷霜光明御道。萬重枝影暗深山。笑譚皆是天人際。交誼寧居季孟間。莫嘆鼎湖龍去久。丹臺君是舊仙班。

暮春長安郊遊

暮春春始徧長安。楊柳青青拂水端。若似江南春太蚤。而今那得嫩條看。

其二

水亭箕坐兩三人。湖面晶晶柳帶新。夜色遠來休道去。忍將白水換紅塵。

西山道中

馬上看山失馬鞭。雲開數朵似青蓮。昔遊上谷曾經此。流水石橋路宛然。

見骷

千金買一笑。桃李可憐色。一朝委黃塵。秋壤傍路側。棺槨爲冷風。墓田方稼穡。尙有遺骨存。野犬啣入棘。朝廷軫亡骸。昨下焚骷敕。招集五百僧。爲作大功德。荒垣爭拾取。填集蔽原隰。



腦骨雖然存。下頷久已失。頂如掛藤匏。中綫一線泐。不知橫波者。內孔巨可怖。齒齶尙連頤。疎疎與密密。依稀向人笑。想像舊時食。外理青苔封。中空黃土色。見之還自摸。寧無似此日。生前百憂煎。畢竟何所得。先看頗悲哀。久之解愁鬱。等是歸于盡。飲酒吾當力。

長歌送謝在杭司理之東昌

真州寺裏有嘉樹。雙去雙來幾朝暮。竹裏一椀池畔杯。鏡日清言忘暑路。蓮花塘上浮舟醉。一曲未終雷雨至。笑語濤聲兩不分。是夜歡呼欲動地。紅袖清波如眼前。屈指便成一年事。長安陌上忽相逢。青衫瘦馬損標致。風起揚沙蔽赤日。無事只坐如螺室。曾向西郊一度游。畢竟所得不償失。回首舊歡如夢寐。荒荒忽忽分南北。我向槐市作諸生。君擁千騎下東國。難忘攜手伽藍道。一言平子成三倒。海內豈無文采人。往往輸君心腸好。清詩水裏出芙蓉。忘機海上下鷗鳥。得固欣然失不悲。愛君常有佳懷抱。眼底行藏那足計。冠帶場中偶人戲。吾生百歲亦有涯。豈以花月易名位。有口不解訴暄寒。圓珠規璧吐新義。有手不解揖俗人。指端只出銀鈎字。濁者是涇清者渭。世人自賤吾自貴。高軒偏載腐客顏。錦衣常裹俗腸胃。東昌司理也清閑。高巖鬱鬱水潺潺。踏歌長日呼春草。寫字何妨喚遠山。誰道文人不習吏。狂如羅友襄中治。近則和仲遠醉吟。所之政績照當世。卽如君家謝安石。一生不脫登山屐。胡塵百萬蔽天來。譚

笑聲中破大敵。何況一郡如斗大。枋榆那須煩勁翮。近日中官蔽川陟。察及雞豚算車軸。臨清市兒攘臂呼。聞說官民相殺戮。二百年來無此事。此後應須興大獄。重處却畏人心搖。輕之又怕朝網辱。君爲李官職平反。自能調停寬所屬。豈肯薄收強項名。要須實救一方哭。縱君淡泊薄功名。政成虎爪自相速。

得勝門淨業寺看水同黃庭翠黃填軒兄弟鍾樊桐兩兄

南人得水便忘憂。兩日三番水際遊。花露沾衣濃似雨。潭風着面冷於秋。拖莎帶荇流何急。擲鴈拋鳧浪未休。天外畫橋橋上柳。祇疑身在望湖樓。

高梁橋

覺寺休辭遠。逢僧不厭多。一泓春水疾。十里柳風和。香霧迷車騎。花枝耀綺羅。半年塵土胃。滌洗賴清波。

再遊

灣環窮野徑。忽到水中央。聽雨魚兒慧。捎波燕子忙。馬來沙耀雪。人坐草粘香。爲愛溪流急。移尊向石梁。

同謝于楚謝在杭伯修中郎火神廟小飲看水

作客尋春易。遊燕看水難。柳花濃沒地。鷗貌靜隨湍。拜謁何如醉。塵沙豈似瀾。石橋明樹裏。真不像長安。

其二

不敢望浮舟。聊欣漱淨流。唵魚搖碧瓦。浴鷺蕩朱樓。既已觀瀾至。當爲待月留。難忘分手處。清淚灑揚州。

辰起

醉境直連夢。朦朧暗自猜。行塔方識雨。訊客始知雷。濕柳數聲滴。泣花一朵開。向人曾乞竹。宜趁此時栽。

梁都事鳳池招飲韋公寺

去天纔尺五。喬木宛山莊。流水忽如話。松花時一香。密籐堪代幄。欵石自成牀。獵葉風初至。紛紛下海棠。

其二

有蹊皆委曲。是水必深沏。獨與石酬酢。惟餘僧往來。酒多酣侍史。花盛逮重臺。不獨林園勝。參軍有俊才。

四月十八日西直門觀士女

選樹安歌席。沿溪列酒杯。水邊千騎去。霧裏萬人來。激調傳山谷。濃香染草萊。斜陽簫鼓近。士女戒壇回。

送李湘洲太史齋詔至吳越便道還家

欲將登眺付王程。絕似清泉縱涸鱗。銅馬署中頒詔使。錢塘江上看山人。水流花落經年夢。寫得安禪過去身。回思京華名利客。日埋塵裏不知塵。

其二

清夢經年到聖湖。喜啣黃紙下東吳。山膚飽漬千行字。岸草香分五夜爐。越國才人如竹箭。湘中石子像樞蒲。蹉跎未附仙舟去。空混長安飲博徒。

天壇小酌時送苗慎軒之南陽

松陰各散步。佳處便招呼。不有一杯酒。其如千里途。闕宮生燕麥。羽士採龍鬚。宛洛堪游戲。休嗟鴈影孤。

送三舅夾山至太原任

寧將七尺付塵緣。總以山資賴俸錢。問俗有時惟採藥。退堂無事只參禪。巽生漫學蜘蛛

隱陶令權收秣米田。邸舍蕭然何所有。定驅草木餉朝賢。

### 黃慎軒賓酒西直門溪上招秦京夾山舅兩兄有述

同心卽骨肉。蜀楚詎容分。澗水年年去。松風刻刻聞。庭波如笑密。錦石似嶙峋。日暮將安去。天邊是雨雲。

### 長安道上醉歸

天塔十里霧濛濛。醉後依稀似夢中。橘樹靈鴉一背月。懸槽歸馬四蹄風。棕櫚暗暗藏禪寺。鈴柝沉沉護漢宮。訊罷騎人無一事。流星如火耀晴空。

### 別顧太史開雍時冊封周藩取道回吳

細雨沾長道。垂條濕去旌。時平天使貴。官冷客裝輕。泛月兼沙海。踏花渡柳城。風塵還着眼。亦自有侯嬴。

### 飲談太僕宅分韻得上字

長安九陌秋霖漲。何以解憂惟佳釀。高齋亦近尺五邊。沉沉綠樹疑深嶂。荻義迴月幹孤危。屯風宿雨聲悲壯。誰言樹色不堪餐。拘鐵虬枝浮酒浪。小杯細碎大煩持。巨觥入手神先王。脫冠跳足我先之。海內久矣知吾放。邇來只是肆沉湎。日退詩腸進酒量。酷似新豐狂馬周。天

上紛紛逃五臟。何況主人能愛客。疎燈寒雨倍清曠。疾雷子夜夾奔濤。豪勢詎能敵高唱。我馬  
今宵惜障泥。醉卽倒向禪牀上。

午日同鍾樊桐黃慎軒方子公秦京伯修中郎崇國寺葡萄林

分韻得掃字

禪室也不寬。且喜常常掃。竹子不成林。一根兩根好。藥欄無豔花。嫣然種香草。雖無曲水  
池。灌餘成小沼。山僧不解禪。只是貌蒼老。朋友不甚多。八入好懷抱。盤餐不過豐。園藪鮮可飽。  
酒未必如灑。苦冽香且皎。要言不在繁。一字使人倒。縱無大快活。何處有煩惱。

追送丘長孺郊園值重城已閉雷雨大作馬上口占

若爲聽雨不聯牀。獨立西風泣鴈行。雲釀怒雷人病悸。山啣殘日馬知忙。風城久已歸煙  
霧。魚鱗焉能鎖肺腸。此夜莫愁閑對語。也應十句九袁郎。

送丘長孺南還

文人情性武人裝。鬧帶花衫大羽囊。嚮宅典田重出塞。臂鷹牽犬復還鄉。身穿通邑千人  
看。馬度秋原百鳥藏。莫向前途猶久滯。吳姬釀酒待君嘗。

其一

秋園彈指即天涯。忍見霜風墮藕花。乍北乍南長作客。且行且獵便還家。姑留綠鬢圖生事。莫戀青山失歲華。松下一尊衣濺淚。馬前八拜面沾沙。

其二

仗君爲我解愁腸。九夏銷來閃電光。梵寺看花三日雨。射堂踏月五更霜。譚宵徹曉寧辭倦。醉死重生不計場。今日飄零南北去。夢魂長繞紫游韁。

得丘長孺密雲書

夏來長夢汝。顏色慘無歡。今日寄書至。果言行路難。人情堪痛哭。病體欠平安。祇恐今番會。豪遊興已闌。

登盤山

遍山無穩石。數步有鳴泉。絕壁爭呈瘦。濃松亂綴妍。筠移頻下果。桷破不藏煙。若欲搜尋遍。還須一二年。

入都迎伯修櫬得詩十首效白

痛死慰生淚暗垂。一身多病不堪支。斷腸客路三千里。極目羈魂十二時。江上雪來雲片黑。河洲風重鴈行遲。樓崩棟折蕭條甚。路上行人也自悲。

其二

縱是石人也慘情。難聽一宅斷腸聲。老親淚盡惟流血。小弟心孤欲喪生。白日奄奄寒古渡。長江浩浩響空城。今朝易水悲歌去。送客白衣盡濕櫻。

其三

一室先亡有用人。死如可代豈留身。揚名君好娛慈父。多藝子堪事鬼神。楓樹有枝猶帶血。征袍多淚易沾塵。驅車宛洛如流水。不及腸中百轉輪。

其四

也曾兄弟話行藏。萬不關心到死亡。種德無兒悲伯道。傳家有女羨中郎。四旬莫究多生願。一木橫埋未了腸。官冷負多田又少。將來何以活孤孀。

其五

賦就爭誇白雪工。幾人曾羨黑頭公。買田結社言猶熱。擲綬還山話竟空。數縷蒼煙雲外寺。一團黃霧馬頭風。長安北去三千里。多少青山涕淚中。

其六

鈴旌沉沉上帝州。不知我者爲何憂。浩歌臨水水爲泣。和淚看山山更愁。瘦馬風嘶停古



道。夜烏鬼語集荒坵。今生幸得爲兄弟。萍水重逢又逐流。

其七

重門如墨壓荒村。馬上逢人不忍言。帶雪寒鴉爲吊客。逆風蘆管唱招魂。須知沙劫煙霞伴。不比尋常骨肉恩。從此不知入世事。西山南畝度晨昏。

其八

難忘聽雨愛憐情。日暮含悽過古城。一片雪來和淚落。幾行鴈過喚愁生。天人竟萎花冠色。仙骨虛聞環子聲。笑語衣冠渾在眼。如何令我叫亡兄。

其九

五天使者苦相催。長夜悠悠更不回。山客也曾招隱士。遊魂今始賦歸來。晚風沸水人心急。落日燒林鳥語哀。我眼半枯身半死。旁人猶作計偕猜。

其十

魂來入夢訴還鄉。豈不懷歸道里長。銷帶典衣還客負。賣書霑硯作行裝。晚風竹葉刀刁話。暮雨梨花冷澹香。莫怪多情頻下淚。死生大海路茫茫。

遊西直門柳堤上時伯修已逝

依然垂柳覆長堤。落日沉沉萬樹西。惟有水聲渾不似。當初如笑近如啼。

扶伯修觀以水涸候水止東昌官舍呈司理謝在杭

西去空悲道路長。揚沙涓水變非常。客程此日投齊地。寡婦終朝哭杞梁。入室衝風吹涕淚。繞簷驚電照恓惶。謝安故是多情者。不是同胞也斷腸。

西陵別慎軒居士還蜀

霜楓如雨灑征衣。勝侶而今會漸稀。帝子已安仙客去。鶴羣無主道人歸。灣灣水妬蠶頭法。片片雲呈麈尾機。不是倚門親在舍。西陵那忍遽分飛。

其二

獨向千峯頂上行。大峨何日更尋盟。夢來白馬緣非幻。老去青山約定成。亂葉掃雲秋路淨。疎鐘答月夜郵清。自憐不及黃牛峽。三暮三朝繞客程。

同慎軒赴劉二元定諸君子之約于圓通閣分韻得池字

覓得危樓話少時。八窗明處見山奇。都緣江水能開鏡。故使巫峯盡約眉。空國人來聽說法。堵牆客繞看臨池。金磚峽過無知己。坐隕霜光也不遲。

江上別平倩凄然墮淚有述

交情直到此。兄弟也難伴。胞乳雖然共。肝腸未必投。葉黃歸峽路。雲黑渡江舟。不死終相覓。寧辭道阻修。

其二

逝鬼已難作。生存復遠離。可憐一掬淚。分作兩番悲。天盡人歸處。山空影過時。臨行衣帶斷。饒得別遲遲。(偶有斷帶事)

三游洞(時送黃太史平倩至夷陵別後與劉元定諸公遊此)

洞在大江邊。背江疑不妙。天生下牢溪。繞洞益清奧。兩山夾深泓。桃花源宛肖。江水雖洋洋。此地轉幽窅。譬彼學道人。沉修貴不耀。石乳滴成峰。柱洞竦孤峭。皺駁凜陳鱗。枿臼吐餘竅。疾流鋪石灘。水石遇成笑。循溪不厭深。奇峯如相召。蒼壁湧雷文。朱霞染霧嶠。仰面見天梁。駭走俄大叫。霜石踏人影。始知月來照。生平不聞猿。今夕聞猿嘯。別死與離生。猿也如相弔。太清不可留。乘月理歸棹。

贈劉元定

作人影亦好。入座去猶香。柳也學張緒。石能醉米郎。性于學道近。心爲著書忙。兄弟今零落。含悽托鴈行。

元定齋中別秦京諸君子

西望瞿塘淚滿巾。峽州猶自滯孤身。客中逢客多知我。離上生離更苦人。良夜燭殘清影亂。霜墀月落醉言真。他時柳浪能如約。煮筍烹葵也不貧。

西陵諸公送至豐寶山道中有作

草短風高日漸西。離魂又被萬峯迷。乍飄木葉同珠絡。直剪平原作稻畦。即架死友范張人已別。仙舟李郭事尤齊。青山也解留行客。四出濃雲逗馬啼。

峯寶路

峯寶路。縱復斜。黃葉紛紛如雨花。講公飲酒我飲茶。茶一盞。酒數卮。夜堂明燭話須臾。馬首明朝更有誰。醉者不悲醒者悲。當初伴侶滿長安。稻麻竹箠輕相看。自經別死離生後。始覺人生聚會難。事從難得始知珍。心孤往往易爲親。白波江上剛分手。黃葉山頭又別人。

從夷陵峯寶山至玉泉道中示同遊羅玉檢

冠蓋集修衢。分袂意冷冷。日午方成行。馬蹄踏人影。似魚下重淵。如雀起高嶺。高嶺忽已夷。流水中間之下。馬聽清泉。與子坐石磯。男兒七尺身。寧爲妻子羈。終當遊五獄。長揖與世辭。我慙尙子平。君如臺孝威。此歸泉石間。毋爲流水嗤。

其二

望岫難息心。行緩意彌速。明月豈不來。浮雲蔽之沒。夜度獼猴沖。暗嶽臨深谷。齒齒亂石坡。微軀付騰足。不復問升沉。俯仰譜髮髻。疾風吹草鳴。颼颼如有物。行人且莫驚。靈山虎不毒。我爲智者來。伽藍自驅逐。亂葉晃微燈。隱隱見茅屋。磴窮幃忽開。流泉如轉轂。疎鐘下層巒。餘音繞山麓。

宿玉泉

山是天台脊。泉通印度源。寶冠妍楚蜀。珠淚灑乾坤。衲子都如石。樵人不辨猿。英雄無限淚。收拾付空門。(地眼關於經命處)

其二

葉落不成寐。披衣步禪庭。水寒巖化雪。月晃欲無星。洗耳秋堂磬。灰心子夜經。幾時菴乳窟。泉響一生聽。

題關將軍祠

一腔血盡了生緣。靜向山中禮法筵。人道肝腸能死國。我言肋骨好參禪。洞巖震怒如雷地。草水淋漓易雨天。日暮烏啼人跡斷。自搜殘碣自營泉。

聽泉

一月在寒松。兩山如畫朗。欣然起成行。樹影寫石上。獨立巉巖間。側耳聽泉響。遠聽語猶微。近聽濤漸長。忽然發大聲。天地皆蕭爽。清韻入肺肝。濯我十年想。

其二

山白鳥忽鳴。石冷霜欲結。流泉得月光。化爲一溪雪。月色入水滑。水紋帶月潔。疾流與石爭。山川爲震裂。安得一生聽。長使耳根悅。

鄭少泉年七十五訪我玉泉覓詩卽席贈

手中松子十圍強。曾侍僧雛頂盡霜。尙自啣杯同李白。不須食乳學張蒼。雲霞輿到諸峯遍。風雨譚生徹夜狂。心內無營卽大藥。癡人錯料有仙方。

重過關將軍祠二偈

雄藍設色水潺湲。浮世興亡一笑間。鼎足三分彈指折。忠魂千載王名山。

其二

侵天荆棘掛人衣。幾箇能開生死圍。三世如來血性漢。大刀響處是禪機。

柳浪館

鎮日無人至。層溪與閉關。幻雲作佛事。流水寫僧顏。歸鷺千團雪。長楊一派山。夜深纖月落。清梵出林間。

其二

盤礴從吾好。有頭不贅冠。衣裳迎客易。神契到人難。薪斫和烟樹。茶烹帶月湍。水邊成一笑。世界果然寬。

其三

睡起西窗暮。輕舟出釣磯。蛙沉萍忽散。螢到草先輝。拂地楊枝重。封天粳稻肥。未須愁夜色。新月照人歸。

其四

何須求世上。此地有雕胡。鶴到花千樹。僧歸月一湖。聞香遮戒律。觀影悟空無。宴坐深林下。天風自拂鬚。

其五（湖中有等死堂）

息心無一事。何樂可相如。等死堂中客。放生池裏魚。禪牀鳴翡翠。唄語雜芙渠。花鳥餘情在。勸來不用除。

其六

過橋三五次。門徑宛村莊。曲水糖茅屋。深楊護粉牆。雨煙荷葉淨。風露稻花香。未可全無事。疏經也學忙。

其七

匪地芙蓉圃。遮天楊柳城。僧難爲弟子。農老作先生。磨尾傳占法。書頭寫稻名。池堤全得月。露坐二三更。

初至村中

淨業前生也不常。而今報得樹千章。深松老栗如爭臘。粳稻芙蓉只鬪香。遠水夕陽光濺。澗。青林白月冷荒荒。前村犬吠聲如豹。宛似王維華子崗。

其二

禪牀頻逐樹陰移。隣叟行來犬亦隨。月下獨遊形澹漠。水邊假寐夢淋漓。閒看歸鶴投何處。偶憶騎羊到此時。趁取今秋天氣好。寬寬鑿箇放生池。

其三

十年救火事奔忙。慚愧青山舊草堂。聽盡歌聲樵唱好。看完花卉稻芒香。永無躍馬登舟



興也學占雲射雨方。桃葉桃根今尙在。早拋舞髻效村粧。

其四

歷盡繁華始愛貧。布袍芒屨混村民。止爲荷葉山頭樹。又作柞林潭上人。鳥不傷弓寧織。翻魚經勞尾也收鱗。從今飽噉長腰米。任運騰騰卽淨因。

其五

出行獨有鸞臺隨。緩步于于百不思。餘食好將施烏雀。閑情猶自護花枝。侍兒也唱無生偈。隣叟來吟清泰詩。竹水竹風涼太過。略收暑氣應天時。

其六

半是經行半是眠。清風宜碎月宜全。黃雲紫霧新禾稼。碧水丹山好墓田。俗客罷來因斷肉。柴門不閉爲無錢。而今轉儘陶弘景。不得徵官却得仙。

其七

心內安閑身也輕。十年破觀舞華榮。冷雲冷雨銷三夏。香水香山過一生。池上坐禪魚乍躍。花前說偈鳥爭鳴。醒來不作攢眉事。夢裏依然是笑聲。

其八

逐處奔馳昨已非。今朝息盡百年機。人從綠樹千重出。鳥隔青天一寸飛。八口飽餐菰米飯。全家都着芰荷衣。客郵暫宿無多事。池上青蓮望我歸。

其九

頓除何肉漸休糧。箇是居山第一方。有口止歌招隱曲。此心不是貯愁囊。旋斤修竹爲行伴。新禮喬松作樹王。冉冉逐塵嗟世苦。波波求法嘆僧忙。

送死心入山

只欲歸山去。敷蒲坐幾春。短藤新衲子。長爪舊文人。虛谷重經字。空潭貯定身。死心久已死。去住若爲真。

入村

出郭方知霧。登舟始辨風。水生蝦眼赤。霞過鴈翎紅。浣渚喧游女。蘆洲息釣翁。人家蒼翠裏。鮮豔一株楓。（漁人云蝦眼赤則水漲）

村行

藤杖扶身健。綿袍到膝輕。蕎花銀粟漲。楓葉火山明。引客譚因果。觀天校雨晴。今年秋事好。晚稻倍生成。

癸卯元日步中郎湖上韻

曉起一湖雲。穿雲鷺一羣。溪楊眉黛色。灘石指口紋。可惜題橋去。難同帶索耘。朗吟霞上作。風口夜深聞。

其二

點也柴車駕。聊從汗漫游。尋人穿柳市。放艇過沙頭。紫柏遮南垞。蒼筠護小洲。世情休自好。閒適豈宜休。

過伯修墓

行過冢子崗。步入白楊林。白楊十萬樹。一葉成一聲。芳草爾勿生。下有錦繡人。草枯有榮時。子往無歸辰。入夜遲魂來。有懷欲具陳。阿鸞久已嫁。母爲懷苦辛。

哭壽亭舅舅學佛精進無病而卒時予病臥法華蘭若

莫過西州路。羊曇哭斷腸。法門何苦楚。道侶轉淒涼。急雨飄青焰。迴風戰白楊。五更扶病坐。生死幾迴忙。

入都過禿翁墓

巖電似雙眸。昨宵來入夢。驅車且暫停。三步腸應痛。

其二

威鳳不潛羽。蛟龍能隱鱗。網羅耽耽至。何處可藏身。

其三

馬竄有新封。凄其荒草裏。雖無要離墳。也近荊卿水。

出都門道中

夢草和村綠。懷雲帶舍蒼。天桃無斷雨。姪竹有鮮香。拜衲學空觀。逢仙覓睡方。縱然登第去。也只爲人忙。

襄城道中題逆旅寄示兩弟

鈴鈴車馬送昏朝。欲雨濃雲慘不銷。盤裏有魚家漸近。眼前無水路還遙。烟沙猶自迷行色。風柳何曾暢舞腰。寄語王孫休滯滯。故園青桂久相招。

南陽邸中飲同年羅子

一聲殘滴下疎楊。和露和烟浣客裳。驚馬無心遊宛洛。故人相對是瀟湘。春來藥裏閒花事。雨後甃盤照酒觴。屈指難舍居漸近。蕞爾開處滿山香。

入村步中郎韻

林碧間溪紅。夢魂愛此中。掃塔聊貯月。芟竹爲疏風。蔽口荷花盛。遮天粳稻豐。鸞臺隨我去。社約赴村翁。(鸞臺司空圖碑)

其二

頭白與顏紅。難忘是里中。柳方耐重露。松忽話微風。地僻衣冠略。年登宴會豐。萬緣聊放却。且學信天翁。

其三

霞染一村紅。人煙湖雪中。松梢留澹日。山口漲幽風。栗里一生醉。桃源累世豐。夜深鶴鶴起。咳嗽似衰翁。

又步中郎韻

茆屋臨花澗。居然萬里橋。自從知橘隱。不喜見蜂朝。樹長棲雲葉。藤抽帶雪條。悠悠名利者。路遠馬蹄遙。

晚酌中郎限韻

好攜仙人杖。同飛力士鎗。坐闌山氣重。話斷水聲明。晚岫雲車變。秋場月浪盈。道緣欣漸熟。夢裏講無生。



珂雪齋詩集 卷之三

詩

月夜同兩叔僧徧虛泛舟荷葉堰

買得蜻蜓舫。嬉遊荷葉中。暗林白釀月。秋水碧澄風。露重衣先濕。花繁棹未通。羨魚兼送酒。溪上立村翁。

其二

山僧能鼓柂。稚子解飛檣。蕩月忽成字。流波如有言。禾深羣鳥宿。花墜小魚吞。暗暗垂楊裏。棹鼓沾酒門。

送僧北去尋師

獨向秋風杖短藤。葉中乍見五臺燈。支郎已解藏身法。知在深山第幾層。

送吳生

吳生才技人不識。幾分秦青幾分白。有時不請或自歌。強之以歌必不得。莫道司窮必有

神人情到處。易爲親。聰明頗欲推君富。意氣抵死留君貧。悲哉秋聲動人耳。送子登山復臨水。我有醫貧第一方。珍重不肯爲君語。

秋日攜妓遊章臺寺同林伯雨諸公

飛蓋入青林。簷影一園碎。鬱鬱新藤蘿。沉沉舊粉黛。香魄久已銷。花魂豈堪溉。惟有主地神。會識細腰隊。七盤舞西荆。楊柳學餘態。君王射兕弓。入地成光怪。羅綺萬年灰。伊蒲十畝菜。風日甚清和。同來一改佩。躋往韻不隨。流風還我輩。一曲佐清尊。洗却陳感慨。鸚鵡各呈工。鑿竹破烟籊。爲樂貴及時。風景好玩愛。新故疾相乘。何處覓見在。至時卽去時。飛鳥不能賽。信是黃面人。可以當我拜。

送徐元叔遊太和

聞說嶽山境。鬢髮帶乳泉。靈踪秦好時。春殿漢新年。向意徧尋嶽。雄心首愛玄。慧人初入道。才子早遊仙。夕食青精飯。朝繙赤甲篇。沙星橫浦耀。霧雨別峯懸。鬱鬱胎芝秀。煌煌火棗然。有歌曾是雪。無岫不成蓮。採得金光草。來供阿母筵。

送彭長卿遊秦訪陳別駕

六十猶行役。南平作故鄉。灞陵惟積雪。渭水少輕霜。老乏澆花地。貧無養鶴糧。故人存笠



馬不用嘆羊腸。

### 登大士塔九日同林伯雨傅叔睿

大江積雪橫。九十九洲明。楓柳千門色。琵琶一郡聲。演軍無舊義。調馬有新情。美酒芙蓉社。重尋世外盟。

### 哭趙尙書尙書死於宗室之變予感尙書國士之知聞而傷之

白髮尙書死可惜。可惜不死向疆場。高帝象養十萬孫。恩窮法盡少奇策。老臣歷練三十年。大才偏能理頽劇。豈有吳楚七國難。啓口陷胸勢何逆。赫赫大牙開府堂。空懸赤棒誰闕格。是日白晝忽無光。漢江波跳啼鬼魄。事關國體豈容輕。草莽書生重哽咽。去年射策上郡門。下走王郎勞係襪。首雖乃是真龍孫。脚厨袖却含光鐵。口旒搖搖逐西風。涓駘堆前飛凍雪。漢江重勒羊公碑。不用墮淚只墮血。

### 歸質管谷逢蘇潛夫得灰字

濃香試冷灰。一笑出章臺。粉黛情初盡。煙嵐眼乍開。雨尼佳客去。竹愛主人來。風葉殘膏夜。禪鋒送酒杯。

### 送郝公琰東下

有客采蘭還。嘯歌夜出關。雨中三澗水。雪後九華山。怪石添詩格。寒花學道顏。秦淮春事好。留滯嘆緣慳。

壽中郎兄

伴水依山又一時。卯君和仲喜追隨。清齋抵足何辭老。綠鬢休心尙恨遲。修竹乍同高士韻。怪崖難比道人奇。太玄自賞誰能信。當代重推杜甫詩。

五弟初度

一門七業藝垂成。第五於今總並名。春草堂中多麗字。天花樓上有新聲。養來綺石添斑駁。種得寒梅已縱橫。更喜老親常住世。日長不必羨爲兄。

次東坡聚星堂雪詩韻

夜窻冷冷鳴枯葉。不識封林一天雪。東郭先生太耐寒。枕上開窗叫欲絕。積燄明溪三尺強。十萬龍孫皆磬折。一迴只向水邊飛。數片俄從衣上滅。快雪今朝逢快人。戰冷深杯如電掣。擊竹成歌飄起舞。可是青腰親縷纈。凍浦寒塘洗肺腸。紛紛萬事如塵屑。石外裂簷如有人。長尾寒禽只一瞥。三徑不掃絕來踪。兄弟燔枯相講說。雪收微月乍窺林。庭下梅枝如拗鐵。

梅花

怪石巉巖間。蕭然一株在。素質與清心。不逐羣芳隊。衆人愛此花。此花豈宜愛。譬如觀大士。只合歛容拜。獨存煙霞姿。了無妖韶態。神契渺難參。風領絕塵外。

其二

何地無名花。第一論標格。豔色與濃香。等是花臧獲。我欲忻賞之。只是難招客。淨名作上賓。莊周處下席。阮宣何點輩。行酒充廝役。若無世外人。吾寧爲花惜。天上俗仙娥。勿來爲花厄。

其二

朝來花底坐。微香染清醉。清醉猶未已。冷然成佳寐。瞥見四圍山。萬仞直拔地。玲瓏萬竅空。苔文綴深翠。山徑響石渠。珠泉自天墜。澹月來山腰。流波湛寒淚。途逢一高僧。邀我岩中寺。坐我白石牀。語語天外事。譚鋒尙未終。驚鶴一聲至。依然花下人。清香來撲鼻。

乙巳元日試筆呈中郎

生計今粗定。停游且住家。坐眠常隱竹。杖履不離花。魚鳥專三徑。金湯付五車。天桃春水漲。湖上試新槎。

其二

石簞無俗葉。浪柳有清絲。通續非同調。王裴屬異枝。乳和三教義。弢解一朝詩。去去煙林

畔。吞花未許遲。

會長石太史以詩寄率爾次韻

園竹遲佳客。庭梅憶道人。交情同水乳。會合係星辰。花送三番信。湖銷一半春。夜堂聽雨好。莫負暫閑身。

梔子樓苦雨

不是絕來客。清溪久漲門。室中人隱几。樓外雨翻盆。倚柱悲紅樹。開窗見綠村。病餘持酒戒。契闊對青尊。

送蘇中舍雲浦北上

羅月松雲一枕清。塵緣催促赴王程。只將九陌飛沙氣。換去三湖捲雪聲。衆裏且收牙後慧。行來宜似耳中鳴。閑時獨步城西社。忍見蒲桃抱蔓生。(予與伯修諸公舊結蒲桃社)

游章臺寺同中郎傅仲執諸公

走馬蹊猶在。鳴牛路不遙。沉蒼存古柏。淨綠漲新苗。香跡傳騷代。荒城想閏朝。青青墻畔柳。遠似美人腰。

鼎沸人煙盡。澄湖素練開。雨清調馬路。月上看花臺。地僻千畦菜。僧貧一院苔。鐘聲日暮起。松梵有餘哀。

其三

風月淒清夜。時時見楚王。蛇魂濕鄧袖。璧鬼侍龍陽。蔽日旋臺樹。遮天繞殿篁。興亡飛鳥跡。定裏訊支郎。

午日沙市看龍舟

旭日垂楊柳。傾城出岸邊。黃頭郎似鳥。青黛女如仙。龍甲鋪江麗。神裝照水鮮。萬人齊着眼。看取一舟先。

其二

水犀神手出。天厲疾星來。捲雪蛟精怒。回風羯鼓催。一標如掣電。萬笑似奔雷。何處妖嬈女。靚粧又上臺。

其三

倏忽青龍吼。翻身截逝波。攬江搖地軸。激水濺天河。態似七盤舞。聲同九辨歌。黑雲樓閣起。風雨奈游何。

其四

苦海皆成笑。歡來忽變噴。萬橈同一臂。雙眼要分身。洶湧嗟江勢。剽輕嘆楚人。弄潮休羨越。盤馬莫誇秦。

同龍君超諸公遊便河得橋字

率爾翻成樂。裙簪藉小舸。遠林纔出寺。深柳欲藏橋。明月迎團扇。流波染素蕉。偶來穿水曲。咫尺便爲遙。

其二

晚風來細細。薄露淨輕輕。近岸添新樹。前溪識舊橋。杯飛常帶雪。歌罷忽生潮。不獨煙林勝。阿龍故自超。

又步君超韻

總是高陽侶。何妨便脫簪。春雲妖女態。秋水慧人心。一字風求曲。三千鳥嗽金。晚來涼月上。人影散花陰。

龍君超招飲章臺賦得看花臺三韻

不敢辭炎暑。良朋會而難。風流存語笑。方略見杯盤。地敞風柯亂。庭空浪壁寒。荷花真是

好。能得幾人看。

其二

此地舊繁華。林香路不賒。傾囊羞異品。通國揀名花。埋玉千封亂。飛鞭一道斜。餘情聊粉黛。結習總煙霞。

其三

炎極且登臺。涼風動地來。尊前飛冷雨。箸下起驚雷。八笏藏紅袖。三衣染綠醅。滂沱遮笑語。但見口頻開。

送水部葉寅陽還朝排律二十七韻

竹箭才名舊。梅花氣格清。襟懷黃叔度。名理鄭康成。北闕通金籍。南陵佐水衡。江濤如踴躍。郢樹也芬榮。國算重重密。關條暗暗輕。祇因憂利病。不忍問奇贏。酌水寧言潔。投香恥近名。誅求無宿淚。絃管有新聲。堤柳千門雪。崖花五月鶯。估舟朝醞酒。商女夜彈箏。祝釐偏祠廟。謳歌滿土氓。妙綜酬物累。蕭靜謝塵纓。每好深深思。常懷玄澹情。素縹羅几案。蒼翠撲簷楹。峙嶽還同靜。澄川可似瑩。想沉穿月脅。學博下星精。寶鏡寧疲照。洪鐘不倦鳴。大言羅百氏。一字倒諸生。妙悟開心筏。先機閱世枰。郢歌全是雪。楚寶豈須珩。拭土干將泣。披衣驪子驚。鳧飛欣北

極。鷓立帳南平。雲壑秋容變。霞江晚市晴。朱幡穿下雋。白馬出湓城。暑粉經年別。郵籤二月程。予慚北海跡。君似蔡公迎。何以酬明德。清修不負盟。

送王芻圖

擲去塵緣盡。古人不似公。五男勞粟里。一婢擾司空。髮豈須方黑。顏寧待酒紅。莫愁今夜雨。明月在壺中。

別陶不退時陶有長子病死瘞於此分手悽然故有此贈

旋風戰葉滿江鄉。瘞玉埋蘭獨慘傷。十九年來悲萬子。千秋亭下哭潘郎。楚天路盡無鴻鴈。鬼國山深怕虎狼。八載飄零辛苦盡。且尋松菊舊柴桑。

壽湘山孫給諫五十

墮地名遂重。還山賦更工。無涯白雪字。有限黑頭公。調馬尋新路。澆花出故宮。道人閑適久。堦藥似顏紅。

其二

欲知張楚甚。家世步騷壇。葉葉珥貂易。人人著藉難。春華敷麗藻。秋柏凜高寒。玉簡金書在。齊驅日月丸。



其二

歸山何所事。躡屐與乘槎。青草湖邊雪。朱陵洞口花。鬚眉澄水石。文字染煙霞。却笑裴丞相。中年鬢已華。

其四

凌雲陳羽獵。畫地講甘泉。日月何常燾。煙蘿未穩眠。心應沙共赤。鬢與石長玄。大藥何須問。名臣半是仙。(薛客近赤沙湖有玄石山)

龍君超過訪賞管谷卽席有贈

征袍常帶五陵塵。江柳江花隨分春。寶劍高車來陸賈。長頭大鼻坐陳遵。一天霽月偕佳客。十畝新篁勝主人。斗算才情石算酒。閑時光景健時身。

哭江督學進之

蜀客傳來信已果。西望三川淚萬顆。天下寒士盡吞聲。使君心腸熱如火。興到常時信口哦。愁來不解將眉鎖。十五年前老制科。乍開乍落權花朵。憶昔飄零館娃宮。倉忙一見深憐我。老馬難忘紵衣恩。贖子百身無不可。滄江九月捲霜波。水冷不見西來柁。身後寂寞爲君寬。有薪尙喜佳兒荷。

歲暮游江上

白沙江上踏沙回。閑逐兒童步沼臺。寒鳥也應喧歲暮。好花如不待春來。春糧分給胡居士。治酒頻召符秀才。目疾小康重病肺。千般濃想盡成灰。

陶孝若謝于楚偕來賦贈于楚自蜀至而孝若游吳

山城生霧徑生苔。忽地詩人過草萊。響屨廊邊遲月去。浣花溪上踏香來。三千煙柳搖湖月。十萬風篁透屋雷。自喜追隨同述作。果然陶謝是天才。

別謝于楚東下

碣石宮前話別忙。秋風忽到輞川莊。虛留客子登山屐。祇看貧家繞屋篁。帆逐冶雲歸建業。人隨雪水下潯陽。誰言白髮無公道。投老而今鬢未霜。

鴈字

僧有作鴈字詩者。衆詫以爲難。予乃與中郎坐橘樂亭中。角此題。自辰至午。各得七言律十首。都無一字同者。雖遠近離合之間。不能悉窮其變。而比物屬詞。差勝於塞澁。不能出口者耳。因悉存之。

雲漢溪藤萬丈長。規頰裁雨下瀟湘。有時密密排千點。何處匆匆墜一行。淩月乍同王燭

勁隨風忽作旭顛狂。果然寫出秋思曲。青草湖頭夜夜霜。

其一

先後參差結構同。同排筆陣向湘中。畫波隱現沉沉霧。使轉輕盈細細風。書去書來愁雨雪。文成文滅付虛空。偶然霞氣侵天路。仙篆丹砂燦爛紅。

其二

倒薤懸針點碧煙。依行燕雀似旁箋。路經練瀆重多態。影落巴江兩鬪妍。龍躍天門隨變化。蚓螭秋草失翩翩。慙慙寫就清秋曲。譜向江南十五弦。

其四

苦向西風憶斷羣。聯翩兄弟總能文。行分勢布剛辭渚。髮續絲禱盡入雲。河北峯巒生墨氣。江南田畝展羅紋。盈盈六幅瀟湘水。都作羊欣白練裙。(古人詩中有羅紋田)

其五

翩翩文采出烟蘿。電激龍盤勢更多。數點忽留如想像。一行纔起便吟哦。朝衝白月都垂露。夜宿青溪盡偃波。鋒鏑不須凌厲甚。前途尤恐大張羅。

其六

形容天上逼高寒。南斗闌干北斗殘。芳草池邊縈草易。白沙洲上畫沙難。疾徐總以昏朝  
變。肥瘦還須遠近看。宋玉宅邊逢燕子。緘書一字報平安。

其七

霞布雲舒縱復橫。祇爲過去要留聲。時和氣潤行徧好。日燥風炎陣未成。韻史也須稱弟  
子。宜官何處拜先生。前途若向長沙去。代我修書問屈平。

其八

動如得意靜如憂。力倦心慵且暫休。何用十年工八法。只將一字傲千秋。密來乍可同梁  
鶴。忙處還應效史游。不是衡陽過不得。金書玉簡好淹留。

其九

星河滅後見文章。妙處拖雲更挾霜。偶傍草邊尋鄭叟。閒過齋裏笑蕭郎。九霄已自懸珠  
玉。百口何須足稻粱。可是湘川多怪鳥。欲將封事上鸞凰。

其十

水作心情霞作衣。多能肋骨少能肥。煙籠雨暗青重殺。月冷霜寒白更飛。忽畫一橫詮易  
象。乍飄三點露禪機。江南儘有淋漓地。何事風塵要北歸。

新亭成卽事

量來八笏已周遭。左實莊周右楚騷。寬築垣牆圍笋竹。虛張弓矢護含桃。深林得月偏多影。小水經風也作濤。柳下萬緣書癖在。強如嵇鍛與劉髦。

送王以明南都應試

細雨春帆一笑開。潯陽九派起風雷。井生飽貯紛紛字。蘇子摩成游說才。有月便尋調馬路。無錢莫上散花臺。黃金館裏虛前席。只待譚天辨士來。

書三月初一日事

歲三月清明。玄在過我屋。自云能迎神。請焚香沐浴。竹箕啣木屑。花菓燦燈燭。篆符赤煌煌。浩唱迎神曲。倏忽燈無光。陰風來謾謾。題云是阿舅。夾山列仙錄。云口不能言。書之爾試讀。自我之云亡。已經幾寒燠。因果理無差。所修悉蒙福。上帝念我賢。母忝一方牧。仙位列崇班。瀟然少拘束。朝覲清黍光。暮食衆香粟。邑中已死魂。我眼悉能矚。伯修慧根深。青蓮已受育。吉翁福業牽。人間享尊祿。官谷念未熟。胎胞還再宿。我有臨終書。托嗣子付囑。生死亦大難。爾曹宜勉勗。無論墮泥犁。諸臯亦極酷。夜臺冷荒荒。燐火照幽獨。不見生時人。青楓林下哭。神明好升濟。白業要純熟。家有小男兒。煩君爲青目。已能學拜跪。婚姻宜可卜。意中頗戀戀。雖去未免俗。

昔時百尺樓。今已鬻天竺。哀哉樓上書。流落失卷軸。阿鶯既已嫁。嫁去我所欲。家門既孤寒。仗扶持是祝。語多不能記。大都念骨肉。言及小男兒。箕如以頭觸。我初疑非真。恐是游魂屬。窮以世外機。語語令我伏。鐵鎚生異證。泥船海不覆。香象帖天飛。白牛五隻足。開口注箭鋒。非舅那能速。我乃拜跪言。雙淚流簌簌。西華著練衣。孝標以文督。結交尙應爾。何況我自出。阿弟失父時。如我在母服。小者僅四歲。大者不盈六。舅時念黃口。撫養同顧復。愛我有智慧。長與異書讀。昔同客長安。助金買燕玉。諠笑忘形骸。寬假緣愛篤。三爲小縣令。亟牛鼎烹鶩。念我不能忘。時寄遠牘。受恩百倍深。人心豈土木。藐諸漸長成。甥等自親穆。虛空有鬼神。我言敢食不。剝喙如我謝。欲去復不。急雨蕭蕭來。迴風搖窗竹。

偶有俗冗入郡別箕營谷

棲隱剛旬日。柴桑又去陶。隨人偷筍竹。任鳥食櫻桃。習靜牀初熟。箋書筆未勞。豈因無客至。三徑長蓬蒿。

其二

細囑灌園者。吾忙返舊居。沒堦花莫掃。侵徑草先除。雀乳防傷竹。燕泥怕點書。盆池勤守護。恐有鶴窺魚。

江北道中

長途只傍水。聽水立江邊。撲面楊花雪。薰衣麥穗烟。遠帆行似住。深樹斷猶連。芳草平于掌。僮眠牛也眠。

其二

逢僧知寺近。玩水愛溪遙。戶戶尋蘆筍。村村入柳條。長堤隨獨馬。夜浦話雙樵。數點澆花雨。飛塵冷冷銷。

初至沙市張園苦雨

春晴暖日薰苗麥。僕夫脫衫走阡陌。一夕豆花雨淋淋。穿屋浸塔勢太劇。朝如扁戶絕來賓。夜似移牀避刺客。隔院琵琶不得聞。手把殘書愁脈脈。須臾天怒墨沉酣。千山萬山失青藍。擲海倒江夾雷電。聲如項羽破章邯。月額雨來兩相續。犁鋤生耳那須卜。塌井頽牆勢必然。令我翻愁賃荳谷。書生耳目無所寄。瀟瀟只有數竿竹。枳殼籬破垣牆倒。應有人去損寒玉。移植參天亦自難。忍把斧斤截嫩綠。不能迂闊效庾郎。怕惱偷兒自藏伏。世事牽我出牆東。故園花竹自膏沐。燕徑破窗綠暗暗。漏聲如語伴幽獨。停午細雨絲絲生。勉着高屐寺裏行。僧房寂寂門都閉。乍聽園基落子聲。

壽吳人沈翁（沈居郢）

紫極長生國。朱陵大隱鄉。看雲懷震澤。聽水愛瀟湘。盛德披銀字。高情潤玉章。美言成市好。尺宅治生良。馬足何妨數。鷗機久已忘。譽應浮口頰。寒不到心腸。影好人人見。耳鳴事事藏。木奴存俠策。麈尾笑書囊。康伯逃名地。君公避世牆。河成九里潤。雨澍萬家涼。花木高柔室。雲霞摩詰莊。鵝頭朝看帖。雀尾夜焚香。譜石三千甲。栽筠十萬行。請雲遮洞壑。郵水試旗槍。八節灘新就。五侯鯖許嘗。真身隨下澤。玩世逐高陽。投去陳遵轄。分來陸賈裝。室中青玉案。門外紫游韉。蘿月催乘屐。松風對舉觴。清尊邀劍客。寶瑟沸蘭堂。北里歌鐘細。南皮賦燭長。春秋依社老。日月付仙郎。九子蒲還在。雙珠樹已芳。既能歌白雪。不用祠黃羊。入夢真龍子。分毛自鳳凰。衣冠來北闕。奏牘似東方。宛國離離血。延津燦燦光。有封寧是素。不醉也堪狂。紫陌從生浪。黑頭未許霜。遲予三紀後。煙水共徜徉。

送張聚垣三兄還晉時以其先司徒公之喪入郢市榔木寓此

聚首甚相愛也

何期白首論交情。聽雨居然似弟兄。戒去鸞刀非佞佛。毀來雞骨莫傷生。人衝曉月辭沙市。馬逐奔星度柳城。倉卒已申僑札分。南山石爛不寒盟。



寓郢述懷

人皆有一癖。我癖在冶游。饒乏無前心。計算苦不周。中夜起長嘆。百慮如絲抽。萬事無巨細。逼迫乃成憂。憂來如春雨。日夜苦無休。以此一寸歡。博彼萬斛愁。

其二

篋衣質已盡。驅日竟無策。暮入慚妻兒。朝出慚賓客。忍恥告時人。人乃翻見責。早知逼迫難。何用隨手擲。自不重黃金。黃金肯相索。嚶嚶不能言。仰面看山碧。

其二

十年稟曇戒。枯草如冶性。春風一以至。草生更繁盛。追思臥柞林。六鑿願清淨。邇來逐繁華。歡多愁亦併。不獨損名名。所憂在疾病。猛日燦根荖。力與春風競。

其四

十萬修竹園。中有數間屋。竹色暗春窗。蕭蕭一人讀。風過響琳瑯。雨至如膏沭。世事苦泥人。一月幾回出。可憐林蘭花。無人伴幽獨。

長石何思二太史。過公安。長石用杜韻作詩。因次其韻。二公皆

訪仙歸

修竹封天翠。澄江抱郭寒。玄言浮齒頰。仙氣在眉端。訪嶽盟初定。登朝興纔闌。大丹如可就。鷄犬逐劉安。

其二

住馬問劉營。追隨弔古城。霸圖雖已盡。江怒幾曾平。亂世孫曹事。清時屈宋名。新詩奇僻甚。山水發才情。

步長石過公安韻時將值生日

擅招雷電泛江湖。謫作金門漢大夫。尙有丹砂生睡霧。總無白雪染頭顱。登山且喜身常健。出世還欣調不孤。燒筍留君君竟去。腐儒甯似郇公廚。

又步長石舟中韻

劉郎浦口阮郎歸。閨苑蒸霞滿薜衣。李泌身輕辭世染。休文腰瘦懺前非。人銜曉月聽潮去。帆逐分風帶雪飛。莫道長生學不得。離家三月貌能肥。

得慎軒居士無病消息志喜

決定知無病。西僧近而來。乾坤留道眼。河嶽護仙才。好雨兼風至。繁花間竹開。懶殘無誑語。計日聚燕臺。

其二

西來傳好事。起舞發狂顛。白社何多幸。蒼生定有緣。維摩聊示疾。弘景久成仙。禽鳥知人意。驢聲入管絃。

箕營谷暑中卽事十絕

三杯薄醉拂桃笙。一枕風牕夢也清。天氣晚涼新浴後。葛蕉紈扇竹中行。

其二

新笋俄然過醉時。長成拂雨帶雲枝。更芟老竹千千個。編作花蹊曲曲籬。

其三

枇杷林裏問冬青。池水正迎橘樂亭。旋築小臺看乳月。更將竹斷取浮萍。（斷如蟹斷之斷）

其四

蛇草靈花到處叢。堂前只剩一方空。當門斫去芭蕉樹。透過深林冷冷風。

其五

翻江一夜雨滂沱。門外油河長白波。隔水酒人呼不得。自傾家釀自狂歌。

其六

只許山僧對此君。柴門久已斷人羣。梅花與裏孤筇至。不是寒灰是冷雲。二俱高僧

其七

都無蚊蚋到禪房。幃帳何曾掛竹床。水冷石寒藏不住。癡人錯料有仙方。

其八

炎蒸日午氣如烹。潛入深林自在行。忽有濃雲西角起。忙穿竹徑已飄傾。

其九

擲江風散晚雲開。沉水星河遠一臺。半夜前林飛翻響。柳浪湖上爆聲來。(溟音耶)

其十

朝烟暮月幾迴新。世事何容到齒唇。三伏不曾還內閣。金鈴犢子吠來人。

打桃有懷園主人王官谷

和枝帶葉不沾塵。丹頰猶存一面春。只道種桃容易等。而今不見種桃人。

其二

大兒撼樹小兒忙。入草鳴階打石牀。拾取新桃三百顆。清茶沉水薦王郎。

送吳生東歸

一葉凌流去。江聲伴寂寥。酒澆盆浦月。歌逆海門潮。箋字文都滅。刀環約已遙。惟餘春雪在。生計未蕭條。

送彭長卿北遊

何處無游子。君行太可憐。老人年七十。北地路三千。夜雨投沙海。西風立渭川。餘生難自遣。豈不愛高眠。

賦得風林纖月落

宿鳥栖枝定。淒清趁晚涼。深林生衆響。密葉釀微光。竹露熒熒滴。花渠澹澹香。樓臺濃霧裏。薄雪在西廊。

其二

不辨烟林色。惟餘灌木歌。片時絨寶匣。無計挽修娥。樹影徐徐滅。星文漸漸多。溪楊歷亂處。螢火欲燃波。

其三

一縷穿阿閣。盈盈傍露條。似隨枝上下。如與葉飄搖。入樹烟嵐重。侵階水氣銷。何人閑伴我。清坐轉無聊。

其四

萬竅刁刁怒。一鈎冷澹斜。分妍與柳葉。墮粉着梨花。開士虛持貝。仙源不認家。靈妃歸路疾。先爲掃塵沙。

其五

搖竹難留照。亭梧尙有光。倚垣學顧盼。隱葉效迷藏。乍有芭蕉破。如聞桂子香。封姨休造次。無忌怕淒涼。(無忌月中仙人)

其六

澹澹荒荒夜。蕭疎畫不成。金箏千樹響。銀甲一痕明。紅葉將收淚。白楊只戰聲。何須重秉燭。靜默坐西清。

其七

緩去琉璃國。端居人意孤。林青山鬼笑。露冷夜禽呼。天地隨明滅。松篁乍有無。夜闌風更起。滂湃湧江湖。

七夕同彭長卿中郎

清譚閑送可憐宵。竹戶斜通宛轉橋。白水青林秋澹澹。好風涼月夜蕭蕭。貧來冶客傷時

序。老去詩人怨寂寥。驚鳥不鳴更漏靜。如聞銀浦弄輕潮。

### 雨中夜酌彭生

我唱君須飲。君歌送我觴。蜀聲多俊快。楚調也飛揚。繞屋奔雷怒。欺燈閃電光。片時風雨寂。明月在迴廊。

### 月夜同中郎至柳浪

清極轉蕭條。朱門傍曲橋。月溪千畝淨。風柳一湖搖。鳥語歌中亂。蓮香笑裏飄。老僧眠復起。披衲走茶寮。

### 灌洋道中

野店午雞鳴。編堤木槿榮。帶牽長荇密。梭擲小舟輕。水落存洲背。天空見樹城。擘江無上策。原隰少生成。

### 江上聽董五歌

沙市女兒不解歌。聽君一曲似韓娥。黃雞唱罷人初醉。江上東流奈樂何。  
曉坐

好風生樹露生臺。獨看明河步幾回。殘月朦朧穿殿角。近鐘纔罷遠鐘來。

沈生寘酒林伯雨園以病不至同吳未央徐楚楚賦得秋字

豈學元龍臥。腰肢怯隱侯。月來不待夜。風至易成秋。寫石花枝瘦。窺池鶴韻幽。良宵兼勝友。無主也堪留。

早發公安有感書呈中郎

大旆清笳逆曉風。青山新別住山翁。難忘園竹千竿綠。忍看湖楓十里紅。喜懼關心椿雪裏。悲歡滿目鴈行中。也知悟得圓通法。官署長林一樣同。

荆門早發遊惠蒙泉

出城卽是水。何不昨宵游。可惜好明月。空然照碧流。試茶分衆啜。寫字被僧留。若比康王谷。峯巒略欠幽。

泉上有黃山谷黃平倩大字偶題

濺珠噴雪沁心涼。瞥見銀鈎掛石梁。千古一雙黃太史。不知誰解木樨香。

麗陽驛

滿眼巉巖路。稍平聚落依。綠疇纒廬集。赤地便烏飛。風急催霜至。雲繁接日歸。豈因愁朽蠹。僑也損牆圍。



宣城道中

幾日羊羹路。能添鬢上華。南來愁怒嶺。北去悵飛沙。枳殼編籬密。楓林繞屋遮。久晴行役好。只是困田家。

道中聞柴車聲賦

蕭蕭百里見平疇。風吹草根原野秋。車聲軋軋不肯休。欲出不出溢難抽。利刀刺割銳且逾。下灘之水咽不流。吳中女兒好聲喉。忽。清噴雜歌謳。莫是青腰彈箜篌。中樹葉落鳴颼颼。羈官遊子馬上愁。酸風入眼淚雙流。古道黃昏我心憂。白雪如山在前頭。何不歸來走道周。

襄陽道中

積雪在平沙。澄潭宛宛斜。剪齊十萬樹。墨布兩三家。金子明籬落。樽蒲漾水涯。楓林紅不盡。散作一天霞。

其二

風煙猶楚蜀。音語帶周梁。人學養魚法。家傳種樹方。雪梨作茗飲。霜柿代餱糧。滾滾蹄輪接。玄宮與帝鄉。

襄陽道中逢龍君御時有出塞之行

已盡瀟湘路。同班聲子荆。漢臣重出塞。才子更譚兵。楯鼻書奇字。饒歌有正聲。偶然看舉止。令我念亡兄。(君御與伯修甚骨)

贈龍君御僉憲備兵甘肅(君御前倅秦中)

風流儒雅漢仙官。笑靖胡沙學謝安。十載旌旗重出塞。早年詩賦已登壇。別他漁浦花千樹。度盡函關雪萬盤。邊地近來痼瘵甚。知君不用惠文冠。

其二

大漠陰山朔路遙。雪花亂點漢臣貂。前茅虎旅傾秦甲。後帳鸞雛盡楚腰。香茗開中書露布。管絃聲裏破天驕。邊人佇望從軍樂。竹馬迎歌何暮謠。

裕州道中

千古中原路。蕭條似大荒。朝廷急賦稅。刺史歎流亡。原兔藏烟突。春禽乳畫梁。從來嘯聚地。招撫有遺崗。

鄴城道中

天網羅奇士。雲臺集勝遊。才人千羽蓋。鼓吏一岑牟。水咽銅駝月。風喧石馬秋。南皮無俗韻。漳浦有清流。

其二

怪得如丸地。能生許俊人。寫螺山有態。照膽水無塵。樂府挾詞麗。漁阿唱梵新。泥蛙非繡虎。亦可作嘉賓。

其三

只作詞場看。何人不可傳。霸圖無永歲。文字有長年。甄女蒲陳怨。何郎粉唱玄。至今臺上瓦。和墨尙生妍。

其四

看碣墜義和。鳴鞭下峻坡。人悲臺樹少。狐喜墓田多。山出濃鬢嶂。溪流錦石波。英雄無俗氣。解道酒當歌。

其五

司馬門前醉。翻成泰伯賢。文章勞反胃。世路歎磨錢。五字銷奇氣。千杯送壯年。英雄韜不盡。一箭兩禽連。

其六

若話丹臺事。乘除理亦然。兩龍成霸業。一虎作神仙。天上無愁酒。人間有限年。阿甄雖婉

麗不及玉妃研。

其七

驅馬莫匆匆。慧人聚此中。塵沙搏粉黛。車斗算英雄。散火妖啼月。旋空鬼戰風。三臺猶可數。何處問離官。

其八

山是才人宅。地爲霸主郵。流星傳璽綬。飛電轉神州。玉帳春鶯在。金題海燕留。青青陵上草。天子永無憂。

其九

白日不同照。夜臺或有春。交虞學鳳嘯。委木蛻龍鱗。沙陣迷歸騎。石城嚙去輪。冬衣猶未授。何處問針神。

其十

乍有雨聲至。蕭蕭見白楊。山川存舊韻。草木嗅餘香。野寺鐘聲月。官橋石路霜。重臺猶可步。無奈遠遊忙。

銅雀硯歌爲黃觀察賦

魏帝當年愁寂寞。半謀征戰半行樂。自言朝露去時多。高築三臺結綺閣。西園才子唱新詩。南國佳人藏綉幙。玉柱金題化爲烟。至今碧瓦臺邊落。當時英雄好文雅。山川佳麗草木冶。風流詞藻氣蕭蒸。遺瓦猶堪俱揮洒。留與人間作結鄰。風味龍尾不如麀。晉院唐官收不盡。猶餘一片在荆榛。野人將來獻使君。手自磨抄辨款文。笑道古人作事異。一瓦重來十八斤。珍重付與老鈴下。高齋盤礴任揮寫。行草八分信手塗。一弘春霧自傾寫。寫罷解衣發大叫。雪花墨光相照耀。中書歡喜廷珪噴。遠山袖手微微笑。一朝醉我漳江畔。尊曷中間誇古玩。長髯堂吏雙手擎。文綾未展先稱讚。果然古物無如真。潤澤光瑩眼未見。不用琬琢自精堅。先朝物力那能算。笑謂使君英雄客。四十方面門列戟。肥腸巨樹有用人。大纛高牙勢赫奕。只今邊徼要奇才。走馬櫛槩出疆場。斗大鵠印肘後懸。安得蕭閑伴冷石。前年長安會大蘇。蠶尾銀鈎世所無。一從傳子運腕法。自笑端不讓官奴。行草翩翩入勝場。只是濡筆少精良。光滑油來不受墨。骨粗又苦損毫芒。使君劍戟尙紛馳。獨我清閑好臨池。慙慙擲與米顛去。便是貧兒暴富時。

中郎有鄭州憶伯修詩感賦呈中郎并示方平

君在我未貴。常念我貧賤。我貴已有期。君容不可見。五十非上壽。不能延漏箭。道上白頭人。滾滾如沙霰。有鬢不待玄。有顏不待變。回思一生事。急急如飛電。昔時授餐館。粉壁猶未換。

道旁嫩楊柳。曾識舊顏面。忍棄以待蔗。蔗尾終如幻。同官三四人。亞卿列朝殿。天上好亭塗。只是少壽算。貴賤不足論。長年殊可羨。百里千里程。十聲九聲歎。生存好兄弟。永作白頭伴。形影相追隨。莫效離羣鴈。

涿州訪頓年丈園中

家世爲廉吏。無多負郭田。豈能凋素業。只是守青編。一水如凝雪。千峯盡吐蓮。入門莎不剪。名士韻蕭然。

送李西卿參知湖州

金節新頒出九天。春明南去草芊芊。鏡中鬢髮如螺黑。腰下金章似火燃。千里泛家臨水國。萬人遮馬看神仙。建牙吹角渾閑事。聞道而今是少年。

其二

文人例合住湖州。墨妙飛英續勝遊。紫囊仙曹辭畫省。黑頭連帥領諸侯。春山繞郭朝乘屐。遠水浮空夜上樓。才大官閒多韻事。畫眉盤馬亦風流。

密雲寄別四弟

錯料金生事。蹉跎又一春。夢腸才欲盡。鐵羽淚猶新。老矣吾何計。歸歟爾未貧。故園風物

好珍重侍嚴親。

其二

幕府方留客。那能送汝行。艱難別愛弟。涕淚望都城。野館濃花氣。春塘沸水聲。親朋如借問。投筆欲從征。

別陳孝廉

同是蕭條易水年。兩人幕府共床眠。山游且學鄒從事。米價難支白樂天。杯裏楊花胡地雪。夢中芳草錦城煙。陸郎已上班驢去。帶草離離伴鄭玄。

太保蹇令公一見辱以國士知率爾投贈共得七言律八首

三朝元老帝長城。胸貯雄邊百萬兵。太尉領軍陪漢相。上公分陝護周京。卿雲不散投戈色。夜雨猶聞洗甲聲。白袷青編無一事。蕭然還是舊書生。

其一

天家鎖鑰重漁陽。親遣元臣鎮塞荒。白羽扇中塵屬國。青油幕底拜降王。鶯花煖送千門雨。介冑寒生六月霜。身事累朝關社稷。中宵私語跪焚香。

其二

大旆春隨柳帶翻。建牙吹角幾寒暄。惟將安靜酬君父。止以清廉畀子孫。署裏葵蔬閒視圃。邊垣禾黍盡成村。浣花溪上思垂釣。師相那能避主恩。

其四

塞北重欣借寇君。琵琶曲裏說功勳。校書百帖高連屋。種柳千行翠入雲。魯國到門諸弟子。漁陽迴席舊將軍。太平銷盡干戈氣。閒却袁家倚馬文。(太保曾督學山東)

其五

早年節鉞便登壇。歷盡羊腸幾百盤。怒擲千金會長哭。密誅三校悍兵安。梧楸局外吹毛易。劍戟林中任事難。白髮老臣憂世道。艱危未必是呼韓。

其六

戟枝入樹帶春鶯。坐看邊峯雨後清。萬卷每同袁伯業。千杯不讓鄭康成。山程幸逐登臨屐。月夜熱聞函道聲。止恐三台虛上相。尙書尺一要來迎。

其七

屹然全似魯靈光。虎峙龍盤狐兔藏。處世心同羊叔子。立朝歲比郭汾陽。止將文酒銷戎隙。懶把笙歌貯畫堂。擬報國恩歸未得。夢中常到午橋莊。



其八

經營南北閱年華。聞說活人事已奢。棨戟門庭傳素業。瑤環仙子吐奇葩。千枚簡策同何氏。七葉金貂事漢家。尺宅寸田堪不朽。何須粒棗大如瓜。

密雲署中贈別周子還里

中之仕少良謀。輕將朝市換林丘。下澤爲車款段馬。鄉里善人稱少游。令公纛下士如雲。掃門行炙上將軍。驍騎材官可唾取。君却掉頭如不聞。自言身世無所羨。雖家旣久思鄉縣。有頭慵着進賢冠。有手懶控大羽箭。夜踏月光聽水泉。朝衝浩露看原田。歸去閉門教兒子。長養山中草木年。

送人新授材官南歸

漁陽古署花不掃。終日踏花聽新鳥。覓得靈文苦伊吾。拭目明窗手自草。古言直心是道場。天真不琢絕機巧。紅塵赤日出燕關。西川猶自在天杪。告身一束也風流。進賢輕不到人頭。書生燈火幾年載。猶帶儒冠着敝裘。君不見袁小修。

署中聞蟬

乍聞聲切切。便覺樹深深。長日幽人意。空山靜者音。不妨雜畫角。聊與伴瑤琴。吸露絕塵

萍吟成擲地金。

其二

高柳孤鳴處。千聲一息時。風來傳靜院。雨過沸新枝。此地聞孫嘯。何人唱楚詞。清秋猶自遠。宋玉漫成悲。

其三

習叨叨苦自忙。話來清切處。不必用宮商。只益青山靜。能添白日長。翼隨雲氣薄。聲帶露華香。千古文人

蔣子厚。眞長尙之。看新月。時子厚。新自都中來此。

月與人同瘦。輕寒向晚生。薄施風樹影。澹咽水泉聲。盡祛周何累。稍如維迪清。嘿然亦自好。時有暮禽驚。

夜月

遲月月升林。涼風細細發。莫教塵想生。點污松邊月。

其二

明月在松枝。光凝枝上露。和光和露寒。沁入心脾去。

蔣子厚以詩投贈訊以詩旨予非其人也書此志答

風雅久迷津。文體歸酬應。塵務一經心。天分摠爲病。俗腸非慧業。媚世少高韻。膏肉不畫骨。筆底失神駿。出水芙蓉鮮。寧與雕搜並。花月及江山。千秋寫不盡。愈出乃愈新。發矍精光映。道人無剩技。所樂在閒靜。不雜烟火塵。泉石爲正令。二何與弘景。吐詞韻秀甚。積迷忽以開。此心如明鏡。萬象絕搜求。按指發海印。公主擔夫爭。大娘舞劍迅。小技需神悟。况與騷壇競。努力窮其源。珠泉吐清詠。聊作洗金鹽。此道予不佞。

夜

不復思文字。披衣帶月行。粉牆松樹影。靜夜柳枝聲。獨酌忽成醉。無家也自清。閉門孤寂處。贏得會無生。

卽事

五更車柱雨。積水未全銷。初日穿深樹。曉風清石橋。淺池窺獨鶴。密葉湧叢螭。鸚鵡金籠貴。能無念碧霄。

其二

巖岫知何意。烟雲常自牛。靜餘苔少跡。秋信樹多聲。謝客山容健。王微病骨清。不知綠底

事飄泊在檀城。

曉

不識是何鳥。天明話百般。枕邊聞掃葉。夢裏說游山。除慾先除慧。學禪且學閒。覺來開眼處。無事到心間。

有懷

拭盞清光後。陳琴浩露初。竹樓常至鶴。池養自來魚。江氏十莖草。班家萬卷書。小園數畝地。歸去理葵蔬。

惠安伯張公園中芍藥盛開可十萬餘本同顧升伯李湘洲二  
太史中郎諸公往賞之有作

廿畝畦塍地。栽蔬已是繁。如何幽徑轉。但見雪濤翻。顛子難分色。旋心不辨痕。楊州花事減。那得似名園。

珂雪齋詩集

卷之四

詩

感懷詩五十八首

署中無事。誦讀之暇。默然枯坐。四壁光瑩。偶有所思。提筆書之。念故感今。醉語嚶言。參差不倫。不忍棄寘。命僕從壁上錄出。共得詩若干首。

朝見日東生。暮見日西沒。日沒樹影藏。日出樹影發。移牀隨樹影。披衣任散髮。荇帶走澗迴。紫苔波滑滑。人心若清涼。炎曦似冷月。

其二

天意忽欲雨。諸山起翠鷲。一峯綠油油。忽出青藍外。倏然晝昏黑。九域起甘霖。花溪曲曲流。都赴石橋會。石渠流不迭。激激發大顛。宿雨藏密葉。欲往不能蓋。

其三

沿溪兔目繁。綠柳枝垂鏡。雨過出曦陽。蟬聲更熾盛。別有急音聲。切割如刀刃。儵然成穩

眠。金馨出子定。

其四

望風風不來。望雨雨不至。惟餘疾雷聲。不測皇天意。垂柳入電光。金枝變青翠。疾若阿欻國。一現失明媚。何必對金樽。佳茗作荷氣。不用逐陳編。默坐有清致。枕簟易餘涼。黜黜成佳睡。

其五

少時有雄氣。落落凌千秋。何以酬知己。腰下雙吳鉤。時兮不我與。大笑入皇州。長兄官禁苑。中兄宰吳丘。小弟雖無官。往來長者遊。燕中多豪貴。白馬紫貂裘。君卿喉舌利。子雲筆札優。十日索不得。高臥酒家樓。一言不相合。大罵龍顏侯。長嘯拂衣去。飄泊任滄洲。

其六

步出居庸關。水石響笙竽。北風震土木。吹石走路衢。蹀躞上谷馬。調笑雲中姝。囊中何所有。親筆注陰符。馬上何所有。腰帶五石弧。鴈門太守賢。琵琶爲客娛。大醉砍案起。一笑捋其鬚。振衣恆山頂。拭眼望匈奴。惟見沙浩浩。羣山向海趨。夜過虎風口。馬踏萬松株。我有安邊策。譚笑靖封狐。上書金商門。傍人笑我迂。

其七

北登恆山頂。車蓋雲茫茫。中心忽愁思。思我兄中郎。去去信馬首。幾日窺劔疆。潞河沙浩浩。衛水流湯湯。清淵飲美酒。彭城待秋光。黃河迅竹箭。忽若鳥飛翔。含淚拜漂母。流落歎韓王。五日芙蓉水。送我到維揚。不見雷塘路。不聞瓊花香。舊橋二十四。塵土撲衣裳。金焦望海關。梁溪酌泉涼。錦纜青雀舫。忽已到金閶。追尋聽雨樂。清譚殊未央。

其八

清譚未云幾。邸舍厭高眠。凌雲振羽翮。吾志欲遊僊。聞道天子郭。真人下九天。道引八百人。同日凌紫煙。是事有與無。我欲訪幽玄。泛舟西子湖。澹水豔紅蓮。螺風幻諸峯。玲瓏發巧妍。振衣嚴陵灘。曲折愛清漣。水中石齒齒。山上草芊芊。朝度芙蓉嶺。嶺與天相連。空山無人處。花落流涓涓。白月上衣裳。畫沙坐水邊。訪之無要領。一笑九華顛。潯陽十二派。震怒響山川。瀟湘急雨裏。白浪打行船。復歸舊棲隱。掃榻弄筆研。

其九

輕帆止江涯。家山在煙霧。振衣入郭門。城池已非故。朱門湧清波。長堤亘衢路。手植門前柳。彫蔽成高樹。道逢小兒子。長揖向阿父。入門眷屬驚。猛犬狺狺怒。昔時攜手人。大半先朝露。感舊有餘悲。歎逝傷情悽。

其十

山村松樹裏。欲建三層樓。上層以靜息。焚香學薰修。中層貯書籍。松風鳴颼颼。右手持淨名。左手持莊周。下層貯妓樂。眞酒召冶遊。四角散名香。中央發清謳。聞歌心已醉。欲去轄先投。房中有小妓。其名喚莫愁。七盤能妙舞。百轉弄珠喉。平時不見客。驕貴坐上頭。今日樂莫樂。請出彈壁篋。

十一

昔時舊酒人。傾尊定酒帥。一吸百餘盞。酒徒皆羅拜。是夜月如晝。大堤共于邁。狂歌若奔雷。長江吼滂湃。居民不得眠。親黨皆噴怪。精悍在面顏。零落舊壇會。回首憶當年。咋指以自戒。

十二

阿香皎如月。阿雪温如玉。湘文授書郎。七絃彈黃鵠。芙蓉詫腴五。水僊寫癩六。金閨憐慧卿。鳳凰橋上哭。章華歌者玉。梅花清芬馥。回首看朱樓。恍然猶在目。金石尚且摧。何況粉黛速。多半玉鈎斜。青楓根下宿。發願誓空王。清淨以自勗。稽首告天姝。我情成土木。今生賤已矣。來生莫相逐。

十三



一自入情緣。棘蓬忽身墮。愁令不耐生。恨令不顧禍。竦身出重圍。天蘿挂衣破。幸然除熱惱。清淨已心諾。既向棘中出。不回棘裏臥。南山有危峯。瀑泉如雷過。開牕聽水聲。掃地焚香坐。

十四

偶景青蔥下。崖岫弄峭清。倏聞懸雷響。自爲勝九成。世樂豈不樂。不如清冷雲。孫孃亦自好。不能留許生。若華富文藻。晞也無復情。如何馮敬通。不知出塵纓。終日房櫳裏。耳聽布穀鳴。

十五

雲戶蔽岫寢。巖危對桂榮。秣芝浮霜淨。剪松沉雪清。憐肌蓄骨髓。寶氣愛精神。腐鷄看梁錦。土石視侯卿。哀哉夸毗子。膏火日縱橫。生滅攪夢寐。途長空苦辛。

十六

回數八驥先兄弟。長安陌阿。大官詞林。銀傍侍經席。白面漆髭鬚。三駿馬赫奔。中郎列虎闌。簪袍映列柏。予時爲諸生。時時分米赤。伯也有新居。是舊江陵宅。前有抱甕亭。後齋名蘇白。塔前種花竹。森森無遺隙。春日弄微暄。簷下坐歡適。兄云家門盛。伯仲繼通籍。獨子時不遇。萬里鍛羽翮。予云兄無言。萬事怕嘖嘖。卽此是盛時。此盛恐難益。但恐後視今。今翻爲奇迹。此言猶未寒。伯也歸寂寞。蒲桃林不改。零落碎圭璧。欲哭近婦人。感歎坐終夕。

十七

友于有至情。傷哉王景玄。阿謙一以逝。拊心祇自憐。昔時寶三光。割嗜以祈年。今也惟速化。不望世間延。感此淚如雨。零落彌歲年。會合亦有期。定志在青蓮。

十八

風神綠戢羽。麝走爲遺香。如何英靈士。耿耿露寒鉉。激鍛多大韻。搏黍見顛狂。世路雖險巖。藏身亦乖方。山北與山南。白石可爲糧。流連塵網中。哀哉罹禍殃。回首五松橋。譚易析毫芒。惟有聰明泉。流水常湯湯。發言潛寶契。一室閉蒙莊。舊存人已往。撫卷有餘傷。

十九

龍章與鳳質。叔夜何清遠。神明忌太適。流俗惡狂嫺。坦非鄰險地。險者疾其坦。馴卽非龍性。龍性豈求免。揆景奏鳴琴。一曲消憤懣。以此七尺身。頓令網羅管。胡不從公和。藏身何太簡。楊氏欲見招。翩然不復返。衣冠雖已潛。常在黃馬坂。

二十

古人重結交。意氣身相許。抽心有至情。贈饒不足語。曹敞收吳章。脂習哭文學。郭亮葬李同。胡騰埋寶武。豈不畏死生。攘臂赴砧俎。交情重丘山。忽令無處所。何人無緩急。夜半擊扣戶。

猶且難。安能挑乳虎。慷慨有餘哀。擲杯以中柱。

二十一

夜夢大峨嶺。積雪天際頭。爽氣入心脾。清冷透衣裘。山下有高士。圭壁凜清修。輕財若筭。鐘重館等山丘。名理羅二氏。技藝綜九流。晤對萬山中。清言可消憂。我欲從之往。惜哉無扁舟。安得生羽翼。凌風以遠遊。

二十二

朝亦對青山。暮亦對青山。青山不知名。常在牕櫺間。我欲登此山。見之不得攀。洗塵一日雨。忽似美人鬢。謝公調馬路。惆悵感心顏。

二十三

轉出古北口。暮歸滄陽道。馳馬走平原。箭如餓鷓叫。習習耳後風。醉餘發長嘯。呼韓過不先。藉藉餘歌笑。壯志久已銷。百城從所好。

二十四

愚者願爲知。知者願爲愚。知者多計算。一息幾百馳。古來飲酒賢。陸沉心中悲。心中何所悲。了了翽神思。奈此了了何。溷之以酒卮。酒多寧不病。幸忘知了知。李云嗜非甘。樂取其昏迷。

分別不留行。渾沌近無爲。此是似現量。猶可遺歲時。現量况于真。不樂復何之。

二十五

栗里有醉石。平泉有醒石。醉石令人醉。是非總消釋。醒石令人醒。恩怨生劍戟。是非既消釋。宇宙何不適。劍戟可傷人。迴刃亦自刺。所以栗里子。一笑易其質。平泉無主人。魂兮歸不得。醉石可爲珍。醒石宜棄擲。

二十六

月額雨相續。人皆愁雨苦。我有千卷書。不愁千日雨。雨氣冷楹軒。開牕玩今古。親與古人譚。丹鉛代塵塵。有時挾皮膚。昭昭見肺腑。文錦勝天孫。快舌類鸚鵡。只此十笏地。無日不歌舞。珍重謝天公。無妨作霖雨。

二十七

墨子行十笏。姬公朝百篇。采栢閑暇日。牛衣記誦年。古人急典籍。窮困且益堅。安坐蠹衣食。何不親韋編。妍皮裹癡骨。張口坐雲煙。私景亦有言。才鬼勝頑僊。此理通出世。毋爲惜丹鉛。卯金詔博學。上帝遣人觀。

二十八

六經爲梁肉。子史爲鼓吹。百家及稗官。海錯羅珍奇。譬若延大賓。庖廚萃膏腴。飽後江瑤柱。亦能佐酒卮。煌煌銀印文。妙理抉玄微。可以開心眼。華梵非所知。持衣在得領。索食重療饑。如何郊天鼓。必用麒麟皮。腐儒八十宗。穿鑿亦何爲。鑿井失美源。有若天南箕。

二十九

貴耳賤其目。千古同一揆。親見楊子雲。名邇位尤卑。覆瓿視太玄。抵掌笑其愚。張率假沈約。虞詡頓稱奇。虬之清思賦。託名乃見知。文章有定價。世眼迷真偽。馬脾及牛頭。嘈嘈以相師。世名何足取。留之待來茲。千秋無贗本。惟餘瑋落碑。

三十

山禽味以知。水禽味以長。箕畢殊嗜好。朱紫異文章。千古才人習。任情以雌黃。好之則爲羽。惡之則成瘡。子才重沈約。不爲彥升臧。魏收慕任昉。抵掌笑沈郎。俗態胡爲爾。三斗貯爛腸。心如諸葛秤。那能輕低昂。大海控八河。一味少參商。

三十一

修詞有慧脈。妙處在生動。非法非無法。寫照阿堵重。小夫嗇才情。託法以自控。大音無細響。嗤之爲豪縱。徐熙花寫生。新意出時衆。黃筌妬其能。出格以爲諷。

三十二

人多悲秋氣。我獨愛秋聲。洞庭一夜脫。蕭瑟有餘清。梧葉飄空掃。蟬風走且鳴。草園啼絡緯。蟋蟀嚮四楹。大化遞遷流。日月徂且征。萬卉漸零落。刻露見山岑。黯黯繁華色。枯槁不復侵。譬如學道者。披剝見天根。

三十三

日暮望遙山。絳霞散林野。如雪如素練。晃耀亂山緒。白者移過樹。乃知是人也。暮色蒼然至。牛羊皆來下。萬物盡有歸。擾擾何爲者。

三十四

少小讀詩書。志欲取青紫。命也可如何。七上七迴否。棄置如蓬麻。誰憐一段綺。緝絲出藕腸。剝膚洞石髓。過眼一蚊虻。參差逮暮齒。膏腴傳世間。資潤後來士。拾取牙後慧。翩翩見雀起。自憐射雕兒。控弦無虛矢。何爲獨流落。刺頭入故紙。

三十五

黃金高築臺。樂毅爲燕客。三星聚虛危。管仲走卽墨。當其護落時。所憂在朝夕。一旦乘風雲。時主望顏色。何代無奇才。欲飛無羽翮。治世拙雄圖。流落在草澤。不解作駢語。終身墮荆棘。

流汗負鹽車。困窮理亦劇。一見解紵衣。長鳴淚雙滴。

三十六

終軍棄其襦。郭丹投其符。昇僊橋上客。携賦入神都。升沉指顧間。弩矢耀鄉閭。惜哉瑰奇士。年年泣窮途。末世網目密。不采布衣愚。低頭營疏箋。霜雪點頭顛。英銳宜蚤用。老矣難馳驅。

三十七

千古相如才。千古相如遇。當其不偶時。親着憤鼻袴。一朝見明主。視草承天廟。更有黃衣翁。催作大人賦。鬼神亦憐才。才高鬼神慕。餘芳襲後來。實之高士數。慢世未必然。文采爲士附。

三十八

夷羊旣在牧。飛鴻滿路歧。割鼻以飴口。息主能無危。洛陽銅雀聲。久矣絕鳴期。秣馬金閨歌。志士有餘悲。子陽識桃亡。知伯悟炙遺。大者蔽泰山。小者如列眉。頭瞻問道衰。費子亦何愚。豈憂河水濁。不如清淚滋。湯波欲止瀾。徒爲衆鳥嗤。

三十九

貧窮難久處。憔悴苦心神。親友旣疎遠。妻兒或反唇。中郎著九惟。自歎星值貧。應璩遭霖雨。得粟復虞薪。機榻已見謀。一飽復無屐。尺帛不得貸。易水哭蘇秦。人生固有命。天地豈不仁。

志士百鍊剛。固窮以爲珍。口腹安葵藿。烹飪非所營。落毛以蔽體。羅綺非所親。但令心無累。聊以適此生。

四十

陳蕃所憩家。已定玄籙期。華歆夜聞語。懸記北陵時。鍾山一丘土。萬日前已推。人生數有定。何必苦奔馳。飲水亦有司。貪求復奚爲。所以物外人。淡然少思惟。自心徒冰炭。定命豈可移。勸君息妄想。毋爲路鬼嗤。

四十一

孔雀愛珠毛。終爲羅網嬰。靈龜白銀骨。亦以災其身。陵雪戒長塗。滅蹟必無因。鴻鍾旣在御。豈能消聲塵。人苦名不高。名高益苦辛。世亂求退難。羅網孰耽陳。南山有隱地。子孫何避秦。已矣復何言。退藏以爲珍。

四十二

昔我先邵公。高誼凌千春。皎懷若白雪。直節似朱繩。四世承素業。曰惟儉與仁。路中悍鬼者。驕奢墮家聲。密飯行絳道。率以自圯傾。乃知安恬素。實爲保世珍。吾家有夏甫。亂世解藏身。土室誦貝葉。千秋爲典刑。



四十三

夢入梅花嶺。行至萬松處。松聲如奔濤。喬木葉虧蔽。重湖得日色。晃耀蕩遠素。好鳥一聲來。清寐修非故。憶之不能忘。塵鞅催上路。三徑候已荒。欲往非朝暮。

四十四

一別箕畚谷。荒蕪心常切。小阮八行來。園林轉茂密。入門石容古。垂籐不落格。行至竹香徑。新笋成高節。微風一以至。萬竿響琴瑟。來禽與枇杷。森森皆結實。含桃多布子。采之得一石。黃柑壓樹繁。甘美殊可噉。八月木樨開。香風十里徹。臘月梅花放。冷冷一天雪。飛卉不勝書。大抵皆茁發。止是無主人。寂寞誰賞適。覽此令人歎。南歸興勃勃。如何走塵沙。不還衆香國。

四十五

家有百畝田。膏腴可以耕。家有十畝園。竹樹何蕭森。老農以爲友。老圃以爲隣。二十七種菜。庾郎昏度辰。肉食由來鄙。葵蔬養性靈。道旁有祕藥。名載于僊經。金鹽與玉鼓。可以致長生。

四十六

初日照燕市。燦燦若緋桃。劇藕縈天絲。羅綺不勝驕。銅駝集冶子。金馬羅賢豪。濯龍門外車。日暮恣遊遨。趙李經過樂。歌舞無昏朝。一歲復一歲。韶華易爲銷。人語暫時歇。鬼語復嘈嘈。

鬼語復何道。九陌生人勞。九陌生人勞。土盡槐根高。

四十七

天門平旦開。綺羅朝市盈。白馬桃花綬。拱揖似羣真。尙冠羅威里。履道聚公卿。堂堂槐與棘。軒軒入承明。紫貂映霜雪。呵殿似雷聲。不知輿上誰。見之心膽驚。燕市多飄風。常吹陌上塵。一層塵已去。一層塵又生。

四十八

盛衰不可常。閱世惟山丘。豈待華表鶴。歸來慘離憂。譬如日及花。朝夕零陌頭。四世青廂史。五代赤泉侯。一朝時運改。蕭瑟如凜秋。亟念春漿泣。鴟爲腐鼠愁。富貴若常在。樂應屬爽鳩。

四十九

九衢喧漸靜。日暮動歌鐘。冠帶各相索。眞酒會羣公。水陸陳異品。美醞清若空。子夜馱馬啖。澹脆間醇醴。妙舞清歌輟。閒房坐從容。翩翩周小史。有如在東。和顏善調笑。清冷體柔豐。如何青桂樹。寂寞伴楊雄。獨餘書帶草。冉冉隨輕風。

五十

時平才士貴。仕路渺雲霄。乘時策高足。毋爲沉下僚。有如指日輪。無蹟自成高。有若乘風

御不往自迢遙。但知問升沉。誰覺素顏凋。君看龍尾路。磚石砌堅牢。朝蒸成窪跡。石泐磚有銷。今朝耀黻綬。三綵桃花嬌。設撥與沈楡。轉盼不相饒。宦途亦有涯。念此使人焦。

五十一

朝爲魏其客。暮爲武安賓。昨日長平吏。今朝拜冠軍。時來手可熱。鶴蓋畫成陰。紫駟塞門巷。意氣何繽紛。一朝勢零落。雀羅冷戶庭。綺席厚蒼苔。蹊路草青青。輕薄逐暄寒。蟬翼未爲輕。徒令旁觀者。蒼狗笑人情。

五十二

西北有高楼。望見連雲宅。黃棘北煥間。寘第無遺隙。金盞與玉盞。門前羅畫戟。五婦呈奇峯。三侯羅怪石。鬱鬱鴈翅槍。森森珠子栢。亭臺無復改。惟見主人易。今日金吾館。明朝侍中室。所以築夫言。致令郭令泣。寘鉄爲門關。路鬼笑額額。

五十三

中夜起望氣。異氣何氤氳。黃者爲金膏。白者爲玉英。惟有銅錢氣。轟轟如青雲。錢氣如青雲。此語毋乃真。君看青銅子。行樂四時春。陌上飛紫燕。矯首凌蒼旻。

五十四

燕趙多冶女。初日照芙蓉。紛黛失顏色。羅綺怯柔豐。粧成度新曲。鶯燕娛芳叢。冶遊誰家子。騎馬若飛龍。日暮上高堂。琵琶出簾櫳。左手典奴好。右手曹綱工。今日樂云樂。但醉莫匆匆。君看桃李花。暫盛終隨風。郊外白楊路。十里馬鬣封。牧兒坐其上。狐兔穴其中。枯骨當時在。小語面發紅。

五十五

吳國有館姓。楚國有章華。不聞香水溪。惟見金葦花。綺羅氣銷盡。皆爲空王家。赤華藏貝葉。青豆貯袈裟。乃知色爲空。塵土悟豪奢。

五十六

天弓架日箭。遙遙射四時。人命非金石。傷哉露易晞。阮藉與陶潛。世累瀟然離。此情難擺落。迷之以酒卮。積金東澗土。選客屬大虛。流珠雖在龜。對月常歎歎。世人如犬羊。時至任烹脔。豈有慧心人。能忘生死悲。麥化宜以灰。痛飲亦何爲。

五十七

人生貴不朽。不朽亦非名。寂寞身後響。枯骨詎有靈。嗟彼啖名客。生時苦怛營。前有杜武庫。沉碑入漢津。後有顏尙書。鏤石寄高深。七尺爲塵土。贊毀寧我親。別有不朽方。欲言難語卿。

火布怪曹子。蝦鬚駭滕生。

五十八

何必蒸靈芝。何必潤澄泉。何必晞朝陽。何必綏五弦。一心苟不生。萬化無虧全。不捉疑索蛇。毒怖豁心田。不求網吹滿。終日樂陶然。我有養生術。無身亦無年。扣之不卽應。露柱語便。

檀州書院有龍爪槐枝葉婆娑女蔭覆數畝詩以紀之

幕天茵地錦屠蘇。龍種居然萬卉殊。聊借籐蘿藏火甲。欲搏星斗作明珠。冰霜屯結寒池館。鱗鬣開張入畫圖。莫怪婆娑須拄杖。中郎醉後要人扶。(用蔡中郎醉龍事)

凌總戎招飲北極樓

兵戈散盡古漁陽。有客相延看大荒。胡地諸山如拜舞。漢關列岫自飛翔。閑持杯酒觀雲變。斜倚欄杆嗅雨香。留得庾樓風景在。他年來此醉秋光。

京師雨大注會長石太史以詩來因屬和

等閒塵土變清流。鳥爪僊人笑不休。履道宅中惟貯水。善和坊裏好行舟。高車何處來驚坐。曲室差宜貯莫愁。恆雨恆陽公等事。漂城陷邑我忘憂。

別中郎南歸時偶值嫂及庶嫂之變榇車雙發不勝酸楚離別

之情可知因賦詩十首

患難催人別。重尋舊薛蘿。綺琴傷鳳靡。寶瑟怨鸞吡。夜月寒燕市。秋風撼潞河。臨歧悲骨肉。此地客魂多。

其二

束髮爲廉吏。饑寒不自存。那能甘豹隱。頗亦仗魚軒。蒿里歌相續。春曹席未溫。同來不共返。南國費招魂。

其三

秋輝冷射堂。蒲社草荒涼。笛裏纔思舊。閨中又悼亡。白波喧建業。紅樹染潯陽。未病先儲藥。生平解老莊。

其四

牛衣君自念。蛇膽我難尋。萬里工程苦。兩河秋氣深。戍煙生夜浦。巢影露寒林。花草雷塘路。凋殘舊日心。

其五

少別與長別。應無不散筵。生來薰白業。家世種青蓮。了却鴛鴦夢。閑尋鷗鷺緣。也知憐稚

子不娶效先賢。

其六

憂來不下淚。笑裏帶傷神。霜葉如羈客。秋天似去人。休心憑宦拙。省事任家貧。柳浪湖邊水。排愁看遊鱗。

其七

漸與道人似。歸來梅鶴清。竹風秋院淨。水月夜湖明。掃地焚香坐。栽花種柳行。世緣雖寂寞。贏得會無生。

其八

一夕皆星散。令予何所依。邊風如夜哭。塞草重寒威。老定違牀約。貧催異國飛。必懲蘇氏事。白首要同歸。

其九

掃塵一夜雨。割葉滿天霜。鴈也思離北。儂胡不憶鄉。騷人歸夢澤。鼓吏滯漁陽。去住都難決。徐徐葺草堂。

其十

家有文中子。眞宜老醉鄉。啣杯捐世法。蒔藥辦仙糧。筮仕緣焦革。開山祀杜康。尊兄知勝韻。憑世笑顛狂。

送張雲影還山

還山棲隱去。靜坐任雲封。長爪仙人氣。休糧道士容。捲簾千畝雪。當戶一株松。莫道無姬侍。雙鬢雨後峯。

其二

大事止如此。端居巖岫中。心應同水色。耳只貯松風。軟草譚邊綠。閒花定裏紅。由來稱淨土。癖潔不妨空。

送方子公附中郎舟南歸

懶持禰刺向侯門。南北相依念舊恩。囊裏無錢詩卷在。老來多病酒腸存。一天白月澄山市。幾朵黃花豔水村。我已不能隨鴈陣。賴君清弈伴晨昏。

贈別朱上愚銓部予告南還

心澹官溼熱。神閒應不忙。百函驚佐史。半字識盧郎。秋水迎僊佩。閒雲貯客裝。九流需藻鑑。隨鴈別瀟湘。



其二

少年專赤縣。無處不攀輪。西子湖邊雨。神僊枕畔春。黑頭台輔貴。白屋滯才伸。應向叢臺過。還思用趙人。(公初爲邯鄲令後令錢塘)

其三

豈惟張楚國。經世借名流。犀利銷奇氣。深沉見老謀。郎吟千戌月。大醉兩河秋。天上神僊吏。山川總勝遊。

中秋漁陽道中

悔別丹谿與碧莎。黃沙拂面鬢先皤。閒隨獵馬穿荒磧。怕見寒鴉綴瘦柯。明月總圓無賞處。邊風乍起奈秋何。箕營谷裏芬香夜。清露團團湛碧波。

其二

半生那解淚霑巾。顧影飄零萬里身。乍別鵲鴿如隔歲。欲親僮僕也無人。心孤不忍衝鴻陣。骨冷何堪伴桂輪。前日綠華芳草地。而今枯槁作灰塵。

其三

八特羊羹走峻坡。照人白髮是溪河。醒來鷹隼盤雲上。怒後驂駟激電過。修嶺西橫無漢

樹短牆北去有胡戈。并州欲住猶難住。敢望家山舊薜蘿。

其四

紛紛黃葉下城池。疲馬重裘走路岐。沙岸總因霖雨塌。原莎不受勁風吹。如何芬馥中秋夜。翻似蕭條暮歲時。三十八年塵土命。祇將明月照奔馳。

壽蹇令公（期爲八月十七日）

生懸長矢射胡塵。屢代承天一柱身。欲識朝多深厚福。但看邊有老成人。時無害馬銷戎隙。口不譚兵擾塞民。舊日關門親種柳。于今搖曳漾河津。

其二

鼓角無喧歷歲年。醉翁華髮映池蓮。新分桐酒延賓從。盡採饒歌入管弦。鴈帶朱霞穿畫戟。桂團明月照清筵。衛門幕府何分別。元老功成卽是僊。

其三

是日紅雲繞帝州。藥珠天上賀長秋。先持絳節朝宸闕。後閃朱旗見徹侯。醑酒普沾雞鹿塞。彤弓新出鳳凰樓。懸知社稷金甌固。黃髮干城足老謀。

其四

不隨蒲柳豔韶光。石幹銅柯傲雪霜。周室耆年推尚父。漢家僊吏重張良。燈花欲奪秋輝色。戟葉時聞桂子香。天下安危需壽者。如今休話午橋莊。

○卽事

鎮日支頤望遠嵐。歲秣重鎖似春蠶。花前懶學陶公醉。夢裏欣逢釋子譚。草淺牛羊迷塞北。煙圍竹樹憶江南。故園橘柚垂垂耀。不得親分一味甘。

其一

易水飄零淚染貂。那堪紫塞遇青腰。北來刀尺無消息。南去帆檣久寂寥。覓醉幾曾儲竹葉。試書何處有芭蕉。只宜脫却儒冠去。閒逐胡兒看射雕。

其二

日穿松樹射閒身。戟外青山看漸真。定裏鳴禽如喚客。秋來遊蟻也拋人。陶詩細讀愁何在。莊語重箋意更新。最喜塞垣消息到。黃花一帶虜無塵。

月

明月涼如水。樹影滿漉動。遮天露霧深。入面風稜重。步楹時獨行。老眼倦讀誦。閒却好清言。只是無人共。不如擁榻眠。細作青山夢。

落葉

商風忽以至。遮天蔽城郭。只此數株樹。能禁幾迴落。葉去獨空枝。誰與伴寂寞。轉盼失青林。參差見朱閣。一歲等閒休。飛花尙如昨。葉落不離地。我行眇天末。感歎步空塔。不住旋寶絡。隨風時一行。騰地如小雀。

夜讀

雪藤陳麗字。銀燭照秋毫。硃點生紅燄。沉箋沸綠膏。葉聲如遇雨。茶響似奔濤。只作山中看。何須更鬱陶。

靜坐

擲却殘書去。歸居萬慮忘。邊風無晝夜。塞月帶冰霜。鐘斷猶餘韻。爐寒不受香。如何當此夕。啼鳥也潛藏。

九月塞上已雪

昨夜尙餘星。隨風舞不停。當牕山已白。拂戶樹猶青。隱几寒披襖。烹茶預洗瓶。縱晴無處去。撥火玩殘經。

其二

亂舞迷天地。窺簾入幌斜。中槐猶隱葉。著菊尙疑花。候冷先傳塞。夢寒不到家。欲知邊地苦。親自到龍沙。

其二

欲蔽飛狐道。橫遮飲馬泉。楊花如昨日。稷雪已殘年。老怯衝風看。愁思帶酒眠。寒威應不減。聚墨似胡天。

聞丘長孺武場被落志感

事事每如此。濃想倏成夢。盛年已不還。常作窮途慟。劉郎有書來。九箭九迴中。射策乃剩技。文章翻無用。豈有倚馬才。不能壓餘衆。瑰奇輕穀率。毋乃太豪縱。近事不可知。白黑殊蒼蒼。馬肆不收龍。鷄羣常落鳳。命也可如何。造物工調弄。李白謫僊人。低頭丐薄俸。燈下聞落第。我身亦爲重。家累日漸多。所憂在朝饗。子貴我亦遭。富貴幾時共。老來怯奔波。吾志甘抱甕。世途亦有涯。萬事覺前送。展轉不能眠。牕月松枝動。

閒步

且莫辭游衍。無風塞上稀。烏爭松子落。霜減藥苗肥。入洞苔侵屐。攀巖棘罥衣。日斜容易墜。峯頂尙輝輝。

懷中郎

黑雲釀雪亂山高。夢裏明明見節旄。孤客廣陵淒夜月。一帆滄浦濺秋濤。歸來應喜存三徑。悼逝將無長二毛。萬里遼陽稀客至。尺書空自憶江皋。

其二

偶逐塵沙憶濯纓。蒲騷若見眼先明。魚游鳥逝如歸興。水落山空似宦情。墮地幾曾經歲別。涉江動是半年程。腐儒筆研成何事。歸去山中學耨耕。

夜酌

不須座客滿。酒至自傾壺。塔苻如堪拾。臆松似可圖。傾醪歸碧石。投棗入紅爐。吒吒燈花語。家書到也無。

至日辰起感懷

沙上濃霜雪未消。亂鴉鳴處轉無聊。黃廉綠幕終何事。紅藥青緹又一朝。風裏傳來殘鼓角。夢中失去舊漁樵。故園履屨何時寄。日斷南雲信轉遙。

祈年姪以書來訊兼寄近作殊可觀且云家園花木益茂因喜而有述并寄之不更作報章也

挑燈看遠牘。喜逐八行生。筆札存風氣。文章漸老成。賞心成一醉。訊使到三更。小阮非凡品。窮途慰步兵。

其二

非復少王郎。多年識豫章。好懲驚粉蝶。莫佩紫羅囊。細挹沾衣潤。常披入室香。東京袁世貴。修謹不如揚。

其三

紛紛薄俗子。棄擲莫爲隣。過似聞家諱。譚如延大賓。衣冠存古朴。文字尙清新。努力圖生事。棄時等棄身。

其四

癡叔秋來健。狂踪一寄聲。拋書學走馬。飲酒似行兵。素業慚先輩。高文讓後生。蒲騷猶未到。眼目已先明。

其五

塞垣非腹裏。念我客漁陽。大將不生事。邊人今小康。胡騎多北徙。戎事畢秋防。未忍言歸去。令公恕酒狂。

其六

鄉物將來好。雖輕路已賒。衣單須大布。酒渴仰真茶。半世長爲客。無宵不夢家。懸知書到日。綠萼正敷花。

其七

報道園林勝。依然摩詰莊。古梅如見雪。新竹似聞香。石冷穿雲屐。池虛泛月觴。有山不用買。何故滯他鄉。

其八

幸有春爲伴。南歸樂事奢。十莖珍異草。九錫寵名花。掃葉開吟徑。磨苔出釣槎。游囊無長物。一束爛雲霞。

懊惱曲

楊州夢覺到如今。洛浦蕭條舊錦衾。流水高山難再遇。止緣同調倍傷心。

其二

青驄白馬渡江涯。劇藕晴絲滿碧沙。記得大堤十字曲。穿心一道過他家。

其三



珠簾斜倚太輕盈。秋水梅花沁骨清。欲識泥人魂斷處。當場一曲似春鶯。

其四

郎心不道折花枝。妾意寧同擲果姬。水裏戎鹽膠裏色。一班風味少人知。

其五

今朝喜不上排場。自煮春茶自藝香。見說郎來飛舞甚。私將金串治壺觴。

其六

江邊水底送金杯。子夜紅瓊浸綠苔。嗔道與人頻見促。教他歸去我行來。

其七

翻羅體態似驚鴻。鸚鵡由來慧業同。默默不言能解意。可憐心曲太玲瓏。

其八

清言密室罷歌聲。郎頰粲花舊有名。酬得來機渾未易。看他譚笑似風生。

其九

他家席上錯稱呼。心裏懷人碧作朱。聽說相如詞賦好。自誇眼內有明珠。

其十

眼角纔逢逸興生。通宵不惜酒卮傾。竹林近日蕭條甚。粉黛叢中覓步兵。

十一

自傷零落在歌樓。桃葉閒悲團扇秋。話到將來歸結處。清眸劍戟淚雙流。

十二

欲隨蘇晉去逃禪。浣却紅蓮種白蓮。聞說城西範大士。與郎隨分送金錢。

十三

懷人曾到小池臺。絢履盈盈印綠苔。穿過竹中渾似燕。一聲嬌笑帶香來。

十四

醉餘花藥壓青鬢。飲興風騷未易刪。猶記西園明月夜。滿塔花影鹿胎斑。

十五

幾時嫁去事寧王。易水聞言淚染裳。富貴不來蘇季子。令他生拆繡鴛鴦。

卽事

五畝家園畫揜扉。不知何苦費心機。悔爲抱葉寒蟬計。願逐啣蘆旅鴈歸。柳浪湖邊波豔

豔。梅花廊裏雪輝輝。八行昨日傳家去。早拭溪頭舊釣磯。(混音耶)

雨變詩戲作萬曆丁未夏京師霖雨不止城中如江河官舍民

居皆塌因賦

長安風俗近好奇。不愛塵土愛漣漪。但喜宅中多貯水。那聞牀下便穿池。使君躡屐趨衾榻。小婦登牀送酒卮。酒後耳熱仰天臥。屋漏直滴口邊髭。浮牀忽如青雀舫。謂是蔡姬蕩耶非。未聞滿朝拂衣去。胡爲家家水上載西施。莫是盡學東平藉。壞壁頽牆任闕窺。釜中聞噉喙。竈下聽鼓吹。卽成分宅今多見。樓緩同餐誼更稀。昨聞張京兆。實妻八尺梯。自上梯邊爲畫遠山眉。又見待詔金門狂。李白長安市上醉淋漓。天子呼來不上船。自稱臣今爲水師。煙波釣徒張志和。不復泛家浮宅營雪間。只來銅駝陌上坐釣磯。謝安不造浮海裝。海道近日在金閨。天子有道公卿賢。胡爲乘桴學宜尼。或云天子怒。公卿罰作階盾郎。皆令立雨中。不及侏儒有休時。又云歲星精是小兒。上帝付與三天司。命咨却來銀浦恣。遊嬉雕雲屑雷檄。龍命鴉引水作花溪。致令天河水奔潰。茫茫陸地走螻蟻。方朔是僊才。不宜如此癡。又云箕子陳五行。惟水一行天所滋。其餘四行可實之。水爲天淫氣。多則爲禍基。披香女博士。能免唾且嗤。道路老人言。臣心信且疑。近日上帝怒靈祇。天地反目不相宜。天公不念地祇卑。尊寵萍翳因地維。致令四海橫流五嶽夷。地上蒼生皆爲魚。地上諸蒼生。俱是上帝兒。猛虎不噬兒。天心豈不慈。天若無地

無所承。將令天軸亦下虧。星斗燦燦沉海底。一半皆爲蛟龍齧。小臣不勝哀。再拜以陳詞。日月是君子。萍翳小人資。萍翳肆毒虐。日月不揚輝。下土昏昏無所見。白晝沉黑陽光微。萍翳柔而害物。破人室家。圯人屋廬。致令四海多浮屍。犬不安竇。鷄不安埘。所遭之處立殘破。金石雖堅亦摧危。上帝信萍翳。好惡毋乃欵。雷霆本是上帝印。萍翳盜去市天威。將來乞印不得印。湯湯之水入玉墀。未央貽蕩無子遺。臣願上帝逐萍翳。信日月。收豐隆。和地祇。當令珠囊叫慶。四海安覆孟。臣言猶如敗鼓皮。願帝止輦收臣愚。

題劉將軍壁上畫水歌(文)

天明風靜氣微和。澄江金斗熨纖羅。有時商飈微微發。一漚纔起萬漚多。清風徐來黃州水。木葉微脫洞庭波。水雲魚鱗布天上。天色波心相蕩漾。素練疊開流冷光。桃笙乍展綵輕浪。呷啜游魚應不驚。鳧容鷗貌靜相向。欣見澄清舊碧流。却挂將軍壁上頭。誰將小李將軍手。貌得吳淞一段秋。十年顏面悲塵滓。對此漣漪堪洗耳。乞得葛疆并州刀。剪取瀟湘入袖裏。

其二(武)

千百年來畫活水道子。以後無良工。手摸疑有霧隆蹟。止與印板爭雌雄。黃筌知微窮水變。興到疾走筆如風。急湍洪濤滿天地。怕見崩屋勢洶洶。此圖妙得古人意。倒海排山盪碧空。

鯨吞鯢怒如咫尺。蕭然實我滄海東。吳國三千水犀手。射之不得空挂弓。六月火雲掣飛電。將軍對此闔華宴。警然一見洗炎蒸。不須更用龍皮扇。

初春德州署中劉戶部元定席上

一見話青州。登壇絕獻酬。客從今夕至。酒是去年留。白乳龍湫淨。蒼官烏道幽。喜君微點綴。隨意有滄洲。

其二

不作他人看。深齋話夜分。兒郎皆踴躍。童僕也歡欣。素業存寒士。青山憶冷雲。撥煩名已著。白社漫邀君。

小園卽事

滴瀝一園露。帶露野花香。買鵝爲鶴伴。芟竹作蘭牀。怪石新移檻。小舟初下塘。漸于巾幘遠。露頂臥深篁。

初秋

微涼宿陰林。頓覺煩暑退。登臺對清池。過螢停鶴背。靜夜發嘯歌。隣犬數聲吠。

其二

臺上人正醉。池中鶴正睡。浩露漸深林。鶴驚人亦去。

醉歸

水氣抱柴扉。林陰夜凜冽。風至如有人。芭蕉一聲裂。暗暗梅花廊。殘月如凝雪。

送胡叟東汀入蜀

少年意氣何軒舉。誼重財輕如糞土。指困寄帑不足言。口未開時心已許。而今老來生事微。故交已故新交稀。蒼狗游雲同世態。夜半扣門應者誰。楚尾吳頭歸未得。一帆又作江干別。七十老人憐愛子。不怕灑瀆堆邊雪。一片熱腸我最憐。風塵少有如公賢。他日西華來見我。葛衣脫去與純綿。

步顧山人韻奉酬

十五春秋別。情狂興宛然。王維詩裏畫。蘇晉酒中禪。老健贏高貴。雄心長暮年。一帆寒雪裏。吹笛過湘川。

其二

父子爲臺向。休嗟僕僕親。縛茶尋石遍。倚杖看雲新。癖盡惟餘醉。技多豈救貧。故園曾種樹。千尺長龍鱗。

將發顧山人席上得清字同傅叔子

去住曾爲客。明朝又遠征。驚風花亂影。怯月鴈流聲。不淺庾公興。難澄叔子清。今宵戒綺語。相對語無生。

禮冷雲上人塔

班竹經廂在。瘳楠佛像存。榻猶溫木榻。雲已冷山根。怪石常來脯。寒潮自掃門。淒涼禪友。盡宿草染啼痕。

王龍嶼繡林江閣值雪雜詩

小樓枕石根。波浪濺簷瓦。遊客莫凭欄。大江在其下。

其二

濃寒較校書。晨酒宿顏面。隱几不成眠。靜聽水石戰。

其三

皓然滿一洲。洲畔千檣列。不見舟中人。但見舟上雪。

其四

賓從亦何喜。水石亦何怒。日暮絕來舟。江心雙白鷺。

其五

以手掬江流。取之滌硯瓦。尊壘稍遠臆。莫被過帆打。

其六

江光本自白。皎雪滿天地。江流本有聲。兼之猛風至。

會長石太史以短歌三首見別步韻奉答時予憂路梗回棹故未及之

魚甲浪中清。馬蹄沙裏濁。近稀子固遠。玄真一生專。以水爲樂不。須窮渤海。不用遍靈嶽。近水近山入眼。來回視家園。已握鯢兼之。高人玉屑飛。耳目都清那。忍歸十日淹。留謝眺宅。此是浮家第一。適弟勸兄酬。有餘歡君寧。作主我寧客。

其一

山水雖勝人兀兀。安得方舟走吳越。看君神骨何輕清。一泓寒泉流皎月。馬頰羊羹等世路。幾人白首能如故。知君愛我豈凡情。松箭真堪保歲暮。持藤臨屐幾春秋。剩水殘山非壯遊。惟憐別我同心友。獨立滄洲豈禁愁。

其二



江穎常吹沙雪古。一帆又指劉郎浦。浪打冠巾雨濺眉。岸上相逢渾欲舞。口言青女正愁人。未可輕舟離李姥。（荊州有李姥浦）依舊登山山上樓。猛風吹浪帶山流。波濤盜賊皆可懼。人言愁時我始愁。且復斯須語。已歸寧急去。換却遠遊作近遊。當筵有曲還須顧。石頭沙頭好放船。盡把行裝作酒錢。子瞻漫道吾從衆。米老如今不辯顛。

### 沙市舟行

苦愛煙波好。濃寒亦泛舟。驚濤稍酒盞。團雪上貂裘。聊博臨渦醉。難爲拾石留。閒悲陵谷變。江浪悉成洲。

### 姚生舟中

君偉滕元發。我閑張志和。寒林攢渡口。積雪貯巖阿。故着紅衫好。直衝白鷺過。算來人世樂。誰勝住煙波。

### 除夕

如何將盡夜。沙際尙維舟。不是謝康樂。定然許遠遊。村肴饒菜甲。山火點松球。巧避城中事。閒忙得自由。

### 其二

最厭俗誼譁。枯清耐水涯。夜燈分獵火。年酒散樵槎。軟草依洲淨。長松逐嶺斜。僊源真是好。隔歲想桃花。(時予將遊桃源)

澧陽晚泊

少入繁華路。晚于疎澹宜。水禽無俗夢。巖石抱幽姿。浪繞蜂衙市。風屯鳥爪枝。四旬今已至。獨往莫遲遲。

澧陽道中

崇竦存孤岫。澄鮮異濁河。松離天不遠。石隔水無多。僧寺全依澗。人家半住坡。牛鳴寧幾里。慚愧到巖阿。(去余里甚近)

曉行

小舟穿澗曲。欹笠數諸峯。曉霧江干柳。初曦巖際松。石鋪如錦磔。水罩似輕容。(今之銀條紗類)蕉籟千山色。纔開第一重。

早春鼎州梁山道中

擔風握月爲春忙。桐帽棕鞵野客裝。山芋入盤存藥氣。松毛着火帶脂香。纔離僧寺遮天樹。又見人家映水篁。近日有文新誓墓。永同逸少問金堂。

入德山同龍君超

芳屐隨春至。鶯花伴寂寥。臺基肇帝世。(山有善卷臺)樹臘始唐朝。嶺竹煙常暗。溪梅雪未銷。霏微昨夜雨。若爲洗塵囂。

其二

青鞋莫便去。花片點山坡。竹路都忘遠。鶯聲不厭多。得江還大叫。選石忽狂歌。處處堪雲臥。空閒蘿薛阿。

其三

桂老知何代。鶯啼不計雙。經行紅染屐。晏坐綠沉窗。貪竹緣依路。嫌松爲礙江。山深田幾畝。花裏吠僊龍。

其四

層巖開佛舍。紆嶺閉禪關。啼鳥金丸轉。陳柯錦石斑。高臺重覽囑。遠水幾灣環。誰作公超霧。都成米芾山。

入桃源四首步中郎韻

不是偕春至。由來節序溫。脩篁常引道。始草欲封門。水脈鳴千畝。山嵐滴一村。未須愁夜

色梅雪照黃昏。

其二

寂寂聞啼鳥。逢人或是僊。一丸堪塞路。千嶂總圍田。浩露朝鋤月。微風夜爇煙。過橋尋洞口。夾道有花燃。

其三

直捫煙蘿入石門。半掩關。花深迷古洞。泉墜響空山。獨往能輕骨。長閒卽駐顏。誰言僊路遠。咫尺在人間。

其四

尋源那肯止。僊榻可能分。白灑千層雪。紅燒十里雲。春儲魚子飯。秋采女蘿裙。誓不離丘壑。羣真耳盡聞。

附中郎入花源詩

溪雨濯雲根。花林水氣溫。睡鸞常守月。僊犬欲遮門。綠壁紅霞宅。丹砂石髓村。人中幾甲子。洞裏一黃昏。

其二

白頭丫髻子。花裏去如僊。鳥弄雲霞柵。人耕芝朮田。庚年看紅藥。生死在蒼煙。認着鐘香去。瞿童火尚然。

其三

花石當雲闢。驛門臨水關。何年騎馬客。踏斷採芝山。古井沈煙霧。空潭洗面顏。丘陵一變海。一度到人間。

其四

洞外一長揖。人僊從此分。看君如水影。要我以溪雲。花氣薰崖戶。霞光繞茜裙。往來江海。上鸞鶴翼相聞。

仙蛻石

霞渤雲封幾萬年。圓珠方璧媚澄川。清清之水鱗鱗石。道是僊人好墓田。

其二

如崩如綴又如拳。骨理沉蒼色更妍。長爪王孫無妄語。幾回天上葬神僊。

珂雪齋集卷之四終

珂雪齋詩集

珂雪齋詩集 卷之五

詩

穿石望新湘溪諸山

嵐彩縈爲佩。春花繡作裳。中懸一片鏡。照見萬山粧。盤繞髻雲出。淺深眉黛長。芙蓉青朶朶。彷彿似聞香。

又回望穿石

日暮將安去。天邊起怒雷。回頭望江口。香象截流來。

過新湘溪

壁壁皆生動。盤旋不厭多。近山存遠態。高嶺有迴波。四展烟屏障。全收水縠羅。仙人真狡獪。幻出巧巖阿。

水心巖

濯濯春花颭水開。丹砂翡翠冷金苔。百年三萬六千日。一日還應繞百迴。

雪中望諸山

青蓮花間白蓮開。萬簇千攢入眼來。別有銷魂清艷處。水邊雪裏看紅梅。

雪中別水心崖

小舫周三匝。依然繫石根。水中峰雪影。天外壁波痕。易別桃花洞。難忘魚網村。貪看山意態。寒沍也如溫。

君御隱園卽席奉答并次其韻

怒貌渴驥等行游。那問初春與暮秋。溪上穀羅迎畫舫。尊前劍戟射清眸。雲煙過眼誰能障。宮殿隨身不用謀。盡買花源成小墅。祇憑竿水一漁舟。

德山別楊西來

山水發幽情。一月鼎州道。來如挾石貌。去若穿雲鳥。楊子素心人。一見輸懷抱。送我到枉山。先期入窅窳。固是山靈留。亦緣交情好。梨花流水邊。一笑破枯槁。夜雨滴僧寮。數作平子倒。人生貴知心。定交無暮早。看君有靈骨。蕭然出塵擾。花源山水佳。茲行尙草草。遲我二三年。借子資幽討。久住魚網溪。高登石困表。九疑九向背。一一窮縹緲。金堂玉室間。于焉可終老。

洞庭雨中



一葉輕舟汎汎。捲簾大地總虛無。只將千頃鵝溪練。寫出營丘驟雨圖。

### 八百湖

如雪一湖水。繞湖黃菜花。高臺新柳色。圍着兩三家。

### 其二

黃菜黃無極。新黃汁染天。安能湖變酒。一醉藉花眠。

### 彭山人洞庭遇盜賊此謔之

鄂國有貧客。遭時苦不利。終歲惟出遊。逢人但覓刺。止見攢眉出。未見舒眉至。若是帶笑歸。決定無此事。既空鼎州裝。復下潭州淚。如何赤沙間。更與綠林遇。盜與君無緣。君正盜所忌。盜賊若逢君。盜亦大失意。張眼看空筇。憐君也發喟。

### 沈冰壺水部招飲庾樓

春樹綠無極。十里暗郊原。不辨章華寺。微露枇杷門。緩飲遲新月。開軒翫冷雲。庾宅無所屬。今屬我與君。(庾樓乃庾信宅)

### 江風

江風吼怒雷。浩浪渺無極。小艇落盤渦。惟餘兩點黑。

雨泊東流縣登淵明祠（東流卽彭澤舊址）

山縣雨聲裏。一城靜似眠。怒雷時繞地。浩浪不離天。釣艇雲根着。垂楊石竇穿。醒魂今在否。囊底有沽錢。

其二

陶家無俗蹟。風雨也須來。木主生寒菌。石牀繡冷苔。庭空榆葉暗。城古刺花開。何事不沈飲。東流豈再回。

登采石磯

山徑倚江欹。葦鳥鄰五兩。鬱葉藏朱櫓。門草深餘丈。松裏出石曉。峰頭聞水響。萬山盡約眉。譜眉向水上。佇思謫仙人。山川留其爽。歸舟呼酒尊。長嘯發清賞。

李白祠

淺水雲根繫釣槎。芳陰詰曲逐江斜。祠前綠樹猶唐世。戶外青山卽謝家。忽有好聲難辨鳥。乍聞香氣不知花。遙看怪石都無路。松裏參差馭霧靈。

又題祠壁

李白祠前草自生。青松無主亂禽鳴。獨餘沸水崩崖處。猶帶驚天動地聲。

舟中看采石

登嶺窮遙峰。下山玩近岫。一葉過山根。始知此山瘦。數丈忽中泐。芳草如錯繡。巖下萬竅空。漁翁實其寶。寶中絕來蹊。小舟繫左右。緬想此中人。六鑿應不闕。

江行逢龔表弟

黑雲滿汀洲。亂石走江岸。舟子識熟舟。波裏欣相見。昨夜夢君來。今日同歡宴。蓬雨瀟江。鳴。訊問直達旦。關心惟老親。一語託君便。游子甚平安。無恙舊顏面。

哭茂直焦二兄十首

淪落已無天。如何命不延。逢時偏處後。薄命獨居先。寒月窺蘿戶。秋風罷錦絃。東坡猶未艾。遽失小斜川。

其二

圭壁隨心唾。椒蘭竟體芳。全家稱孝友。舉國重溫良。經折才尤老。論交誼獨長。頻年絕訊問。忽去斷人腸。

其三

人誰不有死。子死倍堪嗟。弟病煩調藥。親衰仗理家。先霜悲異卉。殿雪嘆凡花。感此心灰

冷餘生付釣槎。

其四

有客傳消息。頻年體未平。方書爲本業。大散作和羹。止訝偏多病。何期遽隕生。早知成永別。飛度石頭城。

其五

珍珠橋上路。一步一酸辛。極目繁華地。傷心錦繡人。無方留蠶尾。永不近龍唇。入骨交情在。千年豈化塵。

其六

若話亡來事。蕭條亦可憐。青蠅傷弔客。白雪散遺篇。阿鷲今存否。童烏竟杳然。惟期慧業在。才鬼勝頑仙。

其七

少年蜚麗藻。艱苦閱星霜。曹植思傷胃。楊雲夢出腸。銀鈎猶未燥。縹帙尙餘香。雨夜千秋話。于今憶不忘。

其八

好學誰能似。光陰惜轉丸。銳牀成夙志。焯掌戒儉安。魂去誰招得。書存欲續難。應爲八法死。不遇五靈丹。

其九

夾池仍翠竹。暎沼自長楊。止是虞貧賤。何曾算死亡。龜羅延伏臘。虬甲露文章。逝者凌雲去。生存苦未央。

其十

佳麗六朝地。我來慘百憂。懶行調馬路。不上落星樓。趣隔言常在。莎陳淚未休。青蓮遺願重。永劫共薰修。

蠹魚行戲贈程全之

程生讀書號書癡。輿馬途塘總不知。老眼隔書僅分寸。墨花常是染鬚眉。自言百事總澹然。不願成佛不願仙。惟願死作老蠹魚。遊戲金題玉躑躅。隨我嬉遊長千道。一束靈文自懷抱。鷓鴣弦鐵撥問伊吾。桃葉桃根皆大笑。歸來夜夜對燈檠。夜靜惟聞金石聲。胸中千卷飽欲死。一任饑腸汨汨鳴。世人自苦君自樂。死作蠹魚亦不惡。他年飽噉神仙字。與汝相將跨雲鶴。

大會詞客于秦淮賦得月映清淮流分韻得八庚

暝色來鍾岫清輝。出冶城人隨歸鳥。靜光逐暮潮生未。照烏衣巷先穿朱。雀桁水寒漁艇息。露冷酒船橫密樹。沉沉黑雕欄案案。明七盤迷舞態百。嘯試歌聲桃葉桃。根過還須鼓楫迎。

登金山

萬派迴江勢。孤標插海門。水風悲日夜。潮雪濺乾坤。點暖清泉醉。摩抄冷石溫。何年濤浪竭。拔地看山根。

哭陶石簣學士

昔從白社後。得奉紫芝顏。叔度陂千頃。顏淵桂一山。寒潭同朗潔。枯木比虛閒。道眼能餘幾。飄然去世間。

蔣墅晚發

宿病塵塵滅。新秋漸漸涼。月寒千畝濕。樹暗幾家藏。近岫隨烟沒。良苗帶水香。櫓柔渾不住。夢裏過朱方。

篁川卽事亟伯

曲阿傳古澹。此地益清幽。畫閣酣深樹。文欄縵淨流。移來銀浦色。分得洞庭秋。梧子溪邊去。穿花一蕩舟。

其二

覺徑依紅藥。登臺望紫蘿。易澄惟月浪。難靜有風柯。弛罟恣魚戲。忘機任鳥歌。雕胡堪共飽。不用玉山禾。

其三

澄鮮秀媚處。宛似雪堆庄。荷葉遮書屋。流波濺筆牀。屯雲塞古石。照水淨新篁。且莫回棹去。青溪曲正長。

其四

不喜同金谷。將無似輞川。石倉儲異字。薤葉寫新篇。聽水俄成韻。看雲忽悟禪。倚樓頻眺望。白馬浪光天。

初至甘露夜坐

夜深絕頂也須攀。水月相遭第一關。帶雪寒流爭赴海。橫江薄霧不遮山。空門風物何辭澹。病後心情且是閑。顛史已歸香國去。海天墨戲在人間。

夜月甘露凌雲亭

繞郭峰巒好。訊僧不記名。長潮風轉勁。近海月尤明。野鶴迎霜唳。山鐘帶葉聲。一從多病

後刻刻想無生。

甘露寺中秋

秋節無佳月。何如坐揜屏。靜鐘清肺病。哀咽冷心熾。楚國雙魚斷。秦關一鴈飛。塵勞方未艾。湘水幾時歸。(時中取主試秦中)

贈張伯瑜

少小不沾羅綺氣。青編食識楊家字。爾雅蟲魚窮性情。神農本艸辨精細。肘後常繫活人方。寸田尺宅作生事。邇來喜讀竺西書。百八胡珠手中沸。我老最愛陶弘景。棄去紅塵伴靈嶺。積金東澗付芟除。十寶爲爾驅毛穎。

過瓜洲吊蕭啓元

只道生離苦。誰將死信傳。家貧緣愛客。宦拙爲嫌錢。吳酒雷塘路。燕歌杜曲筵。天堦溫語後。會合竟無年。

同潘樺恭閒步

一徑穿溪去。溪窮得小園。僧歸黃葉寺。人語白沙村。肺病猶疎酒。心交不擇言。十年纔晤對。頻過莫辭煩。



中郎邸中除夕

塵土霏霏換鬢玄。拋他浪柳幾迴眠。來雲依日同今夕。漏石分沙想去年。（去年除夕澧州）  
柏子重拈閑意味。桃花入夢舊因緣。只將終夜甄笙響。誤作山頭百乳泉。

黃梁祠逢張金吾

仙祠在何許。垂楊大道口。道旁逢故人。下馬飲杯酒。

其二

馬上一千里。今朝見柳絮。樹下何處郎。宛然似張緒。

其三

入山真是好。無奈冶情深。安得盧生夢。銷除未了心。

臨漳道中

秀麥好顏色。土膏舊綺羅。古墳因作堡。官道漸成河。榆葉垂垂墮。桃花漸漸多。道途荒蕪甚。寶瑟不聞歌。

遊百泉

五里芳菲路。依山雪一湖。蛟珠鳴石礫。鸞尾走菰蒲。乳水烹茶淨。深潭照影無。餘生何所

願。汎汎此中鳧。

其二

日光來映射。潭底幻雲霞。凡石皆成怪。陳苔盡綴花。小橋通竹院。流水響山家。一樹棠梨雪。深深沒釣槎。

其二

偏愛青巖下。滌漚湛碧波。峰巒添秀媚。花鳥倍靈和。藻蘆涵冰鏡。石璣隔霧羅。近泉三百畝。到處玉山禾。

登九山

九子依稀似。攀躋莫厭勞。泓渟衛水淨。刻露太行高。選石登巖遍。郵泉試茗遙。東峯多帶十。何不種天桃。

將至襄中

處處桃花路。家家枳殼籬。蔬畦鳴暗滴。麥壟發香吹。山好連雲動。沙明與雪疑。莫將愁意緒。污却繡城池。

隆中分得從字同于野于林中郎兄賦

攀蹊泉是導。度嶺鳥難從。一戶丸泥閉。千巖籜笋重。雲中來鮓婦。花裏見耕農。何客偏饒舌。呼人作臥龍。

其二

瞻此幽居勝。居然見隱才。數椽山郭蔽。十畝水簷迴。火井催人出。魚梁罷客來。惟餘抱膝處。冷石繡蒼苔。

飲于野王孫謝公巖同于林中郎兄賦

郭外田堪種。城邊山好登。陰巖泉細細。高閣幃層層。石長碑文瘦。藤深壁髓凝。酒闌還授簡。賦月主人能。

送羅伯生之柳州別駕任初爲茂州判皆近邊

十年槐市魯諸儒。轉眼行邊漢大夫。粵嶠山川多秀媚。瀟湘烟雨正虛無。神刀已歷千番淬。老驥寧辭萬里途。好似弈棋真國手。未贏數子便非輸。

贈公琰

欲雪寒江氣象昏。征衣猶帶浪花痕。可憐千里尋知己。不見中郎見虎賁。

往玉泉八嶺山道中示寶公

棘林脫去任西東。蓋紫堆藍杖履中。許邁入山魚得水。蕭家遺墓鳥呼風。眼觀碧岫無勞白。顏照青溪儘駐紅。一笠一瓢堪自老。是何俗物管城公。（後梁陵墓多近此山）

合洛曉發道中

居人忙歲暮。野客正山行。溪岸月無色。板橋霜有聲。分沙寒水淨。積鐵冷峯迎。禾黍皆陵壘。昭丘久已平。

其二

如茲幽邃地。能隔幾由延。野渡繩爲楫。樵筐背代肩。山頭雙樹好。嶺外一僧緣。但任年相逼。游人不問年。

玉泉山居

小閣枕鳴泉。青松覆峻嶺。刁刀一夜風。泉聲在山頂。

山遊

近嶺翠層層。遠山望正宵。老僧上絕顛。先道一聲好。

遊青溪同度門

且莫攀巖去。拖藍十里泉。飛流鳴古雪。淨色似秋天。秀媚依溪寺。淋漓帶水田。不圖鄉國

內見此好山川。

其二

初曠明嶺路。草木有餘欣。曲曲貯秋水。山山學夏雲。亂橋縈澗脈。九子露峯紋。已過緋桃洞。仙凡自此分。

其三

儘有幽栖地。堪怡草木年。逢巖思結屋。愛水欲求田。白纒石蹊淨。青螺壁影妍。飛禽不到處。猶自有樵煙。

其四

爲尋禽向侶。閒逐老聲聞。洞灑桃花墨。石書竹葉紋。緩移康樂履。細玩郭熙雲。安得常無事。深山伴鳥耘。

其五

巖洞裹珠城。重門取次行。千年凝雪隱。一炬幻霞明。溜乳盤空變。冰蓮蹴地榮。仙源知不遠。流水隔蓬瀛。

贈鬼谷道士

桃花洞口老劉郎。斑鹿胎冠紫布裳。巖白積泉充道饌。石垣捍土種山糧。采來野蕨分猿食。上得危峯似鳥翔。說客已收名利志。欲依丹鼎駐年光。

除夕傷亡仲兄示度門

夢中也不料兄亡。溫語慈顏竟渺茫。骨肉可憐零落甚。獨來山裏伴支郎。

其二

乞取前生舊衲衣。永同魚鳥遂沉飛。從今海內無知己。不向深山何處歸。

正月四日紫蓋道中懷度門

野客遊山興。還隨春草生。近雲遮馬過。遠雪照人明。西嶺眉如疊。南田掌似平。斷鴻零落甚。仗有道林兄。

度門得響水潭將結菴作鄰志喜六首

岫色當門易。泉聲繞屋難。飛濡鮮草木。發響撼峯巒。正好風前聽。偏宜月下看。從茲溪畔石。常有兩蒲團。

其二

買山隱不妨。勝境借支郎。木杓當珠瀑。荆柴近孔房。奔雷無晝夜。曳練幾星霜。止隔一泓

水輪蹄有底忙。

其二

巖曲宜穿屋。山頭好結亭。松濤猶有住。泉語更無停。共鼓離絃曲。同聽沒字經。卜隣非細事。法侶悵辰星。

其四

清流何切切。不比俗箏琴。愛此圓通耳。貽之淨妙音。響來神矯健。喚起定昏沉。便是王官谷。何須策杖尋。

其五

閒來尋石坐。偶爾破雲行。雪色同溪色。松聲戰水聲。掃苔安硯几。就乳寘茶鐺。不復精禪講。聽泉過此生。

其六

不愛師文字。愛師高且真。爾寧慚惠遠。我欲効遺民。貝葉收雄辨。蓮花結淨因。繞溪三百躡。吾喜得吾鄰。

遊龍泉胡文定墓上

長袖風如折。寒林翳古丘。徑荒麋跡亂。堦淨鶴翎留。風氣有時息。松聲不肯休。春王正月裏。一盞耐康侯。

登九子

多時餐黛色。逼視益孤清。切玉鋒端過。盤鴉髻上行。雪明雙水合。雲展萬峯平。重見山尤物。移予選勝情。(池州九子山劉禹錫云自是天地間一尤物)

遊智者洞還道中值雨

柱杖閒穿冷翠圍。青山奇怪樹芳菲。藤垂寶絡深遮洞。水學書文亂蝕磯。柳影初曦迎客至。桃花暮雨送人歸。衝泥更向亭邊去。帶濕新嵐色上衣。

再遊青溪

體爲登山倦。石橋一醉眠。澄潭深可畏。碧乳淨須憐。海湧流慚活。蘇門色讓玄。不知住此者。何福可消泉。

青溪道中看山口占

雲輕石常重。石每不如雲。石態若如雲。不與諸石羣。昔者郭河陽。畫石得三昧。如雲畫家難。茲山等熙繪。馬上看起伏。撲衣生冷翠。頻玩發清顛。遂爲石所醉。



鳴鳳山

繡嶺重重裏。淙流曲曲環。撲天砂翠色。拔地鼎彝山。石上桃花麗。壇邊鶴使閒。翹頭乘興往。且住莫愁還。

其二

危峯何秀媚。眞几亦爲珍。欵處微生樹。滑來不受塵。割雲鋒鏑利。沐雨鬣鬣新。好時田堪買。明年稱道民。

其三

游客且從容。山程細玩峯。晴巒生墨繡。仙宇住針鋒。破壁常愁墮。羈雲每被封。青蓮千萬朵。莫比俗芙蓉。

山上飲

濃雲起尊前。雨足森森去。灑酒入雲中。人間聞酒氣。

鹿苑山

鹿溪纔入眼。匝地爛雲迎。七度桃花水。十重翡翠城。安能營數笏。便可娛餘生。誓欲新蘭若。和公作證盟。此山卽陸法和舊邸也。

山行懷中郎

流水淙淙逝。青山簇簇新。不知歸去後。舉似與何人。

岳陽樓

四望波無極。封天雪未銷。始驚三楚大。欲辨九疑遙。水氣澄炎國。濤聲接海潮。君山在咫尺。鞭石好成橋。

其二

白浪滿天地。孤舟何所之。水明魚眼怒。風緊蛤帆移。積練豎雙戒。跳丸轉二儀。欲清名利火。來對淨琉璃。

其二

巴陵共舉杯。湖貌待風開。一葉隨流去。千帆結陣來。蕭清延羽客。震蕩孕騷才。斷雁飄零甚。寒汀叫轉哀。

君山

顛氣盈坤軸。安能判水空。更無山作障。直與海爭雄。芥子煙雲地。扶搖日夜風。欲知丹在鼎。看取旭輪紅。

其二

草青微露色。沙赤已潛洲。夜坐常如月。山居不異舟。龍孫垂萬部。鵬門歷千秋。總與仙都似。高真也愛遊。

其三

十里迂迴路。茶香勝酒香。千畦拳石隱。萬鶴一松藏。斑竹偏多筍。黃柑可薦觴。軒轅臺上好。擬老白雲鄉。

岳陽晚眺

下無波浪上無雲。積水長空兩不分。雙合江湖搖地肺。九迴向背織峯文。髻螺雉尾陳香案。檣檣蠅頭寫練裙。日晚拋絲磯上者。幾人閒靜得如君。

別王石洋

粘天濁浪濺征衣。驚雁那堪兩處飛。君爲友朋真不薄。我亡兄弟欲何依。烏林浦上慙慙去。青草湖頭痛哭歸。皓首相莊無異約。入山同採首陽薇。

登舟舟在三穴橋

涸盡白石源。揚塵久非故。澄潭貯菱蒲。尙認油江路。

其二

古路小蘭若。餉茶愧少錢。渴時一杯水。三管筇篻天。

其三

斗大夫人城。城中搖燕麥。止應泐石街。曾印香綉跡。

其四

雨到漩渦密。風吹蘆葦開。前溪成一笑。船載小船來。

其五

撒手鋪魚網。舟欵忽飢流。觀其游戲意。可以不須舟。

蘇雲浦侍御還里時先兄中郎將移櫬入里故中及之

忽聞驄馬近。喜極淚雙流。死友今將至。靈車應不留。畫樓空乳月。宿草又傳秋。猶記分離  
詔。山公在勿憂。

其二

我哭直隣死。君愁亦應深。九言黃父會。千里素車心。鶯妾終煩嫁。龍脣永絕音。知交零落  
盡。不忍更商參。

卽事

斜陽燒近林。林內鳥聲急。嫩綠漲平疇。一翁背手立。

送雲浦按山西

豸冠換却鹿胎巾。且擲龍湖舊釣緝。河上忽來周柱史。晉中偏用楚才人。封天碧岫侵緹扇。暎水天桃點畫輪。酬了國恩同隱去。堆藍山裏作佳隣。

合溶道上

朝辭炎火宅。夜度幻霞關。水後尋新路。雲中認熟山。危峯仍秀色。逋客漸塵顏。寂寞吾何怨。求閒已得閒。

潞陽道中

雨過烟尙凝。濤響江彌靜。順水一帆風。舟師如入定。

其二

人家多種樹。溪上稻麻密。素練已昏黃。下見樹影黑。

其三

夾路刺花繁。斜陽鳥語沸。雨餘溪水深。僮立渡牛背。

山遊口號

天色欠晴明。山行艱杖屨。樵人說不妨。南上一枝雨。

五月十三日玉泉道中此日爲關公誕日

千山萬山雨忽至。大珠小珠溪裏沸。此是關公洗刀雨。沾身也帶英雄氣。疾雷先雨雨如露。停車且認玉泉樹。志士奇窮避地時。將軍血戰灰心處。

堆藍

朝自堆藍去。暮自堆藍還。堆藍無所慮。只慮樹遮山。

其二

不愛山上石。不愛山上樹。惟愛樹抱石。稜稜有媚趣。

其三

夢裏識松聲。醒餘聞鳥唱。慵來忽步簷。拭眼數山浪。

乳窟同無跡伏之閒步

乳窟忽成行。臨流有茂樹。隔溪苔壁寒。拾石渡溪去。

其二

掃石主敷蒲。聽泉客倚杖。老僧貌寂然。獨坐松根上。

### 玉泉夏日山居

好花留住惡莎焚。趁雨還宜種此君。別壑水來如鬪水。他峯雲過似邀雲。閒同天上三禪樂。戲草山家十寶文。月館露臺蕭靜夜。巖端松唄幾迴聞。

### 其二

幻雨奇雲弄晚天。伊蒲飽後罷安禪。溪籐欲做堆藍岫。竹杖頻穿疊雪泉。移得雲根和乳滴。採來仙掌帶霞鮮。峯頭趺坐忘歸去。九子青如九朵蓮。(仙掌玉泉茶名)

### 其三

水宜當戶石宜臺。布置居然小隱才。紫蓋山僧遺笏至。清溪道士餉茶來。編籬已覺朝榮活。布砌猶欣夜合開。彈指三生如夢幻。子雄遺願在天台。(隋袁子雄曾於天台寺爲智者講講堂)

### 其四

乳窟前頭一徑斜。小橋雁齒到山家。孤流震地飛濃雪。絕壁連天灑幻霞。十里青松多似韭。千年白蝠大如鴉。客來未有盤餐具。旋汲新泉旋采茶。

### 贈李次飛(次飛少爲開士)

遊馮東南勝。堆壘共隱藏。鉛華情漸盡。煙水與偏長。聲愛漁阿梵。書傳狸骨方。再尋調馬路。難辨舊支郎。

王給諫將有卜居東南之志。予秋來亦有遊興。會間共有山行之約。有述。

禽尙相逢意。正投枇杷門下。不悲秋。未來玄岳峯頭醉。先向朱陵頂上遊。朝愛嶺霞同躡屐。夜貪湖雪共乘舟。回思碣石譚天事。時鳥候蟲一笑休。

九溪陳君垣茂才世萬戶父。以死事加爵。恥武不就。以文謁予。口占贈別。

有客嘯歌至。儵然美丈夫。願爲門下士。不作羽林孤。丹葉楓遮路。白蘋水滿湖。君雖不好武。予又恥爲儒。

哭慎軒黃學士

世道何時泰。名賢取次徂。普天寒士泣。通國正人孤。繡虎終潛穴。靈風竟隕梧。信來身仆地。含淚老僧扶。

其二



我已亡兄弟。孤鴻日夜悲。君今復去我。年老更依誰。  
夜雨披衣坐。西風動地吹。餘生遊興盡。誓不到峨眉。

其三

閱人頗不少。慧業幾能儔。妙悟兼三教。旁綜及九流。  
世祈斟大斗。身已付寒丘。白馬應相待。寧辭路阻修。

其四

體彙四時備。技分十輩多。博聞窮爾雅。妙跡繼靈和。  
細雨天人泣。陰雲魍魎歌。已謀磨鏡去。不畏峽風波。

其五

自聞來紫極。終日望黃牛。國少和平福。士多坳壑憂。  
梧風終夜響。蕉雨一天秋。豈獨懷恩紀。蒼生望未酬。

其六

易理通神契。玄言細髮分。尊前圖地脈。掌上辨星紋。  
北藥難弘景。真書窘右軍。名塗少不賤。多藝孰如君。

其七

奪盡江山秀。傷哉埋此人。詩思通漢魏。才氣逼周秦。紫閣行成幻。黃墟信竟真。從今佳蹟少。遺墨倍堪珍。

其八

少欲辭婚宦。欣然慕阮宣。治心泥上絮。塵事火中蓮。自絕青娥癖。非關白骨禪。孔明雖淡泊。竟亦不延年。

其九

北闕談心處。西陵泣別時。常欽行古澹。猶記貌慈悲。青李遂無帖。朱絃永斷絲。神遊定何所。夢裏報予知。

其十

恩義丘山重。相從恨不能。典衣放野鳥。賒米飯名僧。神理終難昧。佛天應可憑。兩兄常入夢。今又贈良朋。

九日登中郎沙市宅上三層樓

滿眼傷心處。誰能上此樓。林煙迷蜀道。帆影識吳舟。視北人何在。江南草又秋。秦萸空到

手欲插淚先流。

其一

西瞻巴子國。北眺庾公臺。林影依沙淨。濤聲觸岸迴。魚龍存霸氣。山水發騷才。故侶何人在。餘生亦可哀。

又登樓

登樓祇益愁。愁極且登樓。細雨江南樹。濃烟渡口舟。飛塵千萬戶。出水兩三洲。猶記好光景。裙簪沙際遊。

由草市至漢口小河舟中雜詠

陵谷千年變。川原未可分。長湖百里水。中有楚王墳。

其二

日暮黑雲生。且依龍口住。小舟裙作帆。笑語過湖去。

其三

自發桃花浪。白蘋尙滿湖。欲知今歲水。但看垂楊鬚。

其四

衝月漁舸去。鳴榔款乃多。自身非墨子。也不厭朝歌。

其五

旭日乍停舟。岸行兩三步。登舟且遲遲。白沙好淨路。

其六

明月漸潛波。衝風蹙水面。快哉順水船。好看船邊岸。

漢陽感舊

泊天白浪淨無塵。惟有孤櫂塞去津。芳草偏憐衡處士。桃花不夢息夫人。江頭鼓柁機全息。漢上題襟迹已陳。屈指光陰今二紀。無情癡淚漫沾巾。(志載漢陽有桃花夫人廟即息夫人也)

贈別梁觀察遷浙江右轄

鼎呂聲名重。圭璋德器優。朱繩遵道檢。白雪凜清修。淡泊南陽志。汪洋叔度流。瑣闥無草在。易水有碑留。伏闕多危論。匡時見老謀。北垣韜指路。南極著風猷。寬博敷條教。光明徹蔀幽。百城膏雨日。一署冷霜秋。操比衡嶷峻。恩同漢沔悠。清湘無怪鳥。繁楚失全牛。歌舞方江城。旌麾又越州。列藩專大國。東海領諸侯。五長旬宣夏。十聯屏翰周。山光迎畫扇。水氣暎仙舟。政暇頻登涉。公餘有唱酬。行春看柳陣。問俗對潮頭。督井還思浚。葑田或再籌。大才寧急試。時事要

相求。經畫參官府。營綜及滋陋。高牙來雁塞。彤矢出龍樓。謬託通家誼。深懷明德稠。康成常念馬。蘇子不忘歐。濃影資餘葉。洪膏借一漚。感來三白踊。非作大人遊。

觀音閣夜話

日暮將安去。危欄且共凭。尊前金口樹。窗外漢陽燈。古廟思文命。沉橋說霸陵。月寒波淡淡。相對兩三僧。

秋日同巨源伏之世高遊洪山

醒却穠華夢。來爲冷石遊。紆迴綠綠障。枕籍見紅樓。雪影江天淨。林烟沙渚浮。倚欄神頓爽。信矣癡山丘。

其二

已尋蘿薛徑。漸遠市朝塵。綠樹深藏寺。蒼松健對人。樓臺驚物力。煙水賚閒身。迦葉無餘習。歌吹任北鄰。

其三

石存前代馭。楓飽累朝霜。鑿岫竦珠塔。登天列畫廊。重湖何皎潔。大地總清涼。彈指十年事。山靈識酒狂。

九峯戲作

江水連湖水。遍地是瀟湘。九峯九朵蓮。宛在水中央。花心梵王居。峙立如蓮房。松竹似花鬚。含裹弄芬芳。遊人戲花中。欲出旋已忘。清夜篝燈語。似聞蓮花香。

與世高廓虛上人夜話

恰好瀟清意。僧貧豈是貧。竹聲醒客夢。松火照人親。村芋猶堪煮。園茶尙未陳。各談山水勝。無計可分身。

登洪山絕頂

遊客嫌荒落。孤藤冷冷過。遙天秋更淨。大地水偏多。正好茵雲臥。遠爲扣石歌。不須重點綴。粉黛染煙蘿。

遊九峯寺（先無念禪師道場）

紆迴窮盡水煙鄉。九點青山一寺藏。塵覆甄衣思大士。髯張弓矢拜昭王。直依巖壁爲紺殿。高出雲霄起畫廊。藻井香廚遺制好。前朝物力也非常。

九峰絕頂

獅子巖邊去。千峯不辨雲。誰能拔樹障。盡與露山紋。浩浪明雙柳。晴煙見八分。莖柴宜此

處松火儘堪焚。(雙柳溪名八分武昌山)

其二

終日探佳麗。安能遺髻鬢。粉牆陽邏市。墨壁富川山。掃石安蒲淨。依松啜茗閒。人耽金碧好。此地有誰攀。

黃鶴樓

登臨絕主客。清寂倍堪留。水國無多地。江聲益壯秋。青山孤繞郭。芳草盡潛洲。楚稔關天下。民魚亦可憂。(今年大水)

再遊黃鶴樓

買看山水興猶清。閑逐兒童樓上行。窗外鐘聲大別寺。杯中堞影漢陽城。峯連建業何曾斷。浪接瀟湘總未平。小艇犯濤如履地。果然水戰利南兵。

登漢陽東門城

朱欄照水殷。此地扼江關。芳草思名士。濃雲識字山。飛流何日定。到海幾曾還。擾擾千家沸。煙衰一老閒。

寄慰石洋居士兼訂匡山之約

留得餘生在。升沉豈足憂。雲霄爲選客。煙水作嘉賓。溢浦流聲壯。匡廬瀑布新。且依鬼谷子。何苦學蘇秦。

欲遊沮漳治一小舟已成志喜

性如魚鳥愛沉浮。夢到煙波也不愁。江漢自雄多惡浪。沮漳雖小足清流。青蓮國裏看雲坐。白雪灘頭照水遊。已似張融無片瓦。差同陶峴有三舟。

醉歌

危樓峨峨插天半。天邊江雪露清倩。未辨桃花扇裏人。先見一室桃花扇。畫欄展轉紅袖攀。壯士髯鬪美人鬢。夜半酒客皆咋指。將軍已奪岷崙關。(未句用中郎酒評語)

野鶴

野鶴立苗田。見人驚欲起。低飛數丈餘。依舊下田裏。

梅花鵲巢園中梅花盛開有雀巢於花間予冬來抱病疏筆研久矣見此偶有詩興并命無煩弟及未央述之和焉

天上無愁侶。移居白玉堂。應知來驛使。偏愛繞靈芳。泠泠依深雪。亭亭噪夕陽。仙葩絕匹耦。不用架橋梁。



其二

三匝從今定。瑤華第一柯。占隨鱗片亂。躍下鹿胎多。尾好還疑燕。舌香也解歌。東君消息好。終作女羹和。(鷓尾爐名)

大德寺元畫羅漢

開匣手拊識元絹。衣上水紋流淡淡。大耳長眉眼爍人。近觀不見遠觀見。模糊無處尋題字。守僧都不知年歲。開山長老舊傳言。西方神僧自貌自。

過崔晦之山居兒子能吟予詩偶作

三載何曾異短籬。最憐荷葉滿庭池。欲知不淺通家意。稚子能吟老父詩。

正月初四日從公安至三穴橋登新舟往遊鼎澧時病初愈

病逐寒威散。歡隨春草生。親朋絕故侶。煙水締新盟。大漢龍孫國。東吳虎女城。時清無阨塞。隨意作山行。(屏陵街有遺城係孫夫人作)

澧州晤蔡大參元履投贈並志謝

高牙雄峙楚雲阿。戟外層峯聚米多。白石紫蘭同道氣。赤沙青草擬恩波。片言也帶周秦色。大鼎能調夷夏和。欲識百城無害馬。茶山深處有謳歌。

其二

三秀仙人湘水涯。等閒睡霧總丹砂。登朝早已陳千牘。問俗何曾廢五車。飛蓋蘭江看錯繡。停舟茹浦愛分沙。憐才重見裴觀察。水竹遙存處士家。

澧州逢毛氏大姊以避盜至

瓔珞昨呈夢。蛛絲偶到裾。水荒多盜賊。山館暫寧居。住世貧兼病。同生姊共予。勝遊親說與。不用大雷書。

德山閒步

棕笠桃絲杖。層峯取次緣。綠筠依白水。清響答鳴泉。臺迥舒高嘯。松欹供假眠。暖風桃李路。日暮又歸船。

德山懷君超

一帆重過湖。枕衾依鷗鷺。日暮見煙林。維舟枉山住。尙識桃花蹊。熟認竹陰路。策杖上孤峯。倦倚枇杷樹。老眼倦遠矚。况乃多煙霧。俯過枉人灣。綠葉藏丹素。樓閣倏已新。遊人已非故。昔時賞心地。今日斷腸處。慧業豈不深。薰修俟晚暮。冶習未稍除。再來將無誤。壑舟送傷人。漏箭不能住。造物亦太猶。敢怨不敢怒。身如失羣鷹。煙水動哀訴。

李長叔水部以使事至鼎。晤于楊文弱席上。時一別廿餘年矣。長叔猶記辛卯下第。阻風泊漢川民舍。予語同行人曰。此處流水孤村。寒鴉數點。景亦自不惡。特吾輩懷抱自作祟耳。長叔言之。予猶依稀記憶。回首往事。升沉存亡。有如一夢。因把筆次其事。書之扇頭。

人生寧有幾。一別廿年期。流水煙村處。秋風暮雨時。升沉何足問。會合也堪奇。若不從君飲。桃花笑我癡。

### 贈文弱令祖可亭翁

雪堆莊外小停舟。著舊欣然一笑留。洞裏生涯黃石老。朝中圖畫赤泉侯。（漢靈帝令蔡邕畫亦泉侯楊喜五代將相圖）煙霞有癖欣同調。杖履如飛怯共遊。已約漁郎借避世。年年花底奉觥籌。

### 贈文弱

餘生誓不係塵纓。望見青山眼倍明。敢以晚研同尙子。只將夙悟讓班生。眉端常帶堆藍色。夢裏欣聞瀑布聲。白社舊交零落盡。與君世外締新盟。（晚研夙悟見謝康樂山居賦）

### 德山閑步

匏後煙巒緩緩登。鏗然閒杖一枝藤。未能免俗聽山鳥。旁若無人壯野鷹。花裏怪崖添秀

娟竹間流水太清澄。眼中誰是煙雲伴。且對忘機土木僧。（時有野鷹掠食）

花源道中紀遊并示文弱

一帆走朱陵。揚風如飛箭。忽枉故人書。藹藹遲相見。我行亦何常。去住惟所便。青山與良友。等爲心所戀。急呼舟人止。舟迴纒枉岸。重作武陵客。再拾桃花片。

其二

攜手上層樓。雪涼灑江津。隔岸天桃花。十里紅燦人。有如謝公妓。可望不可親。開軒來遠黛。眞酒羅佳賓。我媿爲父黨。宿悟班嗣隣。笑殺輕薄子。口頭常如新。

其三

武山何坦迤。樹裏見樓閣。試酌武溪源。清爽心神豁。停舟閱古牌。辨析窮奧博。一里雙魚梁。數部鈞天樂。

其四

淥蘿如篆刻。鋒刃駁雲霧。下臨百尺潭。丹碧寫練素。沿溪望前村。都似避秦處。停舟入花源。攜筇臨水步。桃花千樹紅。花深迷往路。帶月石間流。夜深響瀑布。清坐澹忘歸。一山滴浩露。

其五

漁仙水石聚。撥苔尋洞蹊。洞後如鉄甕。欲往無丹梯。穿石儼象王。截流渡江湄。共坐石中  
央。萬山盡約眉。

其六

新湘溪迴環。欲往疑無路。山色似攢蓮。水文如束素。溪上兩三家。非仙有仙趣。山神聞予  
言。明年當來住。

其七

怪崖水中央。往路臨無底。左耳屬于垣。右袂影沉水。山水實清新。胡爲拚一死。下崖復登  
舟。維舟溪山址。白石爲茵席。明月巖邊起。夜深潭水碧。清澄徹骨理。亂石蹲潭邊。森然若奇鬼。

其八

拭眼看危峯。狂呼欲墜笠。常苦膽量劣。可玩不可卽。望岫遽息心。刀劍視層級。昔日伯功  
曹。聞鼓以被襲。登城數覘賊。遂言膽可口。旬日逐子行。竦身凌巖岌。徘徊雲漢間。身輕等絕粒。  
僂子化健兒。誰謂老夫力。憶從中郎遊。常矜勇莫及。九原誰可作。三嘆有餘泣。

其九

初日照怡溪。舟行窮水派。溪水碧可憐。下似有光怪。山溪苦相依。山轉溪亦邁。舍舟覓舫

艤清淺見鱗介。石骨忽縱橫。溪流轉滂湃。山膚似鼎彝。拾石以相資。疾流蝕石文。懸針與倒薤。濤勢響玉屑。上沸如有械。小舟忽已窮。跣行縛屨芥。揭衣水至膝。力盡與無敗。行至龍角亭。旋將衣履曬。漁夫皆莞然。樵子亦發喟。

其十

水行繼以陸。重繭恣登眺。靈巖無好膚。空中而多竅。洞與洞相連。珠曲暗有道。溪流縈洞中。迴環出深奧。乍見雪文蝕。又聞水聲鬧。蛇行入重門。虛空發光耀。綠萼一粲然。毛女爲前導。朽骨載腐肉。摳衣畏泥淖。明明桃花源。隔水可呼叫。欲往不得前。綠慳空自弔。

贈別文弱

良緣不再合。心期會無因。年非盛壯時。百感增酸辛。骨肉旣相捐。良友亦中分。西瞻峨眉雪。東眺禹穴雲。中夜念往昔。五內忽如焚。一朝山水間。對子有餘欣。圭壁慙溫潤。蘭蕙失清芬。獵石終無厭。餐霞亦已勤。我有新著作。一一盡呈君。寂寞後來者。誰能定我文。

其二

西京楊與袁。煌煌世貴盛。朱衣與華輦。前後相輝映。袁氏較繁華。不如楊清令。謙謙君子德。之子可欽敬。春葩有餘妍。冬柏有餘勁。持此爲模範。歸以誠子姓。

花源道中

飛花十里染緇衣。回首漁仙舊釣磯。山點湘溪狐女黛。水橫穿石象王威。芙蓉城裏看新月。翡翠峯頭望落暉。周鼎商彝崖色似。繞來千匝不思歸。

中山曉行

秀壁牽人往。途崎步轉輕。初曦千葉影。浩露一山聲。頗厭桃花俗。偏憐石骨清。風柯與谷鳥相對語無生。

書周子冊中有中郎手蹟

大恩不報已千秋。纔見牙籤淚暗流。金剪書存情脈脈。玉樓人去恨悠悠。丹雞白犬盟常在。紫府瑤臺願莫酬。世事總來如夢幻。與君皓首話薰修。

將往太和由草市發舟

枇杷門外足風塵。且辦遊裝學道民。好鳥弄聲如姪女。奇雲作態似仙人。同居濁世非無事。得到青山別有因。清暑臺邊千丈水。楚王遺蹟定誰真。(清暑臺在今三湖內見水經註)

三湖

分風隨意往。一葉似飛翔。水上霞尤麗。波中草更芳。菱芽堪入饌。菰米可爲糧。中有荷花

蕩開來五里香。

湖中

半是征程半當遊。一帆自在不驚鷗。菱蒲滿澤圍孤渚。楊柳遮門繫小舟。曬網偶成漁聚落。采菱忽動棹歌謳。滄桑不待麻姑說。彈指紅塵換碧流。

宜城道中

寶馬重嘶冠蓋鄉。此生端的爲山忙。一泓素練蒲稍淨。千里黃雲麥穗香。宋玉墳邊花正好。齊髡驛外草尤芳。數錢媿女爐頭望。索取金沙酒味嘗。

襄中懷先兄中郎

五嶽同遊誓未忘。一簾獨往淚千行。青山到處悲王粲。明月曾經照謝莊。蘇嶺雲開濃似黛。襄江春漲沸如湯。尋思舊日經行處。鳥語花飛總斷腸。(王仲宣樓井謝公墩皆此中佳處)

由樊城早發

荷衣鳩杖道民裝。閒客遊山也似忙。柿葉滿村春晝暗。薔薇夾路曉風涼。逼來峯色神先醉。互答泉聲話正長。欲界仙都真在此。右軍何處問金堂。

武當



天柱居然龍鳳姿。羣峯屏息似追隨。聚沙灑墨三千界。駭綠驚紅十二時。春樹不遮石骨瘦。夏雲猶讓壁紋奇。幽崖別有栖真地。皓首黃冠亦未知。

其二

青巖何地不追攀。終隔仙凡未易班。隘處尙容千佛子。分來可作百名山。秦敦漢鼎存膚骨。瑤草瓊枝作鬢鬟。誰道此中靈液少。雷奔雪沸水潺湲。

太和山中雜咏

浪說三山與五城。而今親自到蓬瀛。珠宮恰好針鋒住。琪樹偏從石竇榮。貪看嶺雲繚壁色。喜聽谷水墜潭聲。芒鞋竹杖經行處。梨棗煌煌箇裏生。

其一

霞外仙標絕品題。吳峯越嶠隔雲泥。瓊樓寶閣傷心麗。複道危梁過眼迷。樹底濃陰清石徑。巖頭爽籟震山溪。好乘三五團圓月。天柱峯前一杖藜。

其二

靈境經年入夢魂。不知何嶽更稱尊。山爲函夏諸丘長。帝是軒轅有道孫。見真瞻楚澤秦川羅下界。日兄月姊貯天門。晴空萬里塵氛淨。一縷卿雲玉座存。

其四

向平何用苦栖栖。此地餘生足隱棲。  
樛栗子分狙母飯。榔梅花發道人妻。  
破雲緩步千盤路。帶月頻聽九渡溪。  
止恐搜尋終未徧。不愁無處問刀圭。

其五

煙眠月宿漸沉酣。邃壑崇峯任意探。  
不礙繁華隨點綴。有情汙垢盡包含。  
朝曦北嶺生濃翠。細雨南巖發異藍。  
七十二仙佛弟子。青山依舊隸瞿曇。

其六

煙霞金碧兩氤氳。異草奇葩處處芬。  
仙梵一山泉外冷。靜鍾千院夜深聞。  
樹如大士胸前絡。峯似天孫錦上雲。  
日暮五龍南畔望。橫披一幅李將軍。

其七

九朝物力鬪嶙峋。氣象居然逼紫宸。  
金龜有洞空陋漢。寶雞作時轉羞秦。  
露壇月館蕭清夜。祕殿深宮豔冶春。  
莫怪繁華異寂寞。由來天子作仙人。

其八

彌天絕壁鳥難通。也有平疇萬壑中。  
陸賈買來同好時。胡寬營處似新豐。  
割雲入眼千年

翠照水消魂十里紅。自是上真栖隱地。安容降禮作三公。

珂雪齋詩集卷之五終

珂雪齋詩集



珂雪齋詩集 卷之六

詩

須水部日華邀飲龍山落帽臺(時方繕修)

名山何必是崇高。歲暮登臨興也豪。雄楚望沙羅几席。堆藍蓋紫照旌旄。誰能公隙耽遊屐。自古詞人例水曹。粧點煙雲須韻士。忍將名跡付蓬蒿。(雄楚望沙俱荆樓名)

其二

不爲登高一望鄉。煙霞奇幻助飛觴。萬家生齒今天府。千里平原古戰場。柴紫峯頭雲浩浩。枇杷門外樹蒼蒼。豫遊譚笑敷文藻。前輩風流話亦香。

送張廣文歸桃源

且芟書帶草。重覓釣魚磯。白日瞿童鼎。朱霞萊子衣。夏泉添谷響。春雨縱桃肥。如此神仙國。三公也合歸。

早春入村

不知昨夜雨。但覺野莎生。百里菱蒲國。千秋狐兔城。雲分山寺出。風約渡舟橫。水照遊人影。棕藤且自清。

其二

莫負煙雲約。頭顱雪易侵。切泥塵世事。畫水道人心。帶月穿瓜渚。踏花出柞林。祇因春事早。垂柳綠沉深。(瓜渚柞林皆村地名)

早春書懷憶蘇雲浦

鏡中霜雪漸盈頭。檢點閒忙仔細籌。二十四番中令考。六千三萬醉鄉遊。和雲松葉遮茆屋。照水梅花覆釣舟。屈指今年行樂事。龍湖人在好相求。

竹鶴詩(王太學維南鶴夜失一足次早以竹代之遂起舞今尙存)

王郎王子晉。仙禽馴几案。臨風幽咽圓。照雪殊毛燦。怪哉忽如變。委頓良可嘆。豈因華表歸。偶值青城難。真類王貽兀。又同鑿齒半。世少紉骨膏。將有叱靡患。定煩龍爪書。瘞之焦丘畔。仙驥遇醫王。琳琅以續斷。彈指起摧殘。長鳴竦修幹。龍躍與鳳跄。星離復霧散。睠此凌霄姿。爲耳目玩。鶴膝既可代。何難長羽翰。王郎格外人。庭軒忍相絆。何不效支郎。縱之入雲漢。

送李謫星遊衡山寄呈李湘洲太史

春雨春帆別故鄉。祗緣名勝在衡陽。花深湘浦千重色。米到長沙五里香。寶洞開雲遊爽豁。簾前灑雪坐清涼。鄴侯休自悲留滯。殘老相期話未狂。

贈歸田老人

青陽日去素顏凋。豈以雲林換市朝。松柏難栽難得待。擬將十畝種芭蕉。

書卷

三徑絕葦跡。拂階草帶青。靜聽虛谷韻。臥看北山醒。宿鳥時驚竹。殘花尙凍瓶。齊中何所有一卷淨名經。

雲浦請告成却寄

喜擲賢冠與世辭。丙丁綬作釣魚絲。阮宣有地惟栽竹。庾叟爲家半是池。但採雕胡堪自老。只盟鷗鳥豈相疑。春來應有山遊興。准備棕鞵步步隨。

王別駕以明居士致仕還山有贈

萑蒲潭上叟。貌得海山歸。巖壑鱗深逝。貪雲鳥健飛。社添新酒盞。篋取舊荷衣。五嶽遊如決。予當逐孝威。

寄丘遊擊長孺塞上

胡風獵獵捲旌旗。舊是詞壇一健兒。老去關山羈定遠。夢中花鳥媚丘遲。閒持服匿澆情緒。新譜琵琶寄別離。鄉里善人款段馬。少遊行徑報君知。

病中漫興

家計雖貧未奪精。近來多病遂閒居。撫琴一室山皆響。吮墨頻年草似書。自散鉢齋供慧鳥。新敷盆藻護文魚。小勞亦是調身法。雨後園蔬手自鋤。

其二

山園十畝半新篁。嫁鬢疏莢似忙。豈以心灰分去住。總緣身病決行藏。空階月灑花枝雪。靜夜寒添鶴背霜。歌扇舞裙都委却。那伽妙定一爐香。

其三

青苔冷泠照柴扉。也有閒人伴息機。棗柏先生移錫至。煙波老叟擲綸歸。玄言不怕知音少。碧落從來賈本稀。燕雀相逢堪自得。懶隨黃鵠薄天飛。

其四

豔隕芳銷春又秋。鴈王鹿女共夷猶。偶穿竹葉煙中徑。來坐梅花水上樓。冷石寒汀鷗鳥夢。金題玉躡蠹魚遊。亦從藥裏關心後。閒却湖邊小釣舟。



其五

風簾能笑亦能言。玄對經年靜掩門。定裏空書憶往事。老來夢哭念深恩。雄心已逐煙雲散。綺習猶餘筆硯存。春水桃花還有興。一函先達武陵源。

其六

塵事何曾掛笑顰。閒時一杖步花茵。無才永定山中計。有病催成道者身。冒雪出雲朝絮絮。殘霞逗日夜鱗鱗。近來微有歆心處。調象干今漸已馴。

其七

綠琴入匣任塵封。老去逃人興轉濃。馬氏由來譏畫虎。葉公原不愛真龍。閒聽谷口懸雷瀑。細數山南破墨峯。知己可憐凋喪盡。盤桓空對一株松。

其八

世緣終淺道情深。况是頭顱老漸侵。白社六時銷晚節。朱陵四擇悟良箴。雕沙畫石他生習。點雪銷冰近日心。膚骨總宜雙澹漠。不妨皓首寄珠林。(天台家有思公朱陵四擇語重說法也)

夏道甫有杜姬之戚爲作悼亡詩

巧慧緣偏薄。驕嗔命太輕。鴛鴦纔罷繡。鸚鵡尙呼名。水月存遺態。溪花定別情。木樨香畔

語忽忽似二生。

其二

綽約誰能似。聰明劇可憐。點茶方易曉。養紙法難傳。不忍名香草。何堪對杜鵑。鸞釵猶在篋。銷作誦經錢。

月印上人書雜華爲作歌

覺行互嚴圓頓宗。流入支那東復東。波流瓶瀉無窮盡。上函猶在水晶宮。一言半偈豈輕聞。前人爲法已懇懃。木葉山花書妙義。紙皮骨筆記靈文。烏焉三轉卽成馬。解坑都學悠悠者。試看仙人吳彩鸞。蠅頭細字山中寫。(蜀中藏經多仙人吳彩鸞寫見小蘇詩)上人舞象德瓶全。真如紅火吐青蓮。才韜不賦碧雲句。心冷何須白骨禪。五載朱陵念漸休。無妨城市更遨遊。文字知得非文字。杖底青龍鈔可留。心閒已返雙荷裏。海印還生十指頭。窗外寒花作清供。鎮日無人香穗動。眼看柿葉幾迴秋。積得毛君十八瓿。誰將宗教分兩路。虛空穴耳難安厝。已知悟得雜華因。只在心手相忘處。

燈下有感

幾同揮塵話無生。青李何妨一寄聲。越射隴遊悲世路。南箕北斗嘆交情。衝風中燭花難

結凍雨侵香穗不成。野老看來存古意。丹鷄白犬締新盟。

### 蔡元履廉訪駐節辰沅率爾寄懷二首

卿雲珠雨峙神州。炎塞邀天使節留。逸典從來窮西室。清時不忍話壺頭。峒山聚墨層層嶂。溪水穿花曲曲流。邊事承蜩官署靜。閒來搖筆註春秋。（用杜元凱事）

### 其二

萬山深處擁旌旗。灑淑桃花問俗時。草檄文章真爾雅。磨崖詩句太幽奇。夷人不借黃龍誓。鬼國能歌白雪詞。數載茂陵閒臥病。登臨空自想追隨。

### 甲寅除夜與眷屬共持蔬素有述

相對伊蒲案。椒花罷舉觴。龍鱗松火笑。兔褐乳泉香。大喜身猶在。相攜隱不妨。豈因新守歲。膏已久辭牀。

### 其二

蕭然絕衆籟。深夜鳥移枝。久已悲遲暮。那能豔歲時。淡粧偕隱便。蔬食住山宜。塵網還相係。春風又到籬。

### 園居

潦草支塵事。閒僧不用邀。聞山皆欲去。愛雪只愁銷。春近忙移樹。溪平好作橋。詩文三百卷。全似許由瓢。

入村

好似催耕鳥。逢時一度來。煩心隨水息。睡眼得松開。古屋深黃葉。閒窗照紫苔。今年春色晚。池上未舒梅。

晚溪

鷄闌村市喧。棹動曉星滅。怪得夜衾寒。推蓬霜似雪。

送盛少尹東下

世途不可問。之子復歸田。鬢丞尙不能。何況少且賢。努力勤公家。晚餐夜省眠。亦知清白好。愛名不愛錢。修塗方欲騁。倏已遇迍邐。虎爪板不下。鷄栖車頓懸。榆枋已非遠。控地益堪憐。輕舟賦歸去。春岸草芊芊。飛濤溢浦雪。疎樹廣陵烟。栖遲豈不樂。壯士未華顛。魯國有男子。江上獨潸然。

元宵贈散本舅

同雲苦雨暗亭臺。未有瑤華照酒杯。佳節風光雖不似。歡場懷抱也宜開。時移入眼無陳

物老懶隨君作散材。歲歲願如燈上影。兒童指點說重來。

龔晦伯表弟齋中夜話悼念八舅

華堂金齒菴。夢裏舊歡娛。尙作羊曇哭。難呼彥伯盧。殘燈寒綺帶。鴻雪照茶爐。慚愧山公在。枯生後不孤。

同以明至二聖寺閒遊并送月公東下

初曦照柳浪。微寒猶宿樹。長堤直若弦。隱隱珠林路。石浦衣帶流。清淺立鷗鷺。過橋竹引蹊。嫩綠藏丹素。主閉寂中關。客移閒裏步。檀乳宿衣文。金疊生唾霧。應真龍眠圖。海濤楊惠塑。額珠久已尋。浮囊宜謹護。必來山中人。同歸山內住。春江送葦浮。秋水憶杯渡。蓮花漏催人。努力莫遲暮。

春日遊石洲同吳長統龔遴甫張景星賦

大江噴雪濤。中有走龍錦。江漲移宿儲。水落發新廩。未終滄浪歌。已到仇池境。尤物自成圖。華蟲新上衿。五采亂紛披。千絲相鈎引。苔裏駁奇形。潭中出幻影。乍疑蟻銜膠。微傅解錫粉。越雋空青深。磨嗟丹砂炳。冉冉吹雲氣。沉沉潑墨瀋。寶手旋螺圓。天女鬢鬢覩。磊落間疑星。迸裂忽成笋。風來飛乳燕。雨過出蒸菌。輕縠障樽蒲。薄烟罩鐘鼎。棗葉三山峯。針鉞九子嶺。瑩膚

吐夏雲餘竅出春蚓。闌筆翡翠牀。支髮珊瑚枕。絢爛玉妃裙。突兀聖僧頂。張口若有言。合隴似欲晒。連翻列弟兄。鈎連隨牡牝。可供道開餐。能填五鹿吻。何緣異質文。似亦分靈蠢。寢陋大可怖。姪穉還堪惑。是日天氣和。良朋俱不請。一笑上錦灘。盡人離舴艋。羣少滿衣裙。老眼須詳審。終日苦搜尋。得寶在俄頃。徘徊坐水邊。甲乙互相品。骨清急宜收。膚好也須屏。別有野逸趣。實之無等等。自縛居士律。二勒湯代飲。歸來日已西。玩弄失光景。懷抱有餘欣。一夜遂忘寢。

二勒

湯見白集

### 園居

獨自穿疎樹。誰能玩晚霞。蒼筠嘯土館。白鹿鍛翁家。雨過尋新菌。風停掃積花。故人書不至。春帶幾迴除。

### 閒步

舟居翻愛步。三里傍江斜。山雨猶藏樹。溪風忽聚花。穿雲閒揀石。折柳坐書沙。望望天桃色。層城一片霞。

### 江行

江上白霧生。無風先有氣。纔登一葉舟。便覺心無事。遠浦靜無人。魚蟹各占地。水邊樹色

濃雨後沙文細。柳下一僧歸。近村知有寺。春來弄煖寒。彈指四時異。黑雲忽隳風。波起蛟龍戲。暫入盧花林。不測候天意。

入郡

豈有塵緣迫。臨流聊自娛。尙存瓶裏雀。仍汎水中鳧。夾岸黃花照。連天細草鋪。餘生閒自好。敢作舊歡呼。

夜泊沙市

宿世疑鷗鷺。舟居減舊病。濤平春市印。日暮客檣多。照浦濛濛月。鳴崖澹澹波。無心學詠史。閒自唱漁歌。

寄沂州守李玉圃社兄

春草懷人意。萋萋滿道周。郢中無和客。泗上有康侯。魯國壇邊醉。王家池上留。秋來持赤管。聽雨續燕遊。

須日華署中同鄧少府石田朱奉常上愚小飲時日華權事竣  
將作參遊

行馬沙洲寂。遊龍草徑荒。深林藏古署。畫舫列長梁。野逸存茅屋。幽清對草塘。梨開猶蘊

雪梅老尙餘香。玉蕊依何遜。芳蘭挹謝莊。銀鈎鴉亂壁。細袞蠹酣牀。楚勝尊前話。吳泉飽後嘗。  
鮪湖魚自好。鶴澤鳥相將。陶令藍輿醉。戴公野服狂。體痊閒意味。(時予病初愈)官滿澹思量。  
石貌方怒。排雲鳥欲翔。莫言清簡甚。也爲看山忙。(郡城外有白鮪湖)

戲贈毛太初

相看倏忽過。知非手植青松今。幾圍莫道今年容漸瘦。君容雖瘦稻田肥。

眇仙瞽而美別予二十年矣。會贈以詩。今仍題一絕扇上贈之。

蕭郎鬢已皤。舊識笑枯槁。相遇盡如卿。我容猶未老。

予舊贈詩云。墮馬盤來晚更新。黯然無語似傷神。止愁一顧能傾國。故遣秋波不射人。眇仙尙能誦之。故筆于此。

有感

翠竹朱桃作四隣。徑生苔駁几生塵。彌天佛法候門去。誰肯山中問故人。

送須日華遊蓼山

春風披拂楚江湄。夜夜烟嵐入夢思。詞客去時梅惜別。清郎行處鶴來隨。(時署中偶有鶴至)  
亭臺已浣渚宮俗。洞壑難忘蓼嶺奇。蠟燭澗邊千丈水。山靈應乞解嘲詩。



吳長統至柳浪哭中郎有贈

世路今如此。栖栖何所爲。柳浪來一哭。萍跡轉堪悲。苔積茵花徑。塵生汎月池。孤貧齊墮淚。之子淚偏垂。(溟音耶)

度門屢遣人問病茲復來且寄詩二首因步其韻答之

烟雲隨處是。世外幾閒人。一水藏清貝。千峯繞定身。橋邊猶有笑。鏡內已無塵。疾病頻相問。咨嗟法眷親。(度門有拭鏡擷取秀師偈中語也)

其二

大散初辭藥。羸軀漸捨簾。微靈存泡沫。回首駭風燈。歲月誰能係。神明不易升。入山無再計。樓楯卽同凭。

閒步承天寺

三十年前住此中。入門還聽舊時鐘。古殿風高盤鶴鵲。空塔月朗沸兒童。措大如卿穿廊廡。庾信羅合何處所。莫言寂寞少譚人。黃家片石猶堪語。(寺有黃魯直碑)

朱奉常上愚招飲郊園賦

密葉柴關寂。繁籐徑路幽。聚山成九子。疊石是三侯。秘閣筠光照。修渠蕤雪流。主人絕俗

累方略見林丘。

其二

都無穠冶氣。水石發清姿。一角聊施寺。(用徐勉事)千畦盡作池。入林熟鳥認。鼓柁慧魚隨。  
壁內窮名理。無心對弈棋。(圖東角有小蘭若)

塔橋春遊

流水石橋路。踏花舊勝場。七盤來冶女。三闌集兒郎。馬滅塵猶在。人移草尙香。渚宮十萬戶。狂走爲春忙。

其二

三里朱桃逕。游人纈似梭。水邊時見舞。樹外忽聞歌。猶恨花枝少。誰驚馬鬣多。道人別有嗜。谷鳥與風柯。

春遊四絕

桃花扇底步逍遙。野外鴛鴦態轉嬌。日暮游人齊注目。一枝春色過河橋。

其二

溪邊無處剩芳莎。西日沉沉奈樂何。青雀舟中傳宋臘。天桃枝下舞曹婆。(見元集)

其二

無端歌笑總如狂。傾國踏花鼎沸忙。急雨數通朱鷺響。衆中知是汝陽王。

其四

草色淋漓花色燃。古墳作案醉留連。芳魂日夜聽歌舞。偏道揚州好墓田。

張相墳

牛眠童起啼。共掉石人耳。豎子莫狂喧。江陵公在此。

別須水部日華還朝

移沙取石貯輕舟。清冷何曾似宦遊。春雪歌成辭郢里。梅花落盡別揚州。東風自護桓公樹。明月誰登庾信樓。兄弟凋殘知己別。枇杷門外淚交流。

題穎中卷

眉上山光杓內泉。南參北訪問因緣。石霜舊有宗風在。枯木堂中白練禪。

題文華王孫小像

微濤生偃蓋。植杖意欣然。莫是聽漁梵。將無憶酒泉。衣沾嵐氣滴。神冷瀑流懸。州渚蘆花好。還添泛月船。(用趙王孫子固事)

贈別關外侯

詞人不合到荊州。苦雨淒風只敝裘。桃李凋殘春又老。勸君莫上仲宣樓。

登仲宣樓

久矣承平日。登臨壯鄧疆。水邊三市潤。樹裏萬家藏。南浦笙歌沸。西園劍鳥忙。驅車行樂好。游子不思鄉。

其二

如掌神皋地。微茫一縷川。日酣朱艷閣。春老綠沉田。古墓隆遺伏。遺城斷又連。不須詢往跡。朝市有移遷。

其三

淒惋王孫賦。含情託怨嗟。人徒驚繡虎。君豈類泥蛙。嘹唳衝風鴈。飄零帶雨花。毛班知幾許。夷亂委泥沙。

其四

百戰干戈地。難尋季漢碑。清漳無往跡。朱檻又今時。閨國刊題額。才人借藻思。好文兼好武。猶憶小由基。(樓爲高季興之望沙陳曉吾作。守改今名。陳善射。號小由基。)

湘城歌

湘城十里極方幅。城中無人春草綠。幾從蘭若望層城。偶值門開一寓昔。憶昔賢王信天  
牖。文藻聰明窺二酉。丹砂不事淮南仙。平樂寧同東阿酒。左列六經右史籍。東平爲師河間友。  
琉璃硯匣常隨身。翡翠筆牀不離手。分藩亦社近三湘。不踏霜露守金牀。漢家刀筆胡相迫。天  
上鈎鈴永隔房。葳蕤自鎖百雉城。身騎白馬繞城行。焰盡珠樓還寶閣。灰埋乳燕與嬌鶯。鳴鞭  
直入紅雲裏。火光三昧真龍子。隆準天人亦有靈。白面書生胡乃爾。誓將園宅付灰塵。不用天  
智玉裏身。要離尙有埋魂塚。咸王遺事淚沾巾。屈指已經九皇帝。空城寂寂門常閉。隆處爲臺  
污處池。辟邪天祿溝中棄。石竹花開野徑幽。龍鬚草長無人薙。麥離離兔鹿肥。每歲采來供  
大祭。叢楚豈無青兕藏。英魂應挾彤弓至。赤籘朱龍火中仙。追隨或是宋無忌。空城荒草令人  
悲。古木蕭條屯朔吹。只今風雨陰霾夜。城上猶聞鐵馬嘶。

天皇寺孫太史鵬初偕令子雙王士先小集有述

風雅今耆舊。相將過柏堂。(寺舊有柏堂)松枝爲麈尾。碑石代繩牀。阿育容如故。僧繇畫已  
亡。乘閒來豎義。屢照借清光。

陳七洲詩人孫出家爲僧號虛白賦此贈之

寂寞才人後。飄零異代孫。猶堪傳慧業。切莫厭空門。世隔藏書散。家貧故硯存。草堂遺蹟好。努力遡禪源。

其二

回首箕裘事。蕭條實可悲。開松求寶劍。鑿柱取遺詩。尚食文人澤。猶蒙國士知。中郎存意氣。倒屣事堪追。(孫騰初太史與其祖善甚念之并贈以詩)

其三

出家男子事。祖武漫思繩。辛苦區中匠。優游世外人。水聲生慧性。林影悅閒身。莫自悲寥落。如來棄轉輪。

其四

送汝依蒼舊。栖山道亦尊。無求真釋子。不拜是沙門。日永伊蒲送。天寒衲被溫。椒園蘭若好。六字度晨昏。(時送之依寶方)

登雄楚樓同諸王孫

千里平原地。得山如得寶。此樓西窗外。八嶺出林杪。雖無疊嶂奇。淡冶亦自好。城內千萬戶。黃棘北煥道。霧棟與雲楣。櫛比呈工巧。高廂隨寶馬。日夜塵浩浩。城外見綠郊。倩林依白沼。

是時方田作。數點春畦小。天下久矣乎。生齒樂義暉。莊院如蟻封。松柏似蒿草。白晝寂無人。蛙鳴沸隍蕩。欲雨綠暗村。微茫類初曉。憶昔楚文王。丹陽險可保。却從沮漳內。移出江漢表。去此十餘里。郢城基可考。章華清暑臺。三湖恣登眺。白波昔揚塵。變遷笑烏爪。孟老導沮漳。三海連浩淼。至今西北路。尙有水縈繞。予好攬奇勝。輿圖恣探討。試說與王孫。如天寶父老。千古奮戰場。英雄迹已眇。雖異察愁時。頗同甫潦倒。日暮歌鐘發。落花深不掃。相牽理金尊。聊以澆憂惱。

夏道甫小園（園有垂柳）

張緒當門立。婆娑映水斜。郵泉新試茗。（是日飲嘉泉水）稅地遍栽花。冶習如春草。閒情等幻霞。何妨兒輩覺。天際想琵琶。

鄧田仲王維南邀飲落帽臺懷須水部

蠟屐穿花至。佳人眇一方。題碑猶未燥。種柳已成行。山水開生面。亭臺宿異香。郵程經晦朔。屈指到維揚。

飲小泉王孫園

別業居城市。灣環盡碧波。清笳穿細柳。芳櫂避新荷。燈下青睞舞。尊前白緒歌。看君眞愛客。能不住煙蘿。（白紵亦名白糖）

題瀛洲王孫像

十里花開水滿湖。深山深處靜敷蒲。欲知七寶金輪種。看取張弓掛矢鬚。（唐太宗賢能張弓

掛矢）

其二

少年結客氣如雲。走馬三河俠少羣。近識塵緣如夢幻。桃花消息問靈芸。（卷上畫一禪僧對

坐）

其三

如雨飛英下曲池。山空恰與道人宜。而今莫問生前事。對面清談果是誰。

其四

桃花洞口路分明。流水奔巖似有聲。彷彿金仙來共語。長生不話話無生。

寄龍君御（時往漁仙寺）

今日龍君御。前生馬伏波。重來尋洞壑。偶爾寄煙蘿。凱曲爲漁梵。戎衣作釣簑。一丘胡置

汝。西塞有干戈。

汪師中自花源來得龍灘公楊弱水消息喜而有贈



桃源洞口試漁竿。鏡裏濃鬢取次看。顏似朱霞鬚似雪。青山真勝紫金丹。

其二

胡麻香飯也慇懃。終戀渚宮返故林。自是花源留不住。迷津未必似劉歆。(歆印花源後問津者)

其三

揚帆拾月過溪頭。馬伏波巖怪石留。逐虎咒龍開洞壑。喜君親見謝康侯。(時龍躡公子伏波巖前後開得古洞數處)

巖前後開得古洞數處

其四

笑顰難作世人緣。藥裹蕭條伴草玄。清白可憐楊御史。不能贈汝買山錢。

無題

錦鴛憔悴舊容顏。獨倚金籠鎖日閒。笑殺禿鶻湖畔鳥。斜風細雨伴魚蠻。

上愚枉舟看渡有述

晴沙十里綺羅圍。人語濤聲沸晚暉。君自忘機親海鳥。我方縛律屏江妃。穿花乳燕凌波去。戲水猶龍帶雪飛。幻雨奇雲隨過眼。玄言相對塵頻揮。

舟中逢武昌胡季常

蜀雪消時泛楚臺。鄂江日夜似奔雷。瞥然遇着滕元發。獨立扁舟破浪來。

其二

上無片瓦下無塵。流水聲中遇道人。西塞山頭遺蹟在。泛家浮宅好相隣。（季常家近西塞）

戲贈張心蘭

四海覓知己。豈敢輕故鄉。故鄉尋故人。有似捉迷藏。面顏不得親。况乃輪中腸。誰知十萬戶。中有一女郎。女郎具慧心。出口成宮商。好客愛文藻。閒情寄茗香。予已學無生。不逐少年場。蕭然聲色外。聊以銷景光。我非驚蛺蝶。君豈野鴛鴦。一枰斃了却。攜子訪金堂。

遊便河

十里濃陰路。殘鶯佐酒卮。過橋添柳色。近岸損花枝。頗恨舟行疾。偏嫌月上遲。天皇蘭若。在披草覓遺碑。

沙橋

了了見潛魚。且來橋畔坐。沙橋名尙存。不見仙嬪墓。（仙嬪元微之婢也葬於此）

太白湖

太白自蜀來。江陵當暫止。應過此湖邊。往媿雲夢女。  
題王弘釣魚

本非釣魚人。聊以寄瀟灑。意不在釣魚。在看釣魚者。

三湖雜咏

百里菱蒲路。田田亂水涯。新荷香自好。不必待開花。

其二

湖水發清光。了如秋月炯。若無荇藻文。不似月中影。

其三

朝冶波中日。晚凝雪上霞。平湖三百里。一半是荷花。

其四

宗炳輟衡游。三湖投老住。來年高築臺。題曰臥遊處。

其五

曬網起歌謳。采蓮聞語笑。嬉遊水煙中。信也漁家傲。

其六

遠水布煙林。波中數點黑。有如新繪圖。飽墨尙餘濕。

其七

急將江上舟。來作汎湖用。夜宿萬花中。濃香入睡夢。

訪蘇潛夫于小龍湖賦贈

聚落雖然住。何曾異泛家。掃門千丈雪。出水萬橋花。漁浦通僧寺。遊舟亂釣槎。不須重點綴。煙水也繁華。

其二

畚土添花徑。防湖漲柳渠。黃蘆親睡鴨。碧水伴嬉魚。沼墨知臨帖。松鱗驗著書。重追宗炳跡。新築臥遊居。(宗少文舊築室三湖)

其三

貯水恣魚戲。蕃林任鳥騰。詩招千里客。禪致五方僧。開眼琉璃觀。潛身鷗鷺朋。團團龐老宅。別有一枝燈。

送僧達止遊峨眉

巴水千層雪。孤藤何所之一。從良友逝。不忍話峨眉。

居沮漳有懷郡伯吳表海先生

沮漳江上作漁翁。鈴閣猶遲一紙通。白社有心邀范寧。青山無路伴羊公。春風夏雨酣南國。嵐字煙書遍渚官。試看停車親種柳。于今搖曳大堤東。

三義河水大漲同寶方達可二僧泛舟

閒隨淨侶坐輕舫。張緒婆婆盡沒腰。水上山城如島嶼。西來帆影在雲霄。朱欄翠袖新江閣。細雨垂楊舊板橋。喜有高僧茶說法。謾勞遊女篋相招。(未旬書所見)

沙市水漲時六月杪矣居民猶競渡口占

等閒滄海變楊塵。九陌茫茫倦問津。六月已殘猶競渡。楚人終是愛靈均。

初入沮漳步達可韻

苦愛堆藍秀。沮漳六月遊。水程全失夏。山夢不藏愁。積練明村市。濃陰聚釣舟。南朝居士地。無主也須留。(地名百里洲卽陸法和住處)

其二

三年柴紫夢。今日遂閒遊。山屐同無着。峯巒似莫愁。懸雷初發水。激矢兩來舟。莫怪西風惡。煙村自可留。(江湖間舟相掠而過名曰兩來)

沮漳道中

漁歌入耳夢難成。一曲清流起濯纓。槳後圓渦如酒盃。舟頭沸水似茶聲。古郵久已迷三國。（三國時襄陽走荊州道由此）遺址猶能辨萬城。欲訪荆山居士第。茫茫江浪與雲平。

舟起

一夜翻盆雨。朝來旭日新。待風閒估客。防水聚村民。菰米家家飯。楊枝處處薪。白頭無再計。沮上老漁人。

紫蓋道中

直馬萬山頭。雲如潑墨起。斯須走怒雷。擊散一天雨。

至紫蓋寺

流水乍停聲。松風漲山谷。急登正法樓。聊豁平原目。大江百里外。晃耀如可掬。澹澹江南山。雨後新膏沐。顛末發深藍。白雲纏其腹。夜色漸蒼然。猶能辨松竹。明月出疎林。積水浸原麓。山行忌夜猜。還愁耳生軸。六月抱雲眠。畏寒不畏燠。

紫蓋道中值雨

不測滂沱馬首來。東生西沒走驚雷。朝霞已識非晴兆。夏霧由來是雨媒。縱有松陰難障

蔽急尋樵舍莫遲回。片時雲淨天如拭。新沐山容朵朵開。

### 途中遇雨口占

未。莫是銀河綻。雲端發怒濤。牧兒藏石竇。樵子戴松毛。皮骨聽羸馬。泥沙任弊袍。臥游今尙未。跋涉敢辭勞。

### 初至度門晤迹公

猶有餘生在。重忻見故人。不眠相對夜。幾死可憐身。風雨全侵笈。泥沙欲滿巾。家園何足戀。白首侍天親。

### 送達可還蜀

聞說蠶叢路。炎天亦有冰。看山親雪領。聽水過嘉陵。(用國素事)雲氣穿疎葛。石聲出瘦藤。他年兜率悅。詎止解文僧。

### 溯溪

初曦明乳窟。新霽愛溪澄。飛瀑連花墜。欹巖帶樹崩。杖驚栖棘鳥。水隔送茶僧。山頂多松韻。披蘿取次登。

### 溯沮漳還郵(時予將治裝北上)

沮漳清淺石磷磷。百里鳴蟬沸綠津。睡取賢冠旋擲去。必來溪上作漁人。

未央姪應省試口占贈別

風靜江如拭。行行黃鶴船。兩家惟一子。榮別也凄然。

其二

造物酬陰德。朝廷急異才。捷音吾久得。五月桂花開。

其三

努力追前輩。開門待汝榮。未能離世網。安敢薄功名。

其四

雋後登黃鶴。揮毫騁藻思。誰言崔灑後。樓上更無詩。

無題效徐庾體

鎮日平臺使。嘈嘈口似簧。防身愁意緒。避客病梳粧。野鳥寧無侶。山花各自香。肯同劉碧

玉偷嫁汝南王

其二

豈是桑中約。前程自付量。甯甘賣餅者。不肯事君王。



三湖泛舟

得水頻須泛。蘭橈一笑開。朱霞僧遠寺。綠霧呂仙臺。滿月燒林出。秋風疊浪來。不眠明月夕。在清夜且徘徊。

其二

晚風自送小船行。行過菰蒲乍有聲。共指遠林獵火起。不知月向此中生。

遊山偶與客語成句

逢山即便遊。不必匆忙去。四十餘年忙。所忙成何事。

汪隣漁園書事

依稀景物類田家。綠柳長橋一水斜。未到重陽先落帽。總因籬菊蚤開花。

送人至太和

輕粧淡抹似仙娃。眉鬪青山臉鬪霞。白玉壇邊私自語。無人知是懺煙花。

送金仲栗入蜀

忻逢旋惜別。密雨暗江干。我望長安遠。君悲蜀道難。黃牛千丈雪。白帝萬重灘。幸有知交在。應憐范叔寒。

荆門道上

漸遠南平路。峯巒拂袖迎。劫灰隨處有。楚雨偶然晴。山郭還堪憩。石田亦可耕。清時無阨寒。人踏虎牙行。

其二

三國荆襄道。沮漳舊往來。虎牙真是險。驛路幾時開。地瘠須刀火。年荒盡草萊。惠蒙泉自好。掬水洗塵埃。(三國時襄陽至荊州路俱由當陽)

小藍橋

一片桃花別樹頭。泥乾風亂不能休。藍橋已度人何在。古木蕭蕭水亂流。

麗陽道中

歷盡羊腸路。崎巖尙未平。野柑霜後耀。秋草雨中生。西去山皆破。東來水乍明。斜陽須策馬。佳酒想宜城。

襄陽嘲李伏之

三年不到鹿門寺。一日遊完參上山。兒女情多清趣減。幾人忙裏解偷閒。

伯和王孫席上

每經瘦俗便咨嗟。不合生他殷麗華。今日尊前疑頓解。幾迴太笑倚琵琶。  
九日過裕州州守許倫所臥病口占一絕

九日莫尊欲對誰。鴈行飄泊不堪悲。天涯兄弟重相聚。又是匡牀伏枕時。

朱仙鎮五絕

先朝名將典刑存。分關從來大帥尊。天子自臨猶不拜。金牌誰敢到轅門。

其二

收却金牌走戰場。糜軍直復舊封疆。迴戈急斬奸臣首。迎取君王入汴梁。

其二

乘勝長驅靖虜塵。中虜日月可重新。康王如狃偏安計。五國城中問主人。(時欽宗尙存)

其四

可憐大業壞垂成。龍象翻依兔徑行。畢竟南朝多否運。堂堂虎將學書生。

其五

官道垂楊只瘦柯。黃沙日夜變芳莎。遊人一掬冤魂淚。灑向前朝舊運河。(祠前卽宋運河)

周藩竹居宗侯宛委山房賦贈

城裏煙巒入畫圖。仇池有穴到蓬壺。峯頭忽上峨峨髻。洞口頻穿曲曲珠。瑤草瓊花薰寶帳。漆書銀字照全鋪。莫驚譚笑敷文藻。劉向原爲漢大儒。

贈阮太冲 太冲以先人嗣宗墓在尉氏故移家居焉

豈有佳公子。胡爲客大梁。先人存釜鬢。遺跡久荒梁。披棘尋瑣碣。依雲築草堂。千秋思醉骨。坯土有餘香。

淇縣道中值雪

霏霏忽蔽天。楊柳尙餘妍。城郭方飄警。郊原已皓然。共山添澹冶。淇水益澄鮮。正作干時客。高眠愧昔賢。

途中口占

人言行路難。我言行路閒。雨餘拖碧玉。細看太行山。

琉璃橋口占

飛沙十里障燕關。身自奔馳意自閒。日暮郵亭還散步。琉璃橋上看青山。

其二

餘霞猶自宿林丘。煙蕊嵐嵐翹天際頭。十里長橋瑩似雪。一泓清水帶冰流。

其三

寒泉日夜洗塵埃。無數青蓮水外開。滾滾遊人橋上過。幾曾着眼看山來。

其四

斜陽嵐彩照清流。五色妖霞水上浮。獨倚危欄成一笑。北河猶自有南舟。

喜花兒

曉粧埋罷下塔遲。寒鴉軋軋鳴凍枝。簾外斑驕向門嘶。不是兒郎卻是誰。雪花如掌滿天地。偏郎來處是此時。暖酌一杯盪寒酒。中間一朵喜花兒。

桃花曲

燕山十月弄寒威。簪裙相索夜無歸。十五女兒鬪芳菲。桃花馬上桃花衣。下馬入門笑相向。天外遊絲同蕩漾。暖飲三杯雪花酒。衣上桃花在面上。

卽事

水沉滿燕對青娥。只說因緣不唱歌。天女持齋居士肉。祇緣身是病維摩。

米仲詔湛園夜集看梅花分得七青韻

歲時不用嘆飄零。勝地還忻聚德星。怪石已驚呈幻巧。寒花况復鬪清靈。維摩居士存丰

骨。姑射仙人有典刑。玉照堂前多艷質。何如名理對芳馨。

邀君御修齡諸公小集淨業寺并送李增華水部南還

西山樹裏碧嵯峨。十里樓臺浸綠波。景似江南堪一醉。江南人去興如何。

喜君御先生過宿次韻

未來先入夢。那忍不頻過。豈義維摩詰。譚兵馬伏波。嚴城將徹漏。西第尙聞歌。話到圓通處。風塵奈爾何。

同君御修齡諸公夜飲米仲詔宅分韻得豪字

纔動歌鍾興便豪。左持大白右持螯。非關楚國多才子。自是詩人例水曹。四壁石林雲乍破。一簾花影月初高。共知治習泥邊絮。沈約何須懺袖桃。

修齡邀遊西苑有述

鷲羽追隨出廣途。誰知清禁有江湖。浮空皓雪瞻銀浦。入樹黃雲辨蕊珠。寶閣乍停山轉淨。瓊臺欲上徑尤紆。峨峨魚甲仙都物。羞殺秦松號大夫。

送修齡按貴州時苗部未平

小醜無端抗僻陬。惠文在冠好度劉。決然髮去難容虱。誰敢刀存不買牛。車逐火雲歸夢

澤旆飛寒雨。下黔州。多艱時事須公等。莫問漁仙渡口舟。

### 白大行五石出使周藩有贈

白也維揚俊。論交快此生。夏雲詞鬪冶。秋水骨同清。屐跡追靈運。輜程了尙平。信陵席上客。爲我問侯嬴。

### 君御過宿口占

古廟無人草色濃。夜深寒雨滴杉松。十年湘水飄零客。今夕同聽長樂鐘。

### 書許翁冊

燕趙有奇士。被褐懷珠玉。一發卽息機。頤神居巖谷。隱德徐穉流。上行庾誅屬。九畹惟滋蘭。百畝只種竹。白波盟鷗鷺。青山友麋鹿。欲知著書多。但看松鱗木。仙不訪雲來。禪不叩西竺。閒學陶徵士。北窗臥已足。老學袁伯業。青編常誦讀。更有萊妻賢。借隱安林麓。種德如耳鳴。貞淳挽澆俗。閱風桐乳巢。豐隆何用卜。七業迭雲興。朱衣與華轂。旣饒何氏簡。復贏崔家笏。西第敞華筵。姹花映醪醕。下有弄雛人。黃髮笑相逐。天欲酬潛德。賚之以異福。優游地行仙。永算無須祝。

### 海淀李戚畹園大會詩八首

滿目塵沙塞路蹊。夢魂久已憶山棲。誰知煙水青溪曲。只在天都紫陌西。鎮日浮舟穿柳澗。有時調馬出花畦。到來賓主紛相失。總似仙源徑易迷。

其一

百尺飛橋宛轉欄。聞香照影且盤桓。蹊邊忽遇三侯石。杖底驚逢八節灘。仙驥止同家鶩狎。國花長作野蔬看。雨餘山翠濃如滴。玄對還宜上露壇。

其二

沉綠殷紅醉曉暉。入林花雨潤羅衣。盤雲只覺山無蒂。噴雪還疑水有機。遂與江湖爭皓淼。可憐原隰總芳菲。何妨攜屨同栖宿。煙月留人詎忍歸。

其四

追隨鷺羽到山阿。梓澤蘭亭未許過。移得好花通禁苑。引來飛瀑自銀河。微風嘯徹捎雲竹。輕雨香添帶露荷。野逸繁華都不礙。纔聞灌木又聽歌。

其五

鴈翎檜覆虎紋牆。夾道雕欄織畫梁。錦石三千呈翡翠。珠樓十二繞鴛鴦。林端御水偏明媚。霧裏西山半隱藏。但喜追隨同沈謝。何知池館是金張。



其六

久矣煙波願未酬。何期浩蕩泛清流。江南豈有千人帳。薊北今饒萬斛舟。錦柅蘭橈穿別浦。繁絃急管過中洲。一灣淨水菰蒲綠。宛似蕭湘曲裏游。

其七

煙雲纔見已顛狂。把臂清林趣更長。語鳥自能清熱惱。流泉端的洗塵忙。石無甲乙皆呈怪。花有新陳不斷香。尺五天邊饒洞府。嬾隨逸少問金堂。

其八

枝中見舞水邊謳。盤馬登樓復蕩舟。不但稻麻羅國卉。直將車斗算名流。披陳奧妙皆龍勝。描寫煙嵐盡虎頭。佳會欲歸還訂約。芙蓉花滿再追游。

後湖觀蓮同龍君御楊修齡馬康莊仲良兄弟蕭爾先飲

如何韋杜曲。有此芙蓉池。雨至綠先暗。風來紅盡披。深畦藏冶鳥。臥樹走歌兒。亦愛無花處。浮空雪浪奇。

西湖看荷花寄客

十里清流洗客塵。銷魂芳豔滿湖濱。秋來亦自堪行樂。只恐荷花不待人。

飲劉百世鏡園

湖上樓臺映雪明。佳人招醉芙蓉城。柳枝幸不遮山色。荷葉偏能益雨聲。遲月且登高閣坐。穿花更棹小舟行。長安豈是煙波地。戲水觀魚愜野情。

過史金吾玉泉山庄口占題壁

偶親碧岫容。忽共清泉話。大喜輞川庄。歸予杖履下。

其二

看竹不問主。子猷大有韻。若逢佳主人。那忍不相問。

其三

名園共韻人。缺一皆成俗。山水有清音。還宜絲與竹。

住中峰寺

宛宛磊珂路。森森松柏林。當風眠谷口。背日坐山陰。仰視星辰大。俯看煙霧深。晚嵐侵骨冷。未許薄衣衾。

碧雲寺

寶磴山全琢。璇題日并懸。金鈴長護果。石臼遠郵泉。鴨脚葵含雪。漁竿竹裊煙。市廛如火

夾洞裏冷難眠。(銀杏亦名鴨脚葵)

臥佛寺

山深晝寂寂。危塔冷斜陽。萬畝香爲國。千圍樹是王。(殿前有婆羅樹。經云婆羅樹王。覓泉源更遠。尋石徑偏荒。數里新篁路。將無似楚鄉。)

又

別嶂都如舞袖披。林含雪霰夏尤宜。和雲種菓全無地。分水澆花不到池。閒日閒身同客至。老農老圃問僧知。殿前千尺無名樹。猶是開元大曆枝。

古刹有感

泉自悲鳴花自開。窗書鳥跡徑生苔。精藍占去爲池館。一歲何曾幾度來。

送藩參君御先生至晉

雄才豈合伴樵漁。旌旆悠悠入舜墟。九塞風塵終借箸。二陵煙雨暫停車。雲邊康樂朝乘屐。帳底征南夜注書。莫憶仙源棲隱處。中條山色照人裾。

七夕集米友石勺園

聞說園林勝。雖忙也愛遊。到門惟見水。入室盡疑舟。葦鳥凌香雪。尊疊映綺流。藕花猶自

好。宋玉漫悲秋。

其二

不趁佳時至。其如勝地何。看山真是近。得水最爲多。衣桁來沙鳥。書床避露荷。也忻吟灌木。不礙更聽歌。

池上樓詩爲張見一賦

青山在城市。紅塵霏煙雨。近嶂吐新眉。澄潭流淨乳。枕巖置臺榭。開徑爲場圃。風柯有清音。霜葉代屢舞。千里裹糧游。得之在步武。飲食烟樹俱。無勞攀躋苦。客兒猶是客。寧若君爲主。未能忘曲蓋。寧久與山伍。張君素心人。水石爲肺腑。若入蓮社中。必爲遠公取。美哉池上樓。日夕可揮塵。他年得追遊。爲作山居譜。

題宛陵吳思每尊公遺像

九京人去邈千秋。堂上丰神尙可求。宛似扶筇歸近岫。猶如敬筭盼飛流。仙翁事業閒鷗伴。令子文章倚馬儔。隱德清風堪不朽。漢家空貌赤泉侯。

壽丁年伯

鷗鳥閒盟了不猜。水紋山氣靜徘徊。寶琴在室名珠柱。綃帙成書號玉杯。家近淮南花似

雪門迎江水浪如雷。稱觴此日須桐酒。令子新從上苑來。

梁中祕尊人榮封卷

陵霞高韻著華陽。鶴轡將雛集帝鄉。手結牛衣劉處士。銘傳龍骨漢仙郎。紫泥乍映蒲筍字。蒼王新鳴薛荔裳。鷄樹鳳池清切處。當階紅藥助稱觴。

湖上

十里丹樓似落霞。一湖寒雪浸人家。芙蓉斷處輕風過。盡寫徐家沒骨花。

送張收之赴銅仁府幕兼寄郡貳張昭余

夜郎明月冷蕭蕭。薄宦還驚去國遙。路入五溪山萬疊。憑君傳語問龍標。

候考館無期南歸良鄉道中書懷

桑乾清淺石鱗鱗。霧裏西山看漸真。喜作江南題柱客。羞爲丞相掃門人。來時書劍猶秦士。去日旌旄已漢臣。莫怪榮歸翻下淚。可憐不逮白頭親。

過督亢

斷橋流分臥枯楊。千里飛沙草色黃。督亢如何稱勝地。荆卿持去釣秦王。

涿鹿邸中獨坐

旋風乍起似驚濤。馬鐸郎當伴寂寥。莫嘆長途無火食。官槐墮葉儘堪燒。

易水

流水沸雪曉湯湯。古岸傾頽草樹僵。此水何緣逢俠客。至今兩字尙餘香。

其一

葉聲纔寂雁聲哀。一道清泉去不迴。游客豈宜輕此水。曾經壯士洗塵來。

金臺

蕭條三戶冷炊煙。凍浦流冰韻悄然。十載築臺親禮士。如何止得一入賢。

涇陽驛步龍君御壁間韻

千里飛沙蔽夕陽。松檟久已失青蒼。愁逢朔塞千層雪。夢斷深閨五夜香。載筆無緣隨左馬。開畦有日晤求羊。等閒拋却塵緣去。尋取山中褐布囊。(用陸龜蒙事)

途中懷先兄中郎

墮地何曾遠別離。難忘官路並行時。通宵磨麈眠嫌早。冒雨登山到恨遲。奮筆偶然矜寫字。分箋時復鬪聯詩。如今寂寂長途去。急管繁笳止益悲。

珂雪齋詩集卷之六終

珂雪齋詩集 卷之七

詩

晉州署中與郡伯李素心夜話

蠶拂飛沙衣拭塵。久勞魚尾暫休鱗。盤飧豐溢安遊子。更漏分明重主人。華燭開筵新意  
味。寒燈書掌舊艱辛。雞壇兄弟今誰在。相看重驚現在身。

邢臺令君王九生席上

西川才子專城居。國士門邊且住車。沁雪滿斟刁氏酒。帶霜新脍濟泉魚。當筵不住罪佳  
屑。秘帳懸知有異書。話到爲民親切處。傅家家譜尙然疎。(邢臺亦有百泉濟水見處)

黃梁祠(門外有池)

楊葉滑官道。溜痕塌古城。荷花雖冷落。潭水益澄清。塔下逾柯影。幃中出鳥聲。到郵天尙  
早。一拜呂先生。

夜坐成安署中懷吳表海觀察

惜別五花館。音徽詎忍忘。吳猶存季子。世尙有中郎。楚雪都成帙。秦風漸滿囊。鹽車流汗日。剪拂意何長。

其二

豈但懷恩紀。仁風暢郢畿。蕭然留劍去。不肯載書歸。旅館濃霜氣。空塔冷月輝。玄言人已遠。對酒悵分飛。

大名贈別郡伯陶葛闥

夢裏忽來魏博鄉。扶風太守舊名郎。蒲圃坐處嫌僧鬧。尺牘來時怕客藏。清淨自成經世法。虛閒別有養生方。年來好聚香光侶。卜築真宜共楚湘。(陶工書)

焦大令涵一邀游大伾山大伾寺山下卽黃河故道今湮

歷歷煙巒到轉遲。朝酣乘輿躡幽奇。低回禾黍豐柔處。想像波濤震怒時。石裏青林偏秀媚。苔中綠字尙淋漓。變遷靈谷尋常事。定有征南舊日碑。

其二

飛杯倚石瞰興亡。風起雲生草木僵。八相不遮曇跡冷。九河失道禹功荒。岸紋隱約存原隰。石骨參差寫宋唐。大伾向聞今得見。冥搜寧問客程忙。



焦大令涵一邀遊浮丘山園

中宵猶自到山頭。最喜峯巒在市廛。衛水晚縈衣帶雪。伾雲晴散寶爐烟。不須燈火聊親月。盡輟笙歌好說禪。姑射城頭忻一醉。總緣茂宰卽神仙。

朝歌晤翁承嫩步原韻奉答

桃葉頻年別。朝歌此夜心。飛騰期宿昔。留滯到如今。萍海呈瓊字。浮湖出越吟。久疎文酒會。衛水一披襟。

河上謠四首

北風吹岸沙。千里捲塵霧。白日不停留。遊人何處住。

其二

黃河岸接天。日暮走平澤。曠野少居人。魂消獨往客。

其三

今日捲蓬程。當初携手路。河梁一鴈鳴。是我傷心處。

其四

日暮北風生。刀刁號萬竅。似歌復似啼。逆風蘆管嘯。

渡黃河

如雪寒沙千里平。猛風雖盡浪猶驚。草經青女全無色。鴈過黃河別有聲。騎馬久無浮宅夢。倚蓬忽動蕩舟情。可憐廣武山常在。寂寞誰知豎子名。

過鄭州

乍逐黃河九曲紋。管城孤塔掛斜曛。圃田寂寂存秋草。京水悠悠起暮雲。林錦村中尋相國。鐵鎗寺裏憶將軍。褰帷隨意殄山色。南北喧寒已漸分。

禹州晤楊文弱于曹純原憲副席上

不須揮灑發新函。把臂煙霞興已酣。雙屐欲凌嵩少雪。兩眉猶帶武山嵐。最欣明燭添人喜。稍厭清歌聞我譚。况是主君今繡虎。相逢那忍不惺惺。

遊鹿門寺同蔡丈人余溶之

入山不見寺。禮佛乍聞泉。七疊飛晴雪。千年劃冷煙。乍沾行客袂。長伴老僧禪。蒼舊多佳韻。臨流列綺筵。

還里懷兩先兄效白

誰言故國下仙輶。鴻鴈飄零骨已消。石浦河邊雲寂寂。柳浪湖畔草蕭蕭。酒壇詩社基猶

在佛國天宮路已遙。記得當年行樂事。鶴兒歌曲犬兒簫。

周調九過訪山園卽席贈別

花開無俗轍。之子住行軒。謁客書全滅。酬恩劍尙存。月瀾清到骨。梅蕊豔消魂。(時紅梅盛)

開) 五嶺何時返。予將入薊門。

將至玉泉公安道中

圭組雖然係。煙蘿未忍忘。買田償舊諾。種樹試新方。經雪江尤淨。依流草易芳。栖遲吾豈敢。聊以浣塵裝。

浣市

流水縈孤市。寒煙重近林。游人來到此。浣却利名心。

松滋道中

寒帷對蜀雪。最喜路臨流。樹暗鳩茲國。沙明燕尾洲。魚蝦村市集。雞黍隱人留。原不馳名利。逢山卽便休。

過松滋江亭次子美韻二首

濁浪彌天地。低回過此亭。映山松更綠。臨水草先青。棘裏碑難問。(舊有斷碑)雲端路漸經。

春晴猶未穩。點點照泥星。

其二

煙霞獨往處。輟跡暫閒時。路轉逢江數。雲停得岫遲。未成辭祿計。先遂買山私。塵網如長繫。回頭視此詩。(予有終老玉泉之志)

贈龐玉渚

髯也超羣甚。清言獨啓予。家鄰一柱觀。腹貯九丘書。古紙藏經笥。名花雜圃蔬。懷蛟終變化。努力上公車。(玉渚家藏澄心堂紙并牡丹一種甚大)

鄧心還園(鄧所居朱市名煙霞里)

偶過煙霞里。徘徊屢詰莊。峽山當硯几。字水澗書床。語鳥隨歌拍。飛花妬舞粧。何須譚拜袞。玩世似東方。

一柱觀

一柱傳來久。名區自可留。經營依雪水。移置向芳洲。山尾蠶叢道。溪連虎渡流。峽峯如劍戟。翻愛此平疇。

枝江道中

楚國丹陽路未賒。峰巒斷處又平沙。溪深不障爛斑石。梅老猶餘冷澹花。水氣漾洲全似月。山嵐收雨盡成霞。風煙如此今方到。悔不從前細泛槎。

趙枝江鳳鳴邀游紫山卽席賦

姹松不斷緣。導我上山顛。峽水如堪漱。春洲恰好眠。送雲辭近岫。指雨過平川。小邑煩名士。絃歌滿市塵。

哭亡友官都劉孝廉玄度十首

楚國饒才子。君才未易過。常驚思入地。最愛口懸河。嗣續偏愁少。文章只恨多。長生誇秘訣。靈驗竟如何。

其二

束髮爲良友。雲霄每共期。楚宮頻徵逐。燕市苦追隨。起舞聞雞夜。高譚捫虱時。話來親密處。難可告妻兒。

其三

大韻超繩墨。醜雞那得知。買田同陸賈。捨宅似王維。土木形骸古。風霜字句奇。文人雖不祀。好語卽佳兒。

其四

白猿誇異術。青鳥詫奇傳。九籥高譚道。三乘浩說禪。門門皆曉了。事事欠精研。畢竟英雄氣。何須效瓦全。

其五

芥不污滄海。瑕難損夜光。分財猶有仲。假蓋豈無商。可笑生鴉雀。羣譏死鳳皇。通人別具眼。寧問俗雌黃。

其六

才士原無命。蕭條孰與君。有人爭絕產。無子護遺文。清浦千層雪。丹山五色雲。我來人已逝。撫景內如焚。

其七

人行無細謹。磊落亦堪奇。小器輕朱勃。多方學惠施。伐桃千古恨。埋玉一時悲。淚以哀鴻盡。重來哭故知。

其八

身後遂如此。登庭益痛酸。升天生未易。入地死猶難。破壁留遺像。空堂貯冷棺。幸餘文集

在檢點爲君刊（時尙未葬）

其九

西風吹敗屋。狐兔走靈牀。一劍非難挂。孤舟何處藏。賢妻忻徵士。慧女羨中郎。度曲青衣在。聞歌淚幾行。

其十

欲廣袁崧記。難經陸抗城。情輕姬輟哭。誼重友吞聲。文集編龔就。梵宮構未成。再來如有意。切勿似蕭生。（許玄度後身爲蕭譽）

徐從善手定玄度遺文授予感而有贈

瓶雀難遮事竟休。全憑良友足千秋。蠅頭薑尾行行認。鳳羽龍鱗字字收。竊注不須愁郭象。訂文久已託楊修。燈前手授慇懃甚。纔見標題兩淚流。

登宋山相傳宋女脩眞處也

近岫眉初約。遙峰黛漸開。芝田存瓦礫。鶴徑長莓苔。人應隨神女。山原接楚臺。陸城寧寂寞。紅粉亦仙才。

其二

輕煙彈指淨。平野入朝暎。小水如江婢。羣山信蜀門。丹泉窺去冷。鏡石坐來溫。披棘尋蘭若。濯僧忽似猿。

又

丹井泉雖在。仙媛跡已荒。何如祠宋玉。千古重詞場。

過張無盡墳偶題

相業千秋笑。佛燈萬古傳。口門予苦窄。不解代君詮。

將往玉泉宜都道中

隔歲堆藍約。穿雲未可遲。山寒忻日炙。人醉愛風吹。碧嶂交圍處。清泉亂語時。盡言跋涉苦。閒適許誰知。

從善宅中有贈

繡虎雕龍志未酬。養魚種藥隱林丘。宅邊山氣陰晴市。門外泉聲日夜流。秋浦煙雲棲李白。伏川花鳥媚高柔。春來景物真堪醉。結子桃飛十二樓。

初至玉泉晤無迹

盡謝紅塵事。來尋白社盟。區中潛寶契。人外有交情。水月非凡色。松風豈俗聲。法門最小



弟不用過溪迎。

### 別迹公

空門猶幸有知音。握手松關去住心。願爾長年如寶掌。遲予廿載卸華簪。六時禮佛身常健。十笏依巖住漸深。投老別離非細事。忘情亦自淚沾襟。

### 光澤掌藩見招有玉蘭二樹盛開

曳履西園願不違。蒼官籬下看芳菲。銀灣浩浩潮爭墜。珠樹亭亭鶴盡歸。豈與寒梅同寂寞。長如霽雪有光輝。靈香國裏眞憐客。一片時隨酒罌飛。

### 贈張叔曜

懶作干時客。相依閣歲華。態寧同蛺蝶。情欲緝梅花。得句如抽笋。學書逼畫沙。若逢遊覽勝。亦解貌煙霞。

### 艾仲美貽予以九品青蓮衣因作青蓮衣歌志謝

國客仙絲世無二。天孫機上呈工緻。剪取吳淞一段秋。移時卽證發光地。綠窗刀尺響擘娟。何必裁衣效水田。金針不繡凡花草。只貌西方九品蓮。豈是尋常穠冶色。異瓣殊鬚寫不得。天畫依然萬八千。曹家針神皆嘆息。四大淤泥忽清爽。娑婆彈指成安養。清泰佛是諸佛尊。青

蓮花是蓮花長。着來蕭散道場行。不羨天衣六銖輕。似瞻寶網交羅色。如聆頻伽和雅聲。此衣能醫熱惱疾。終日聞香不破律。帝女龍裳總俗胎。王恭鶴氅皆凡質。他年好作金方客。寶池煜煜光相射。披衣直向空中游。朝嬉滿月暮香積。白下仙郎世外姿。意匠經營也太奇。老來共作香光侶。披向山中禮六時。

飲五弟天花館

紫柏翎遮屋。新楊線拂墻。歸禽無靜舌。暮蕊熾穠香。散步勞偏適。傳杯興偶狂。莫辭乘月醉。鴈羽又分行。

入都門辭大人墓四言六章

吁嗟大人逝矣何所。未見兒出。但見兒處。

其一

赫赫大人神其可度。既見兒處。亦見兒出。

其二

後有場圃。恐驚靈宅。兒已夷之。永種松柏。

其三

其四

後有井甃。恐驚靈宅。兒已平之。永生葵麥。

其五

兩兄之仕。時與願違。豐碑未立。以俟兒歸。

其六

兒今行矣。何日遄歸。樹影已滅。淚猶沾衣。

襄陽史郡伯夢斗召飲文選樓

層樓指顧興飛揚。秀媚煙雲冠楚疆。入座青山傳晚黛。捲簾白雨送新涼。低回季漢干戈跡。彷彿南朝楮墨香。羈客却忻鄒潤甫。追隨叔子岷山陽。

襄陽令君王莪雲招飲文選樓

才大公多暇。清言共倚樓。看雲成快雨。變夏作涼秋。峴首嵐如滴。魚梁水亂流。高情欽父黨。予豈草玄儔。

黃廣文招飲文選樓

巖壑偏多態。游人眼亦忙。昨宵看急雨。今日送歸陽。人語隨煙寂。山容待月粧。無雙江夏士。文藻佐飛觴。

豫讓橋

清流漸涸見蒲根。吞炭先生跡尙存。委質自然輕一死。何須國士始酬恩。

保定署中初度

征軺正值射弧辰。郵舍一尊共浣塵。此日燕關乘傳客。往年湘水泛舟人。都無角黍添蔬席。尙有榴花照葛巾。南北東西聽任使。如今莫話自由身。

漳沱懷晉州守李素心社丈

十載蹉跎共敵裘。專城今作漢康侯。八行好付漳沱水。一夜隨流到晉州。

工部署中遇繕部郎李增華偶賦

仙曹偶爾奉清揚。鳴佩追隨鷺鷥行。嗜水也忻爲水部。愛山猶喜作山郎。文書歷落蠶頭字。帶鳥氤氳燕寢香。彈指桃花源上別。梅花署裏又相將。

工部署中偶成

八座遲來署冷清。人聲依約亂禽聲。慵來偶向庭堦立。指爪閒敲革帶鳴。

贈劉玄暉

走馬彎弓出玉關。長城一縷挂青山。漢家文法牛毛密。莫效陳湯斬虜還。

其二

青驄白馬健兒裝。大醉徘徊古戰場。秦月漢關那久住。桃花結子待劉郎。  
口占送龔滄嶼大行表弟使福藩

金符玉冊下天門。伊闕黃河帶礪存。長袖飛來閒覽眺。洛陽猶自有名園。  
其二

王程閒作看山人。澹遠情懷迥出塵。磨墨小鬟堪送日。無心更問洛川神。  
送阮同年集之大行使閩

小阮知予勝自知。經年相見又相思。却憐鴈羽分行日。正值西風脫葉時。  
其二

澹月微霜弄早秋。才人出使太風流。煙書嵐字縹囊滿。處處青山顧虎頭。  
其二

相逢睡霧總煙雲。禽向終僧襟乍分。閩海山川不共賞。一緘煩寄武夷君。  
其四

邸舍常餘三日香。王程躡屐與飛觴。堪殮燕玉妖韶甚。休嘆王家十八娘。

改教疏下部有作

懶慢偷全病後身。豈爲龍性果難馴。東方宦跡惟逃世。司馬家傳不治民。鳩計一莖聊適性。鵬營萬里枉勞神。深秋鼓棹烟波去。依舊登山涉水人。

哭白五石大行

把臂西園歲甫周。不堪消息自通州。神清未是人間物。思苦遂爲性命憂。文考夢中呈翹。翹。賈生室裏兆鴟鷂。中郎去後君隨逝。帝所相逢好唱酬。（白詩學中郎）

赴西陵侯宋伯亨席有作

林樾真無暑。追隨竟夜留。荷花爲麈尾。酒案代游舟。霞布依城寺。烟縈映水樓。主人多勝韻。才子漢通侯。（御河不敢用舟以釀酒者盛水之案如長盆可坐十人名曰酒案）

淨業寺獨坐

城西湖水剩清涼。古寺凌波樹幾行。十里芙蓉通太液。一方蒲荻宛瀟湘。都無久雨妨行樂。忽有輕風伴坐忘。假寐偶然呼不醒。貪他魂夢也生香。

劉百世鏡園七夕先夜風雨大作

着意尋花花事稀。昨朝猶自飽芳菲。風波欲冷黃姑約。草木全彰白帝威。繞郭遠山傳暮

景窺林乳月弄微輝。亦知投轄留賓意。河朔年來與漸非。

### 壽王翁

澍雨息游龍。絕塵停駛驥。歸來兮。山中山中。釀可醉。已悟蜘蛛隱。遂同鷗鷺戲。風吹褐布囊。山冷霞紋被。倚藤瀑流維。欵笠峯容媚。陳琴愛不絃。作詩喜無字。三萬六千朝。無朝不把臂。瞻望林間人。非仙有仙致。

### 送李仲達赴南康司理任

匡廬天下勝。勝處在南康。宿有烟霞志。今來水石鄉。畫輪沾瀑雪。綈扇擁山光。公隙都無事。箋書與燕香。

### 報國寺老松

古寺尋松幾度游。炎威乍到冷飈飈。孤株欲上還中止。老幹旁挈不肯休。虎倒龍顛爭氣象。大年羊月紀春秋。大夫空領秦家爵。何似山僧骨韻幽。(此松元時物也)

### 報國寺

涓城人去且從容。曲徑離離亂草封。古刹依稀如小縣。危樓彷彿似高峯。雲翎霧羽千章柏。鳳竄龍窩幾樹松。日暮凭欄虛閣裏。直西雲岫翠重重。

鞏華城南樓

積嵐藏野市。流水繞高塘。玉砌朱桃墜。金鋪碧草封。亂山遮塞北。一罇走居庸。漸覺塵緣淨。將追禽向蹤。

其二

不遠神京路。遂親漢朔天。南瞻雙闕樹。西認九陵煙。帝邸龍鱗耀。軍儲雀尾連。漢關曾一度。屈指已多年。（城外運舟畢集）

法雲寺

直北西山曲。峯巒似劍鋸。近皴飛雨點。高嶺入星光。西水浸茶竈。東泉繞飯堂。雙流鳴玉雪。滾滾赴魚梁。

病餘偶成

身入羶途已二年。銅烏蓄口罷譚禪。浮名應作高官障。多病翻成靜者緣。風過蔬畦交薤字。雨清石徑盛苔錢。昨宵忽作家園夢。笑上車湖舊釣船。

黃山八景詩爲張給諫華東賦——兔柴

眼底非凡界。何須向僻陬。天孫分秀嶂。地媪資清流。爽豁峯巒峻。紆迴洞壑幽。殷勤搗藥



使。此處卽丹丘。（華東步山間有兔突起去視其處形勢最勝定爲別墅因名）

### 超然洞

金堂如有待。玉室許誰來。春水桃爲導。仇池穴正開。千山分點墨。萬井辨飛埃。遂祕還虛朝。光明近帝臺。

### 對仙樓

莫向蓬瀛去。焚香坐此樓。鳥鳴知晝夜。花發辨春秋。赤鯉真人過。斑龍姹女游。功成須早至。黃石待留侯。

### 柿泉

秋容無限好。散步暢幽居。獨倚酣霜樹。來觀沸雪渠。汲泉聊漱齒。拾葉且臨書。若把寒潭比。君心較澹如。

### 閭偈山房

齋後游山好。悄然轉覺親。曇磨無半字。童子漫東詢。白月田中鷺。紅羅扇裏人。知君深薦取。端坐鳥啼春。

### 坎井

和雪惟添冷。浮花祇益香。廉泉同皎潔。孝水共清涼。蔬蕘何辭抱。棹機久已忘。山家存素朴。奢侈笑銀床。

佛跡石

愛此玲瓏質。鏗然觸瘦筇。移來元鹿苑。分得自鷲峯。幻竅霞紋市。奇絨雪浪重。佛魔都不用。看作兔狐蹤。

虎頭崖

突兀都無地。凌虛小寘齋。不爭龍尾道。偏愛虎頭崖。去只邀雲伴。來應得鳥偕。臥游亦自好。宗炳靜澄懷。

壽陳眉公六十

湖柳生來作道民。扁舟息帽幾經春。逃名怕作仙人障。息影真成靜者身。十畝蔬畦書苑字。數椽茅屋繞松鱗。華陽猶自慚高隱。輕與時君問答頻。

贈蕭封公

擲却毛錐鬢尚玄。閒攀碧岫遡清泉。身藏何必留文字。機息真宜對酒船。柳市投車高會客。銅街躍馬小遊仙。八簫宦業兒曹事。爛醉花前不計年。

將赴新安任出都門

喧極翻成靜。悠然出帝畿。人因南去喜。春在臘前歸。風軟貂猶謝。晴酣羽尙揮。不須吹玉律。到眼盡芳菲。

雄縣道中

纔出江南路。遂逢蘆葦村。遠山真似睡。近水忽如言。古邑惟蔬圃。荒垣見樹根。鴈行乘傳侶。蕭瑟一人存。

過鄭州城

燕南垂兮趙北際。中央不合大如礪。當時公孫併幽州。自云此中可避世。避世兼思避此身。傳呼盡用健婦人。袁家鼓角天中至。城內兒郎心膽驚。蕭蕭易水帶冰流。北風吹沙動地愁。追思悲歌慷慨士。荆卿過去又田疇。

白溝河

寂寂黃沙去。誰言翠輦過。可憐張叔夜。哭死白溝河。

德州張民部鍾石署中同馬遠之分韻予曾訪舊友劉元定飲

此

尚不迷松徑。猶然識柳衙。暗城纔吐月。凍樹盡生花。共和尊前雪。同瞻眉上霞。回思池水滿。荷葉擁浮槎。

馬郡伯北海招飲泛舟

不意塵中軫。能爲物外游。南來纔見水。冬煖一浮舟。沙鳥隨歌拍。冰枝雜酒籌。時艱真可慮。猶幸有康侯。

馬郡伯遺予墨竹

拔地神清健。凌霄骨格清。可知文氏派。不獨在彭城。

陶突泉兼呈大中丞李夢白直指畢東郊二先生四首

按牒尋流杖幾穿。鵲華原畔見靈淵。祇疑伏地烹砂火。能作騰空沸雪泉。龍女捧珠同日。月。天孫飛乳潤山川。無端出沒呈奇變。晝手猶難吳道玄。

其二

獨立石梁看幾迴。雲蒸霧委逼人來。天生珠樹聯翩映。地涌蓮花次第開。一部鼓吹喧晝夜。三分鼎足震風雷。(泉有三)下流水性翻同火。魯國儒生仔細猜。

其二

草樹全呈白帝威。水花泉蕊更芳菲。嶺頭踴躍非關咒。漢上淋漓不用機。忽地喧騰遮客語。有時翔舞上人衣。中宵如傍銀灣宿。骨冷魂清夢不歸。

其四

泉上閒聽野老言。果然往復徵乾坤。涓涓昔作蛟珠滴。滂湃今同軸雨翻。偶爾靈源迴地脈。都由福曜在天尊。會看甘液從茲澍。賜履山河總被恩。

千佛寺（寺前正對華不注）

疊疊烟雲地。何妨近市塵。城中湖弄雪。甸外水生煙。前嶺囊錫出。層峯鐵甕懸。今朝華不注。偏與我周旋。

靈巖

秀媚山巒傍岱宗。天孫縷結翠重重。石花珂蕊深藏寺。蠟淚螺烟巧作峯。一勺已嘗法定水。千章真愛朗公松。數年赤地飛泉斷。我欲潭邊起睡龍。

登岱宗十首

岳勢同雲氣。天然秀冶稀。冰凜添瀑韻。樹蛻益山威。地軸孤峯盡。羲輪午夜輝。層稜骨理別。不必較芳菲。

其二

穴底窗猶遠。珠中曲莫偕。前人踏皂帽。後侶戴青鞋。九地陰羅壑。三天瘦削崖。飛禽難到處。隱室似鳩柴。

其三

不遠蓬玄路。攀躋莫厭勞。剪峯成蕊葉。插漢盡波濤。大海環三界。中原僅一毛。由來天下小。况復此山高。

其四

近水如飛縷。遙封似列村。孤高呈海屨。尊特壓天龜。射首同蠶婢。徂徠豈弟昆。古人饒目力。曾此見吳門。

其五

千秋填海曲。五岳重神房。典禮從三代。尊崇歷九皇。石消遺字隱。地老舊壇荒。人主通天事。儒生不敢詳。

其六

風日今朝好。遍游按舊圖。攀崖忘失脚。入洞倦垂顛。疥壁錐何厲。污雲墨盡塗。秦碑差可

語有字不如無

其七

天際瞻蒼翠。今宵此處眠。近人山月皎。照壁海霞鮮。瑟瑟穿崖樹。熒熒帶雪泉。何須尋玉簡。夢已告長年。（是夜得佳夢）

其八

凌冰雙屐緩。撥雪一藤艱。偶到黃花洞。重逢翠羽山。龍章前作闕。鳳質後爲關。蔗尾居然似。游人且莫還。

其九

極目神臯地。蕭條滿大荒。祈年何切切。遍雨竟茫茫。青帝非無意。蒼生合有殃。主人供酒食。三嘆不能嘗。

其十

莫話登封事。民艱值此時。巢梁無故燕。依井有新葵。好雨同甘露。嘉禾等瑞芝。三公神秩貴。福國竟如斯。

登岱還東州守侯佩之

歷險皆平善。相看賀一卮。峯巒隨客到。神骨有誰知。九子寧尤物。三峨失秀眉。主人應仲遠。模寫益新奇。

文字王孫園同少府龔我醒。司理呂豫石見所貞。白隔歲預作

上元之宴卽席賦

處世忽如夢。爲歡貴及辰。同儉忙裏適。共賞臘前春。枝蕊千燈映。繩竿百戲陳。主人富麗藻。詩畫總清新。

題會稽女子詩跋

予過兗東一古驛中。見壁間有字云。余生長會稽。幼攻書史。年方及笄。適於燕客。嗟林下之風致。事腹負之將軍。加以河東獅子。日吼數聲。今早薄言往訴。逢彼之怒。鞭箠亂下。辱等奴婢。余氣溢填胸。幾不能起。嗟乎。余籠中人耳。死何足惜。但恐委身草莽。湮沒無聞。故忍死須臾。候同類睡熟。竊至後亭。以淚和墨。題三詩於壁。并序出處。庶知音讀之。悲余生之不辰。則余死且不朽。其一曰。銀紅衫子半蒙塵。一盞孤燈伴此身。恰似梨花經雨後。可憐零落舊時春。其二曰。終日如同虎豹游。含情默坐恨悠悠。老天生妾非無意。留與風流作話頭。其三曰。萬種憂愁訴與誰。對人強笑背人悲。



此詩莫把尋常看。一句詩成千淚垂。予覽之不覺泫然。猶冀其未必死也。因作三詩書其後。

枉讀新詩淚滿巾。近踪燕越好追詢。將軍應是饒錢癖。急把黃金贖慧人。

其二

含情一字淚千行。蘭玉心情錦繡腸。買入五湖舟裏去。山花水月細平章。

其三

安能長伴虎狼游。日夜摧殘命合休。女鬼冤讎誰報得。幾回怒髮對吳鉤。

嶧山

乍愛堆雲秀。遠驚累卵危。仙書遺斷墨。帝弈雨殘棋。禹跡孤桐寺。秦功大篆碑。生居文藻

國名勝尙多奇。

其二

澹煙呈異色。古溜發奇章。依土何須帶。彌天盡欲翔。微歆忻有宇。中斷嘆無梁。試望層巔

上石帆幾葉張。

郵亭見亡友白爾亨壁間詩感賦

是我同聲友。維揚一俊人。春花生齒頰。秋水作精神。訪岳盟何在。憂時墨尚新。漏鍾三十  
六。定數漫悲辛。（丙辰春予在京華爾亨遊于城西極樂寺晤言爾亨時年三十六謂予曰予往得一異夢夢至帝所  
令予歸今年予三十六矣恐定數不可  
逃也至秋病歸而逝得年果三十六）

全椒道中

高峯已下日。凹處尙留明。深嶂傳燈火。暗橋沸水聲。風緊車尤嘯。石擗馬忽驚。香泉知不  
遠。急去洗塵纓。

香泉

如此溫泉沸四時。不須凡火也稀奇。可知清泰如來國。定有蓮花七寶池。

采石

風起浪噴巖宮商。幻餘竅青林。作冶粧大江。爲寫照雪花。忽飄瞥謝家山。已皓依巖一夕  
眠。骨冷絕夢到。彷彿青蓮魂。登頂發清嘯。曉起弄新晴。千山濃雪耀。

其二

清寂何曾似宦游。鷗鳧結伴此溪頭。祇緣柳下安卑秩。仍效玄真作隱流。雨急漁翁剛住  
釣。風來估客共維舟。謝家山色居然好。不得移栖且暫留。

姑熟溪

雪霽山日生。光輝發皓白。小舟覓故人。謝家山咫尺。溪行向南去。屢顧戀采石。寒林夾清渠。澄潭晒網集。魚鷹沙上行。嘴似珊瑚赤。曝背忽成眠。此中莫喻適。

雨泊采石

銀竹漫江來。菁林如翠羽。不愛采石月。偏愛采石雨。

其二

盤旋小舟中。閒話雨聲裏。舒襖卽成牀。卷襖卽成几。

除日采石阻風兼柬曹元甫

竹箭走西陵。忽過天門嶂。稷雪亂飄揚。微吟寄小舫。千傾白鷗波。中有青蓮相。風驅雲盡飛。山約水彌壯。峯似寫眉煙。松窮偃蓋狀。時倚依巖樹。細聽觸石浪。薄宦亦何爲。所志在清曠。北來塵路窮。仍得遂微尚。除日峨眉亭。茲游亦何暢。寂寞更何辭。所喜絕塵鞅。我有同心友。塊處抱悽愴。如此秀山川。未得偕禽向。結伴固有時。茲來未可望。水泊予所安。君無憂旅况。

采石歲暮卽事

秀冶堪怡目。凌冰一上臺。吳山隨雨沒。蜀雪打巖回。松禿橫蒼幹。石文繡紫苔。我藏數斗

酒聊以薦仙才。

其二

積水明村市。孤山塞古津。臘殘無霽日。歲暮少閒人。麻米陳清供。鷓鴣作近隣。故園梅正好。不上小烏巾。

戊午元日采石舟中試筆時值大雪

纖塵不到小舟邊。天寶餘生簡澹緣。有寺有樓何異宅。非官非隱亦疑仙。愛山恰好添鮮色。作客同忻兆稔年。鳥跡人踪都滅盡。攜筇一拜李青蓮。

雪中登峨眉亭

載雪來山頂。遊踪亦太豪。壓林披竹柏。迷險犯波濤。尙覺江身濁。微分岫影高。截流飛一葉。得失嘆毫毛。

雪中讀夏濮山欽浦詩有作

唐聲久不作。大雅見斯篇。玄澹同摩詰。清靈近浩然。才情寧作我。法度更從先。一帙蓬窗下。微吟雪滿船。

峨眉亭懷曹元甫

昔讀太白詩。君才依然是。每思太白顏。君貌分明似。快哉峨眉亭。水急石齒齒。宿露一朝開。謝家山盡慕。何必懷故鄉。青山洵爲美。况有素心人。風味如蘭芷。一屢寄煙嵐。終當共吾子。

雪霽放舟東下

初曦粲粲泮蓬冰。絃姥山頭水更澄。兩岸雪山相照耀。千帆結陣走金陵。

其二

濤聲澎湃似奔雷。兩道飛蓬水上開。雪裏鐘陵天外影。牛頭纔過燕磯來。

上元日李大中丞順衡席上聽新聲賦贈

今宵良宴會。綺席試春風。芳草迎裴令。穠華擁謝公。珍廚傳郇國。名酒敵新豐。三雅杯纔設。九微火正烘。交光奪滿月。奢帶剪長虹。妙選平頭冶。時翻樂府工。燈明花更麗。肉好竹難同。乍落直穿地。俄騰仰注空。輕盈飄弱絮。銛健挽強弓。獨出絲抽繭。曹喧蕊聚蜂。呢喃和喜燕。嚙唳寫驚鴻。響激珠頻串。音殘縷未終。度針喉巧幻。裹鐵調圓融。銀竹迷鳴箭。金羊積豔蟲。兕尊花霧裏。象板雨聲中。酪薦奴茶茗。腴刪帝笱菘。騷壇親徵曲。幕府舊平戎。且倚鸞臺醉。安知麟閣功。九邊酣戰曩。三徑息英雄。按拍譚奇正。臨評話守攻。文章裁白紵。韜略課青僮。款駐千莖綠。閒留兩頰紅。鄰侯生鎖骨。弘景萬方瞳。何幸逢投轄。無煩嘆轉蓬。廣陵當卜築。杖履侍仙翁。

揚州早發

煙水緣何熱。經旬只住舟。隨風登采石。帶雪出揚州。春後寒猶重。江南草漸柔。閒情久已澹。勝侶覓沙鷗。

送方子公兒子思純

猶作無家客。重逢淚不乾。多年亡父母。何計緩饑寒。破柱尋書失。開松覓劍難。終懷丘首志。清水載遺棺。(時將往臨清載其父旅櫬還)

蕪湖早發入新安

豈擬長官耳。生輪勞尾魚。今暫息鱗。冠帶場中爲隱士。煙嵐國裏作官人。和雲竹葉陰森路。泛水桃花豔冶春。欲覓漁郎何處是。數家鷄犬隔重津。

由蕪湖入新安道上雜韻

春水平田鷺一羣。黃花陌上野香薰。若爲雨露猶屯霧。總以松多易染雲。洞拂古莎來鹿女。原留新跡過山君。馬蹄閒踏蕭森影。夜月朝曦兩不分。

其二

長途一縷蝕山腰。廬至時逢伐木樵。地僻乍存三兩戶。溪多何止百千橋。小園處處花相

接遠岫重雪未消。半壁已驚千丈落。登峰猶自路迢遙。

其二

幾迴披葉與穿花。于役登臨望已昏。驛路只隨晴雪去。山城常被晚嵐遮。何村不是王官谷。到處堪爲處士家。石骨鱗鱗溪練疾。故將竹筏代遊槎。

其四

春鳥啼來不諳名。桃花叢裏吠龍清。欲登山塔都無路。未見溪河先有聲。棗葉幾何人亦住。鵝頭直上馬猶行。巖巖滿目餘阡陌。處處樵蘇間耦耕。

初至新安李謫星招飲泛舟同王孝廉樺呂程茂才孔達

煙雲歸散吏。風日媚游船。偶過花間寺。頻穿柳外橋。遠山猶見雪。近水乍聞潮。對酒成狂笑。天都路不遙。

潘景升招飲山寺卽席賦

繞城山態欲飛翔。石路鏗然到上方。雨勒天桃猶斂萼。煙籠姪竹漸聞香。窮來尙喜存龍性。話裏重新泣鴈行。廿載別離今把臂。頭顱白盡舊潘郎。

王樺呂招飲泛舟同謫星

景物居然勝。類遊也不妨。六川孤澗納。十寺一峯藏。花好催春酌。山深聚楚狂。隔舟香霧裏。聽曲指王郎。（太平十寺俱在一山）

汪僑孫園中看桃花同郝公琰謝禹仲

古園猶自竹樓華。覆戶石楠竹徑斜。留得豔陽晴半日。同看紅樹燦餘花。篋中緗帙班生宅。門裏春山謝眺家。雷作雨媒剛數點。飛杯忽負赤城霞。

聞王穉呂攜二妙遊如意諸寺賦寄

莫憶江南青輪舟。螺山穀水且夷猶。到來蕭寺名如意。攜得佳人字莫愁。西嶺雲開存黛色。前溪雨過帶花流。燕鶯即是烟霞伴。禽尙何須向外求。

首夏買舟邀夏濮山明府泛河西并遊太平寺雨中有述

繞郭存佳勝。追隨樂未央。最忻臨練浦。猶喜近韶光。錦纜牽何處。青溪曲正長。煙嵐藏市井。山水設金湯。草樹明烏嶺。樓臺倒紫陽。溪鱗空暮隊。巖藥鏡中香。新筍充肴核。殘鶯佐酒觴。倉皇俄電笑。矜隱忽雷裝。不畏驚濤立。還忻快雨涼。濃雲移鳥道。墨雪震魚梁。駁蝕尋高岸。淋漓入道場。過橋聞驟瀑。覓徑得修筵。杯爲留賓拊。蔬綠愛主嘗。軒楹重徙倚。丘壑細平章。君出燦花論。予慚錦繡囊。文章窮酉穴。膏液儼庚桑。拭眼看鵬翼。含情托鴈行。再期明月夜。芳谷共



徜徉。

梧桐洞小飲

雨雲隨馬去。雪瀑濺衣來。忽到梧桐洞。同傾竹葉杯。

落石赴丁真白招同丁孺三孔達惟修

山是何年破。石猶此地留。雙溪分燕尾。孤嶼出鵞頭。欹笠觀霞壁。停杯看雪流。欲知登覽興。銀竹在衣裘。

同張令君芝亭社兄泛舟話舊

不向華堂沸竹絲。茗甌松屐話離思。相逢畫舫歡娛地。轉憶名場枕藉時。雨過淵淵鳴皓雪。雲開疊疊露蒼眉。垂天羽翼君先起。倦鳥今纔占一枝。(甲辰會試與芝亭同坐一草。蓋下蒼眉見桓芝衡山賦)

齊雲

尤物從來九子閒。茲山奇幻更誰羣。三姑絕似三珠樹。五老居然五朵雲。列鼎陳敦存岫骨。飛朱瀉墨寫巖文。滂沱頃刻翻霞壁。雨韻泉聲兩不分。

飲丁孺三碧霄樓同程試可

依巖懸畫閣。客至似飛翔。南牖騰蒼壁。西窗暗綠篁。入泉歌易隱。敵雨笑偏狂。爛醉休言

去敷蒲有石牀。

鄭村訪秦京兄

仗履辭城市。清言了不聞。一九長謝客。十里遠尋君。治習同秋草。詩思尙夏雲。新安多旅士。野鶴在雞羣。

其二

十里新筵路。殘鶯尙可聞。溪迴如導我。山轉忽逢君。撫景思隨會。臨文憶子雲。舊交惟爾在。若爲久離羣。(時同閱黃太史平情集)

汪長馭師摯園

宛轉欄如導。攖欒徑合斜。門中看石壁。水底見山花。世業聊存素。天成豈鬥奢。中郎曾倒屣。廿載舊通家。(其尊人景讓先兄中郎門下士也)

步至王將軍園

忽忽忘簪帶。扶藤信所如。畏人思入壁。休眼罷觀書。竹長斜穿屋。泉多亂注渠。榴花時墮水。錯認是朱魚。

初度同秦京及諸公泛舟二首

何處堪怡悅。名藍聚水西。利錐逢快友。文練出清溪。上客全寒素。微官半隱栖。決雲還縱壑。魚鳥任高低。（古云汝穎之士利如饑京汝南人故云。是日放生）

其二

我本無公事。那能不泛船。肯將閒日月。孤却秀山川。戲水生能悅。浮家歲合延。君看鼓枻者。偏得喚長年。

夏令君元配胡孺人挽章四首

書黛螺猶在。返魂藥已稀。雖忻膺鳳紙。難報臥牛衣。乘筆誰相泣。攀轅不共歸。遺奩無一物。惟有舊支機。

其二

夫子真循吏。魚軒亦大賢。釜盛常莞爾。轡韋也潸然。漫話耕鋤事。先慳蔽佩緣。桐鄉他日祀。兼耐小君前。

其二

怪鳥偏追逐。祥鸞早棄捐。高柔妻短命。馮衍室長年。花發先凋蕙。琴揮忽斷絃。悼亡休太苦。潘鬢漸非玄。

其四

百里淹驚鳳。雲霄自此翔。蓮心偏共茹。燕尾不同嘗。哀旆辭黃嶺。悲笳出紫陽。箇中留畫扇。遺願有仙郎。

續溪道上

風好忽成寐。醒聞雲碓音。松陰生隱趣。禾氣發鄉心。百轉惟逢水。千盤不過岑。匆匆乘傳去。未許話登臨。

山

夏日同湯祭酒霍林同年詹紳南潘景升孫晉仲兄弟遊敬亭

勝地炎蒸也合來。竹陰花影繪陰苔。難逢黃蘗咨心要。且對青蓮問酒杯。視嶺似眉穿樹出。宛溪如練繞山迴。葦藤到處還祠廟。異代偏憐謝眺才。(山下即黃蘗之廣教寺)

詹日至劉旭招飲澄江亭卽席賦

分沙漏石愛清流。泛宅人同練上遊。他日有緣來往此。未營居室且營舟。

其二

清譚長日盡慵揮。霞綺江澄發妙機。地主才情勝孔顛。齒牙不借謝玄暉。

赴句曲送校士

餘睡猶在目。殘夢入潺湲。山深滴霧露。侵辰弄微寒。亂峯圍沃壤。禾穗亦已繁。微官無遠慮。身勞心所安。束帶非有苦。不敢話歸田。散步綺猨間。豈復異鄉園。聊作無心雲。異患何能干。

游三茅山

鼎足峯巒峙。青蒼撲近郊。兩宮如列縣。孤頂似居巢。松關風猶勁。蒲潭草已交。鴈行零落盡。不忍話三茅。

畢東郊見召郊園有述

別業枕巖阿。追隨鷺羽過。千山喧送雨。一室靜聽歌。夜色先歸竹。秋聲只在荷。主人偏嗜水。十畝半煙波。

二

北海杯曾共。西園酒亦同。興添風葉裏。譚劇雨聲中。流馬存燈影。屠龍試火攻。東山安石在。怒臂笑胡戎。(是日觀巧燈及槓炮)

秋日同程彥之程如晦汪惟修往游霞山

扶藤如渴驥。水陸歷金湯。溪路先辭暑。風柯已變商。蓋飄陳葉落。衣染澹花香。標建蒸霞

麗濤鳴。叠雪涼。裂雲成大道。絕網起飛梁。臂接同猿飲。身輕似鳥翔。雉城分仔細。虎節辨微茫。樓閣雲端接。閭閻井底藏。孤峯祠火帝。十刹奉空王。神木天呈瑞。文波地發祥。新安千古勝。大好憶蕭皇。

邀王先民彥之寶相寺食齋有述

出郭崎嶇甚。稍平寶地留。松遮禪院寂。竹隱唄聲幽。蘇晉長齋至。戴顓野服游。口閒聊豎義。莫嘆祖庭秋。

同先民彥之寶相寺食齋便往聶仙墓

支藤閒一日。聊作六時仙。寺外竹相接。林中楓欲燃。慵來憑古木。渴至漱寒泉。却嘆丹成客。猶然有墓田。

宛陵哭林兵憲樗朋先生

乍聞辭世夢魂驚。逐月奔星到宛城。鼓角罷喧人吏散。几筵空設兔狐鳴。江南無福留慈父。塞北多艱需老成。伯道已傷絕胤子。可憐相繼喪門生。(林爲先兄門下士時梁觀察德田亦下世)

黃山

東南佳麗氣。幻出此山形。壁壁姿神活。峯峯骨法靈。雨收新綻蕊。霧墮淨舒屏。軒后真仙

眼。搜奇建福庭。

二

天孫縷織就。帝子琢磨成。拱揖存容止。迴環具性情。絕奇直一死。得到慶餘生。莫使歡呼極。經途總化城。

三

名以軒皇著。基從邃古開。游仙天子至。招隱帝王來。朱鳥猶鳴樹。玄猿尙嘯臺。夜深光怪起。海底盡丹材。

四

鵝雀頭邊過。蓮花片上眠。西瞻溢浦雪。東望廣陵烟。追琢嗟丹壁。鏐銖駭笥田。貌山多溢語。此地愧難詮。

同諸公至曹元甫郊園

紅塵欲染鬢毛班。博得登臨半日閒。柳路略嫌遮采石。柴門恰好卓青山。良朋不請爭飛蓋。清蹕無端也破顏。江表煙雲君已飽。可能黃海一追攀。

遊水西寺

纔出城闔便見松。水西如畫且移筇。逃禪天子曾留偈。吐舌沙門尙有鐘。近澗溶溶圍古寺。前山疊疊湧高峯。風光到此堪怡悅。況有良朋載酒從。

壽虞大椿翁七十

漢宦公卿貴。誰同谷口真。文章歌白雪。行履踐朱繩。徵夢楓猶異。入懷蛟已神。鷗機忘不設。龍性健難馴。祗以書爲稼。惟餘道未貧。篇中生李杜。膝下走荀陳。野逸尋鳧鷖。功名托鳳麟。將雛來歛浦。選勝過鄆濱。令子珪璋彥。經時社稷臣。學抒何必仕。澤究不須身。臬日千門曉。和風萬井春。歌謠喧下邑。誦祝沸編民。似水皆趨海。緣江實起岷。螺山陳苗筍。綺澗共鮮鱗。軒后銑猶在。容成跡又新。終符蝶叟語。久視似靈椿。

午日汶溪觀競渡大會松蘿社諸君子二律用真韻

游龍凌駛水。舉國沸通津。何以經千載。猶然念楚人。近山明几案。疊水濺冠巾。喜逐雞壇後。珠盤插又新。

其二

叔夜由來懶。陶潛不厭貧。爲誰牛馬走。還我薜蘿身。白社添新侶。青山識故人。脂車予自喜。分袂也沾巾。



登齊山

何處非尤物。攀蘿豈憚勤。山空純是洞。石怪盡如雲。遠岫迷天塹。長江隱地紋。秋來秋浦好。惆悵鴈離羣。

池陽宛陵參謁回。將北發。偶兒子祈年自楚來。省同日會于金

陵。長千里喜而有作。（時遠陽邊報甚急。京師戒嚴）

奔星透月爲微官。山上紅塵水上瀾。千里楚吳悲異地。一朝父子聚長干。欲行欲住身謀拙。無餉無兵國步難。得汝故園將母去。小臣戀闕敢偷安。

舟次宿遷聞遠左信。送眷屬南歸。示兒子祈年二首

北風吹水撼孤城。送子南歸百感生。白首登朝逢禍亂。黑頭失意過清平。爾衝濤浪還湘浦。我逐干戈走帝京。千古袁家稱大族。祗緣歷代有忠貞。

其二

牽衣念汝拜頻頻。骨肉分飛淚滿巾。家值萍飄須長子。時當板蕩要忠臣。駛波欲逗南歸客。寒鴈猶憐北去人。不似大蘇遷謫日。斜川尙得待昏辰。

喜徐辰叟同入燕次韻

雞壇舊日和詩篇。字羽分睽今又全。長樂鐘聲同夢裏。西山雪色共尊前。聊耽粉署談心樂。暫緩青巖抱膝眠。七子最先徐幹至。著成中論挾風煙。

西山圖

爽氣果然佳。終朝看不足。何如貌此山。嵐霧指中出。

梅花勁骨卷

李碩人少習歌舞。長肄琴書。不作野外鴛鴦。願爲閣中鸚鵡。青驄白馬。夫僮。自居上頭。養紙薰衣。翔風堪爲房老。已而所天旣逝。不忍偕亡。銅母木奴。頗資部署。杞兒桂子。尙借支撐。一經已兆于仙郎。九原何慙于阿父。甫乃居家學道。處俗志真。借浮囊以自嚴。寶德瓶而不毀。舞裙歌扇。永作篋中之塵。經卷藥爐。長爲世外之伴。眞月上之高足。而大士之淨妹也。予心欽焉。故有斯作。

寒風吹雪漫山丘。綠萼瑤華韻更幽。寶瑟罷彈愁脈脈。錦衾無侶恨悠悠。和丸投杵情難盡。埋粉沉香願易酬。自有青蓮堪度世。不同燕子咽危樓。

其二

斫却龍槽斷却絃。不隨人去有因緣。香銷久已拋雙夢。骨冷何曾異九泉。念佛且憑樊素

口書經不用薛濤箋。永將身命歸清泰。誰羨珠宮窅窈仙。

### 壽人翁媪

市兒金爲活。賢人德爲食。不見萬石君。簪裙光照國。翁婦偕隱淪。負戴同棲逸。煙汀浴鳥紋。水嶼飄鶴翼。九百九十枚。忽然到門側。試看弧悅辰。粲粲金支色。

### 南赴禮曹任步須日華韻

烽火三韓恨未休。東風先洗哭時憂。浮家汎宅真吾事。調馬書眉不解愁。道侶舊推蓮社長。老來新拜醉鄉侯。也知仕隱非忘世。盛際陶唐有許由。

### 同同年兄弟吳元無申維烈姜季捷飲于魏仲雪齋中仲雪賦

#### 詩成予屬和時有結社之約

空齋雨夜共依栖。絕似寒禽揀一枝。孤客不逢棠棣酒。五年嬾賦菊花詩。袁羊敏速無佳句。衛玠清羸有妙思。勝地良辰休負却。珠盤歡後試新詞。

### 壽范封君

綠髮方瞳一丈夫。登山涉水噴人扶。不貪斗米荒三徑。自愛扁舟泛五湖。嘯雪歌雲銷節序。剪松沉柏養頭顱。匡時事業兒曹在。且逐長生問酒壺。  
(長生范長生也)

阿魯齋詩集

四〇二

阿魯齋詩集卷之七終

